

LUK

Né Ura Koptak

Lukri Né ge danah wénih Luk qe yan. Nug ge dokta am Grikrer. Nug danah nusgur am danah lawardi Tiwur pi dosi qe ole olag meře mérigri né ene yan. Tiwurdi Né os ge wénih Aposel qe ole Luk nug yan. Lukri Né e owa ge Luk Yesus keřdi wan ewa urıyan qeri yan: Nug oun os gattu owa de qe mariko peko buliko ow Tiwurdi uhribak éurdigri urıyan (19:10). Yesus danahas kunum asilag kug owari buliko diardigri urıyan (2:10; 2:30-32; 3:6; 24:47). Né Kena enewa, ig Yesusri o mousak hipunin danahas dilag nie qe ewqétu (6:20; 7:22; 14:11-13; 21:1-4). Ig nug o mousak as dilag qe ewqétu (né ene sillah 7:11-17; 8:2-3; 10:38-42; 13:10-13; 21:1-4; 23:27-31). Am nug o mousak nir nounu dilag qe ole ewqétu (né ene sillah 8:41-42; 54-55; 9:38-42; 9:46-48; 18:15-17).

Lukri Né Watiak

1. Né digumak (1:1-4)
2. Le Luarak danah Yon memnak am Yesus ole (1:5—3:20)
3. Yesus kekuak diguman (3:21—4:13)
4. Yesus Galili kekuan (4:14—9:50)
5. Yesus kekolle Yerusalem atan (9:51—19:27)
6. Kuha usih qe owa Yerusalem keř ban (19:28—23:56)
7. Yesus buliko fou meko asko am bégur gumarko wanan (sapta 24)

Né Digumak

¹ O danah naŕi Tiofilus, danah kuŕum la os ag tatam keŕ keŕ ig gamnigwa beko atan qeri né ene yeg. ² Ag né qe danahas ig mariweg duet qe sillah ole yeg. Danahas qe digumakwa Yesus keŕ keŕ sew amlagwa peg qe, dimba ag Tiwurdi Néri kuak danah beg. ³ Da Luk da né qe digumakwa arereg ban qe peko kepaŕko kouturin. Qeri da ole né ene keŕ keŕ kunum ban qe dimlamurko yarildi kena elle qe yin. ⁴ Danah naŕi Tiofilus, na né ismireg qe, né meŕe qe doka ot mourdig.

Le Luarak Danah Yon Memnakri Né

⁵ Sén qewa Herod* nug king delle Yudia gumewew, pris† os wénih Sakaraia daré. Nug pris ameg Abiya qewari, am nug waw Elisabet ole a olele pris Aron fuŕuh. ⁶ A olele Naŕinahri Óo am Né ole kunum dimlamurdap, qeri ge Tiwur a danahas mangunah qere piatan. ⁷ Gam a keinmanah am a nir kawa, keŕdi Elisabet nug owa nir kawa. ⁸ Sén os pris ameg Sakaraia nug daré ole qe asilag sén kekuakri dewew ge, deŕ os pris Sakaraia nug Tiwur nohwa kekuan. ⁹ Pris ag koulagwa wenlag ker masawa yeksi tourweg ge, Sakaraia wénih ban. Wénih bew ge, nug keprurweg Tiwur Lougwa noko ker ahu os kew kas muŕdig kena ole Tiwurdi mandigri nuan. ¹⁰ Ker ahu os kew kas muŕdig kena be ole qe nug manewew ge, danahas kunum dimdim qagleksi unuqoreg. ¹¹ Sén qewa Tiwurdi doup Sakaraia gumurko doko, qaŕéw ker ahu os

* **1:5** 1:5 Herod ene Herod king dewew Yesus katleg ole qe memeg. † **1:5** 1:5 Tiwur am danahas ole gamlagwa Tiwurdi ofa mak danah

muřdig kena ole ařelle dian qe séku kenariwa sirko dian. ¹² Dewew ge, Sakaraia aminko doup qe peko ge, nug wawtuřko ole fařan. ¹³ Gam Tiwurdi doup amegwa anan. “Sakaraia, na aw fařwen. Tiwur unuřorak nasip duan. Na wat Elisabet nug nir danah memanko mirdig, am na nir qe wénih Yon katař. ¹⁴ Geisah nug dow, na ot gamag naři asdig. Am nug durig qeri danahas la kuřum ole olag gamag asdig. ¹⁵ Keřdi nug Tiwur nohwa danah wénih ole darig. Nug wain am le gagrag la qe ole ospi lew, am nug anig owa niewew, sén qewa ole Koulli Gun nug ole wittew dessa omaldig. ¹⁶ Nug anuřko Israel danahas kuřum omlarew ag olag buliew asilag Nařinah Tiwur gumdeksi dolag. ¹⁷ Profetř Elaisa gagragsak morew kekuan qe sillah Yon Nařinah noh oko anuřko attig. Atewew ge, nug sew nir memelgar ole ag olag usih nirig. Am nug danahas Tiwur nohwa tapewnak sési qe omlarew olag buliew Tiwur o nie sillah diakri dahmelag. Qewa ge, nug sew Nařinah uřirigri qeri danahas olag bawressi dalag,” eko anan. ¹⁸ Sakaraia Tiwurdi doup kořmoran, “Da qe areg ol meře méřig? Keřdi da wal ole i keinmanah am i nir ole makri sén ertan.” ¹⁹ Tiwurdi doup nug kořewa oko anan, “Da doup Gebrel. Da Tiwur nohwa deina ole. Nug da meřilew nasip né kena ene oko na amenwa andildi uřiyém. ²⁰ Na doka koutor. Gei ole na né kařdew né ospi mariwen, keřdi na dasil né ot meře pi mé. Na dawew atew nir nasip dow am bulika né maririp. Da

‡ **1:17** 1:17 Tiwurdi né oko mariak danah

keř aném qe sén nusig morakwa bérig.” ²¹ Sén qewa danahas Sakaraia dimdim bérigri ameg méksi dessi dahmak kuřum og. “Aregri Tiwur Lougwa gun awen owa wagannah de?” ²² Sén nug dimdim ban ge, nug né mariakri olele kawa. Ag nug Tiwur Lougwa kowol os pian ge, nug ewegwa ih sew peksi olag mouran, keřdi nug né kařdan. ²³ Nug pris kuakri sén nusig qe malako ge, buliko lougwa atan. ²⁴ Qe dimba ge, waw Elisabet o ole meko, nug kalam tanig ole qe louw ih daré. ²⁵ Elisabet anan, “Nařinah dasil o niew, nug sew da nir ole mein. Géri danahas nolagwa uřa nak dorém ge, nug sew kawa man.”

Yesus Memnakri Né

²⁶ Kalam 6 qere Elisabet nirdi weiewew, Tiwur doup nusig wénih Gebrel qe meřorew taun nagur wénih Nasaret qewa atan. Taun qe Galili atu owa de. ²⁷ Tiwurdi doup nug Tiwurdi né oko as magun os danah ole ospi weiyes ole qe dowa atan. Nug danah os wénih Yosep king Dewit fuřuhwari qeri féğ orweg. As magun qe wénih Maria. ²⁸ Tiwurdi doup nug gumurko atko amegwa anan, “Maria, na kena te dana? Tiwur nasip o naři nie. Tiwur na ole dasa.” ²⁹ Maria doupri né qe doko wawtuřko katat qew ge dahman, “Keř digurinah né ene ané.” ³⁰ Gam Tiwurdi doup anan, “Maria, na aw fařwen. Tiwur nasip o nie. ³¹ Geisah na ot ole meka nir danah os memanka am nug wénih Yesus katař. ³² Tiwur sew nug binag naři ole bérig am nug wénih Tiwur Karannah Bega éksi anlag. Nařinah Tiwur sew nug king beko alag dugiah

Dewit king daré sillah darig. ³³ Nug Yakop fu'uh gumarelle king sansan darig. Kingdom nusig ge ospi kawa mew," eko anan. ³⁴ Maria Tiwurdi doup amegwa anan, "Da danah ole ospi weiyer' gam, aregnah kowol qere dagnéwa bérig?" ³⁵ Tiwurdi doup ko'ewa oko anan, "Koulli Gun neko na tonirew gagragsak Tiwur Karannahri na qan'irdig. Qeri nir gunnah na memandip qe wénih Tiwur Bega éksi anlag. ³⁶ Na doka koutor. Na liap Elisabet ole nug keinmanah, nug owa nir kawa éksi andéw, gam gei nug kalam 6 qere nirdi weiye, géri nug nir ole darig. ³⁷ Kerdi Tiwur nug ker' os sakri ane ge, qe mou bérig." ³⁸ Maria Tiwurdi doup ko'ewa oko anan, "Da Na'ínahri kuak as, na né anam qe sillah bar." Qere anew ge, Tiwurdi doup nug munurko atan.

Maria Elisabet Perig Atan

³⁹ Qe dimba wagam ole kawa, Maria bawarko usihri teko Yudia atu owa taun os qoukuwa, Sakaraia Elisabet ole des gewa atan. ⁴⁰ Atko Sakaraia lougwa wanew Elisabet peko sumdew ge, Maria ole Elisabet sumdan. ⁴¹ Sumdewew ge, nir Elisabet owa nian qe ole kawqan. Koulli Gun Elisabet wittew dessa dahmak moran. ⁴² Elisabet qalko Mariari anan, "Tiwur na as la kunum e'arak wittak kena miran, am Tiwur nir na otwa nie qe wittak kena moran. ⁴³ Da ol gamagnah ase, kerdi Na'ínah dasil anig peir'digri u'iyé. ⁴⁴ Na sum'ram qe dueppi ole nir da olwa ene gamag asew kawqé. ⁴⁵ Tiwur na wittak miran,

keŕdi na nug anan qe beko mou murdigri ot meŕe man,” eko Elisabet Maria anoran.

Mariari Kasi

⁴⁶ Maria anan, “Da ol dahmak ole kunum Naŕinah morko binag meina. ⁴⁷ Da Tiwurdi ol gamag naŕi ase, keŕdi nug da hipunin dasil noh uwindi seko buliko wiŕan. ⁴⁸ Da Tiwurdi kekuak as sam, gam nug da dahmiŕko koutoran. Qeri gei digumak am dimba dimba ole danahas anlag, ‘Tiwur as qe wittak kena moran,’ éksi anlag. ⁴⁹ Keŕdi Tiwur Gagragsak Digu, nug dagrowa kowol danah sakri kawa qe sew ban. Nug wénih gunnah. ⁵⁰ Nug sew danahas nug faŕursi ole qe ag alagar dugialgar ole ag nusig o duak owa dalag. ⁵¹ Nusig gagragsakwa kowol danah sakri kawa qe san. Nug sew danah ag agégé binlag meg qe kum qétieg. ⁵² Nug king binlagri seréw qe dilag gagragsak sew kawa meweg, am danah binlag kawa sam daréw qe sew ag nug nohwa naŕi beg. ⁵³ Nug danahas ke kawa qe ke kena nusigwa begaran am sew danahas kehlag ole qe ewlag sam qere ateg. ⁵⁴⁻⁵⁵ Nug kuak nir nusgur Israel danahas kehnaran. Keŕdi nug Abraham am algur dugiahur ole o duak nusig owa sansan diakri né fagqan qe dahmorko, ig alangar dugiangular agop ole qere sérig,” eko Maria Tiwur binag man. ⁵⁶ Maria nug Elisabet ole kalam kiam sillah dessa, am buliko kawagwa Nasaret atan. ⁵⁷ Elisabetri nir memnak sén dow ge, nug nir danah memnan. ⁵⁸ Nug gému ole asilaswari am leilti ag Elisabet nug Naŕinahri o duak naŕi owa dian qe dueksi, uŕiweg nug ole aŕié olag gamag asan. ⁵⁹ Deŕ 8wa ge nir féru gone

kotrakri s n dew, ag uriyeg. Ag memeg Sakaraia w lqorlagri seg. ⁶⁰ Gam nir anig anaran, “Kawa, nir w nih Yon kata nig,” eko anan. ⁶¹ Anew ge, ag Elisabet anoreg, “Asilag at rwari ount  os w nih qere ole kawa.” ⁶² Am ag Sakaraia nir w nih oun kata dig qe dolagri ewlagwa nug perigri kowol seg. ⁶³ Seweg ge, nug keke os morweg yarigri ewegwa ih sew uksi morweg ge, “Nug w nih Yon,” yew peksi dorlag nan. ⁶⁴ S n qewa ih Sakaraia nug ko re koptew digumeko n  mariyelle Tiwur binag suman. ⁶⁵ Danahas a i  dar w ole qe n  qe kunum duessi wawtu eg. Yudia atu kunum qoukuwari danahas ag ole kowol qe neihwah marieg. ⁶⁶ Danahas kowol qeri n  duessi olag meweg te meweg new ge aneg, “Nir ene ke  danahnah b rig?”  ksi aneg. Ke di Na inah eweg  Yon dowa dian.

Sakaraiari Kasi

⁶⁷ Koulli Gun Yon memeg Sakaraia wittew des, g ri nug Tiwurdi n  qe oko marian. ⁶⁸ “Na inah Israel isanig Tiwur binag m nig. Nug danahas nusgur kehnardigri uriko kege  asilgar ewlagwari buliko diaran. ⁶⁹ Tiwur k hnigak danah os gagragsak na i ole ign wa mew uriyen. Nug Na inahri kuak danah king Dewit fu uh. ⁷⁰ Algu Tiwur sew profet gun ag nusig n  qe uksi marieg. ⁷¹ Nug danah qe gagragsak na i ole ig k hnigrigri mew uririg. Nug isanig kege  am danahas are ag ig nouni dahmigi ole qe ewlagwari buliko wigrig. ⁷² Tiwurdi o duak ig

  1:66 1:66 “Na inah eweg Yon dowa dian” digu ge Na inahri gagragsak Yon dowa dian.

alangar dugiangular ole deg am nug titwanak gun qe doug ospi khatian. ⁷³ Tiwur nug alnig dugianig Abraham dowá né qe fagqan. ⁷⁴⁻⁷⁵ Nug ig keger isangar ewlagwari wigrigri né fagqan. Qeri ig pi farhut, nug nohwa onig kunum morettu sansan mangu weiyettu gun dettu nug binag ménig. ⁷⁶ Am nir dasil Yon, na geisah Tiwur sew na Tiwur Karannahri profet éksi anirlag. Keédi na Naíinah noh oka anuqka atenna ih nusig ordip. ⁷⁷ Na danahas nusgur anardip: Naíinah hipunin asilag kusuqko buliko diardig. ⁷⁸ Keédi Tiwur isanig o duak naíi nie, qewa ge kem be sillah Naíinah kéhnigrigri saw kappari uririg. ⁷⁹ Danahas gattuwa dasi am mousakri farakwa dasi qe agop sonrélle nug ih ismigew Tiwurdi maror ihwa atnig," eko anan. ⁸⁰ Nir qe dahmak am o mourak kena ole kena man. Nug atu meirak danah kawawa daré, gam dimba Israel danahas gumarko wanan.

2

Maria Yesus Memnan

¹ Sén qewa Ogastus nug Rom atu qe kunum dilag king delle, nug ró os man: Danahas kunum atu qewa daréw ag wenlag yalagri ró qe man. ² Kurinius nug Siriari kuri danah naíi delle ge, wenlag yakri ró qe diguman. ³ Am danahas kunum ag kawlag awen awen wenlag yalagri aseksi ateg. ⁴ Géri Yosep nug ole Galili owa taun Nasaret qewari am Dewitri taun Betlehem Yudia atu qewa atan. Keédi nug Dewit fuíuh. ⁵ Nug Maria ole arié wenlas yalasri ates. Maria nug

Yosep uřigri fég orwak dewew am Maria nir uřigri sén unaka dewew ole ates. ⁶ A Betlehem qewa dessa ge, Mariari nir memnak sén duan. ⁷ Sén qewa nug nir danah memnan. Nug ge nir anqakri. Maria nir qe lamen nařiwa saputko ge, doř dilag kelak awen qewa awen bawarko mew nian. Keřdi řo danah niakri lo qe ambew ag awen ole kawa.

Sipsip Gumarak Danah Tiwurdi Doup Ole

⁸ Sipsip gumarak danah ag Betlehem kaw qe mourak awen gisgar olewa sipsip asilgar gumareksi tuqan qewa deg. ⁹ Tiwurdi doup nug ag gumarko gamlagwa now ge, Nařinahri kamsahlak sonarķo talilaran. Talilarew, olag nařinah fařan. ¹⁰ Am Tiwurdi doup nug ag anaran, "Ag aw farweg. Da asilag né kenanah os oko uřiyém. Né qe sew danahas kunum olag gamag naři asdig. ¹¹ Gei deř ewa Dewitri taunwa as os nir danah memanko maré. Nir qe hipunin noh asilag owegri seko buliko diarak danah am nug Nařinah Kristus.* ¹² Ag nir qe peksi olag mourdigri ge kowol os ere pelag: Nir anig nug lamenwa saputko doř dilag kelak awenwa mew niewew pelag," eko anaran. ¹³ Tiwurdi doup nug né qe mariko malwew ge, usihri saw karan Tiwurdi doup ameg naři doweg qagleksi Tiwur binag sumessi kasi íreg. ¹⁴ "Tiwur karannah nug kamsahlak gun olewa de. Am danahas wanwa Tiwur asilag o nie ole qe ag maror nusig owa dasi."

* **2:11** 2:11 Kristus ge Mesaia. Tiwur danahas nusgur buliko diardigri danah toqoran.

Sipsip Gumarak Danah Yesus Pelagri Ateg

¹⁵ Sén Tiwurdi doup ag minareksi saw karan atweg ge, sipsip gumarak danah qe ag agégé né marieg. “Ig Betlehem atektu Nařinah anigé ole am keř bé qe penig.” ¹⁶ Géri usihri atessi ge, Maria Yosep ole am nir yu qe doř dilag kelak awenwa niewew mariareksi piareg. ¹⁷ Ag nir qe peksi ge, nir qeri né dueg ole qe danah la os taun qewari ole amlagwa aneg. ¹⁸ Danahas ag né qe dueksi dahmak lanah qere og. ¹⁹ Gam Maria keke kunum béksi ateg qe owa ih dewew dahmak naři oré. ²⁰ Am sipsip gumarak danah olag gamag asewew Tiwur binag karan sumessi am binag messi bulieksi ateg. Keřdi ag keke kunum Tiwurdi doup anan qe sillah amlagwa peg am doulagwa dueg.

Yesus Memeg Anig Ole Oksa Tiwur Lougwa Ates

²¹ Deř 8wa Yosep Maria ole nir yu féru gone kotřak sén dow ge, wénih Yesus katřes. Nug anig o ole pi mak Tiwurdi doup wénih qe moran. ²² Sén a Mosesri Řo yakwa gun kowol qe dimlamdeksa malweksa ge, a nir oksa Yerusalem Tiwur Lougwa Tiwur ewegwa melasri ates. ²³ Nařinahri Řo yakwa de ge, “Nir memeg anig ole nir danah anqakri memanlas qe Tiwur ewegwa melas.” ²⁴ Am Maria ofa oko Tiwur murdigri qe ole ses. Keřdi Tiwurdi Řo yakwa ane, “Kuhřil naři ařit kawa ge, kuhřil nounu masiksik fou kena mak ařit os pris mores.”

Simion Tiwur Binag Man

²⁵ Sén qewa, danah os wénih Simion Yerusalem qewa daré. Nug Tiwur nohwa mangu weiré am Tiwurwa ih daré. Nug Tiwur Israel kug asilagwari buliko diardigri qe ameg meré. Koulli Gun nug ole darap. ²⁶ Koulli Gun sew nug duan ge, nug Nařinah dowari Kristus uřiyew peko tatam am mousdig. ²⁷ Koulli Gun sew nug Tiwur Lougwa teko qewa dewew, Yosep waw ole Řo yakwa ane qe dimlamdeksa nir asilas Yesus oksa qewa tes. ²⁸ Simion nir qe oko momowa ořako Tiwur binag sumko anan. ²⁹ “O Nařinah, na atu kunum gumna ole, na né fagqen ge, na sewe nasip kuak danah da ol marorwa mousko attil. ³⁰ Kerđi da amelwa danahas buliko diardigri danah uřiyen qe piém. ³¹ Na nug kepřurka bawrurka mewe uřiyen. Qeri danahas kuřum atu kunumba nug pelag. ³² Nug Yuda danahas kawa la qe am danahas naspar Israel dilag ole Tiwurdi kamsahlak gun ole oko uřirig,” eko anan. ³³ Nir memeg anig ole Simion nirdi anan qeri dorlas nan. ³⁴ Simion wittak marko am nir anig Mariari anan. “Nir ene Israel danahas kuřum sew tolalag am gagrag dalagri ole am nug Tiwurdi ih ismardigri toqoran. Gam danahas kuřum nug dimorlag. ³⁵ Qeri danahas kunum dilag dahmak olagwa nie qe ambo mérig am na otwa qoum yako qetko attig,” eko anan. ³⁶ Am as profet os wénih Anna. Nug Fanuel ařeg am Aser ater qewari. Nug keinmanah am nug gému ole nug oksa makař 7 qer dessa, gému mousan. ³⁷ Géri nug qehřas dew uřiyew makař 84 qer ban. Nug sansan tuqan kémun ole Tiwur

Lougwa noko Tiwur binag mérigri kurdelle am unuqordé. ³⁸ Sén qewa ih nug Yosep Maria ole am nir asilas ole gumarko doko nir qeri Tiwur kena sam eko anan. Anelle ge, nir qe Yerusalem danahas kug owari buliko diardigri ameg meg qe anaran. ³⁹ Yosep waw Maria ole Tiwurdi Río yak de qe dimlamdeksa kuak kunum malweksa ge, a kawlas diguwa Nasaret, Galili atu qewa bulieksa ates. ⁴⁰ Nir asilas qe gagragsak ole kena man. Nug dahmak kena ole ban am Tiwur wittak kena mordé.

Nir Nag Yesus Tiwur Lougwa Dian

⁴¹ Maka' dorog Yesus anig memeg ole a Yerusalem Nan'urak De'rdi† mallenwa attap. ⁴² Sén nug maka' 12 qer dewew ge, ag koulag qe dimlamdeksi Yerusalem mallenwa ateg. ⁴³ Sén mallen qe kawa mew, nug anig memeg ole bulieksa kawlagwa atepes ge, nalas Yesus nug Yerusalem qewa dian, gam a qe pi dues. ⁴⁴ A danahas ole a'rié atsi essa de' usih ge ates. De' oswa ge a digumeksa Yesus mariessa asilaswari am lelti ko'mares. ⁴⁵ Sén nug ospi peksa, a nug marilasri bulieksa Yerusalem ates. ⁴⁶ De' kiam qewa, a nug Tiwur Lougri ka' owa Tiwurdi Né'ri duak marak danah qe olagwa dewew pes. Nug ag né marieg qe doko ge ko'maran. ⁴⁷ Ag kunum ole nusig duak marian qe am ko'mak buliko noh man qe ole dueksi dorlag nan. ⁴⁸ Sén anig memeg ole nug peksa ge, a ole katat aqatan.

† **2:41** 2:41 Nan'urak De' ge Yuda dilag mallen os. Sén Yuda danahas Isip darew qe, mousak nir danah anqakri nan'aran qe dahmorakri sén.

Anig anoran, “Nir dasil, na kerdi i qere sitam? Na memen am da ole i dahmak na’i nasip ollu mariyirah,” eko anan. ⁴⁹ Nug a ko’rmatan, “A kerdi da mariyirsa? A pi te dosa da Mem Lougwa deina?” eko anan. ⁵⁰ Gam nug né anatan ge, a olas ospi mouran. ⁵¹ Yesus nug a dimlamatew bulieksi Nasaret ateg. Nug anig memeg ole ko’rlas dimlamurdé. Gam Maria nug ker ker beko atan qe owa ih dahmelle daré. ⁵² Yesus nug dahmak kena ole kena man. Tiwur am danahas ole nusig olag gamag asdé.

3

Le Luarak Danah Yon Né Kusuan

¹ Maka’ 15 owa Taiberias nug Rom atu qe kunum dilag king daré. Pontius Pailot nug Yudia wan atu qe gumdé, Herod Antipas nug Galili atu qe gumdé, am kamag Filip nug wan atu arit Ituria am Trakonitis ole gumatdé. Am Lisaniyas nug Abilene wan atu qe gumdé. ² Anas am Kaiafas ole a pris* dilag kuri darap. Sén qewa Sakaraia nag Yon atu meirak danahas kawawa dewew, Tiwurdi Né nugrowa uriyen. ³ Yon nug atu le na’i Yordan mourak qe kunumba weiyelle né kuswelle danahas dilag anan. “Tiwur hipunin asilag kusuqrigri ge, ag olag buliew le luak os.” ⁴ Qe sillah profet† Aisaiari Né yakwa algu anan, “Danah os atu meirakwa qalko ururig. ‘Na’inah uririgri ih bawres. Ih mangu mores. ⁵ Ollu kunum meglares am qouku nounu am

* **3:2** 3:2 Tiwur am danahas ole gamlagwa Tiwurdi ofa mak danah † **3:4** 3:4 Tiwurdi né oko mariak danah

qouku wagé wagé qe ole kunum mangu marweg urémqes. Ih mériak qe kunum mangu mares, am ih goto goto qe bawres. ⁶ Danahas kunum Tiwur asilag kugwari buliko diardig qe pelag,' "eko anan. ⁷ Danahas ameg nari Yon le luardigri gumdeksi ateg. Atweg ge, Yon anaran, "Ag mat nou bégur. Oun anew ag Tiwurdi uhríbak uririgri unaka de qe érdeksi kum atsi? ⁸ Ag mérenah olag buliew pe, mou kena qe seweg bar. Am ag agégé 'Ig Abraham fu'uh,' éksi aw anweg. Da ag anarina, Tiwur qar nisi ene oko sew Abraham fu'uh belag olele. ⁹ Palangis qe ker kuardigri iril diglagwa bawrak de. Ker are os mou kena ospi niweg pe, kuarko kewba tou'ardig," eko anan. ¹⁰ Yon qere anew ge, danahas ku'um ag ko'rmereg. "Am ig aregnah sénig?" éksi aneg. ¹¹ Yon ko'ragwa oko anan. "Danah siot arít ole ge os ge danah siot kawa ole qe morar. Am danah oun nug ke ole ge nug ole qere ih sar." ¹² Takis wak danah os ole le luarakri Yon gumdeksi uriyeksi ko'rmeg. "Duak marak danah, am ig ge aregnah sénig?" ¹³ Yon ko'ragwa oko anaran, "Ag qarég takis wakri anak qe ih mangu os am aw qe é'urweg," eko anan. ¹⁴ Fan danah os ole ko'rmereg. "Am ig ge areg sénig?" Yon ko'ragwa oko anaran, "Ag danah aw keigarweg fa'areksi qarég marweg. Am ag danah aw yago' mareksi qarég oweg, ag kuak asilag noh mangu olag gamag asakwa os," eko anan. ¹⁵ Danahas ag Kristus† ameg

† 3:15 3:15 Kristus ge Mesaia. Tiwur danahas nusgur buliko diardigri danah toqoran.

méksi daréw, géri ag dahmak kuřum og. Qewa ge ag kunum olagwa ih ere dahmeg. “Yon nug Kristus qenan te?” éksi dahmeg. ¹⁶ Géri Yon danahas kunum kořlagwa oko anan. “Da lewa ih le luarina, gam geisah danah os da éřlak nug gagragsak ole uřirig. Da danah kena kawa am nug féř gařa darér kusqakri olele kawa. Nug Koulli Gunwa am kew ařikwa luardig. ¹⁷ Danah qe nug ifil kekuakri bawré de. Nug darweh owa reis mou ge, kepařko qagulko nug lougwa méřig. Gam reis gařa ge kew pi qouse ole qewa mandig,” eko anan. ¹⁸ Yon nug né la kuřumba danahas doulag patelle am Né Kena ole kusuan. ¹⁹ Gam sén Herod atu qe gumewew, Yon Herodri hipunin uřa kopatko gařa moran. Keřdi nug kamag waw Herodias kařurko am nug hipunin la kuřum os ole san. ²⁰ Am Herod nug hipunin nusig la os qe tuřurko sew kuak danah nusig Yon uksi kalabuswa yaneg.

Yon Yesus Le Louran

²¹ Sén Yon kalabuswa pi atak delle danahas kuřum le luarelle, Yesus ole le louran. Le lourak qe oko malako unuqorewew saw matlan. ²² Saw matlew ge, Koulli Gun kuhřil sillah Yesus dowanew am Tiwur fag saw karandi anan. “Na nir dasilnah. Da nasip ol mouse am ol gamag ase,” eko anan.

Yesus Algur Wenlag

²³ Sén Yesus makař nusig 30 keke qere dewew, kekuak nusig diguman. Danahas dahmeg ge nug Yosep nag éksi aneg. Yosep nug Heli nag. ²⁴ Am Heli nug Matat nag, am Matat nug Liwai

nag, Liwai nug Melki nag, Melki nug Yanai nag, Yanai nug Yosep nag. ²⁵ Am Yosep nug Matatias nag, am Matatias nug Amos nag, am Amos nug Nahum nag, am Nahum nug Esli nag, Esli nug Nagai nag. ²⁶ Nagai nug Mat nag, Mat nug Matatias nag, Matatias nug Semen nag, Semen nug Yosek nag, am Yosek nug Yoda nag. ²⁷ Am Yoda nug Yoanan nag, Yoanan nug Resa nag, Resa nug Serubabel nag, Serubabel nug Sialtiel nag, Sialtiel nug Neri nag. ²⁸ Am Neri nug Melki nag, Melki nug Adi nag, Adi nug Kosam nag, Kosam nug Elmadam nag, am Elmadam nug Er nag. ²⁹ Am Er nug Yosua nag, Yosua nug Elieser nag, Elieser nug Yorim nag, Yorim nug Matat nag, Matat nug Liwai nag. ³⁰ Am Liwai nug Simion nag, Simion nug Yuda nag, am Yuda nug Yosep nag, am Yosep nug Yonam nag, Yonam nug Eliakim nag. ³¹ Am Eliakim nug Melea nag, Melea nug Mena nag, Mena nug Matata nag, am Matata nug Natan nag, am Natan nug Dewit nag. ³² Am Dewit nug Yesi nag, Yesi nug Obet nag, Obet nug Boas nag, Boas nug Salmon nag, Salmon nug Nason nag. ³³ Am Nason nug Aminadap nag, Aminadap nug Atmin nag, Atmin nug Arni nag, Arni nug Hesron nag, Hesron nug Peres nag, Peres nug Yuda nag. ³⁴ Am Yuda nug Yakop nag, Yakop nug Isak nag, Isak nug Abraham nag, am Abraham nug Tera nag, Tera nug Nahor nag. ³⁵ Am Nahor nug Seruk nag, Seruk nug Reu nag, am Reu nug Pelek nag, Pelek nug Eber nag, Eber nug Sela nag. ³⁶ Am Sela nug Kainan nag, Kainan nug Arpaksat nag, Arpaksat nug Sem nag, am

Sem nug Noa nag, Noa nug Lamek nag. ³⁷ Am Lamek nug Metusela nag, Metusela nug Inok nag, Inok nug Yaret nag, Yaret nug Mahalalel nag, Mahalalel nug Kenan nag. ³⁸ Am Kenan nug Inos nag, Inos nug Set nag, Set nug Adam nag, Adam nug Tiwur nag.

4

Nou Memeg Yesus Qepian

¹ Yesus Yordan le minko atew, sén qewa Koulli Gun nug owa olele morew dessa Yesus omalko atu meirak danah kawawa atan. ² Omalko atew ge, Yesus der 40 qere dewew, nou memeg* qepian. Am sén qewa Yesus nug kité ospi lan, géri der qe malwew ge nug laké qan. ³ Qew ge, nou memeg Yesusri anan, “Na Tiwur Bega daka pe, qar ene anwe ke buliar,” eko anan. ⁴ Anew ge, Yesus anan, “Tiwurdi Né yakwa ane, ‘Danahas kewa ih fou pi dasi,’ ” eko anan. ⁵ Anew ge, nou memeg Yesus omalko atu qoukuwa teko usihri Yesus wan atu kunum ismuran. ⁶ Ismurko anan, “Da na gagragsak mirwi wan atu e kunum gumdip am da séwi binam naí ole darip. Kerdi keke ene kunum ge da mirak. Qeri da danah os murdildi ge da murdil. ⁷ Qeri na da nolwa duk noka binal mérip ge keke kunum nasip darig,” eko anan. ⁸ Yesus kořewa oko anan. “Tiwurdi Né yakwa ane, ‘Na Nařinah nasip Tiwur ih binag me am kallowa da,’ ” eko anan. ⁹ Anew ge, nou memeg Yesus omalko Yerusalem atko sew Tiwurdi Lo

* 4:2 4:2 Satan

koŕgo karannah qewa tew anoran. Na Tiwur Bega daka pe, olka wanap no. ¹⁰ Keŕdi Tiwurdi Né yakwa ere ane, “Tiwur doup nusgur anew na dahmireksi koutorlag.” ¹¹ Ag ewlagwa na urwirlag géri na fén qar ospi yew, eko anan. ¹² Anew ge, Yesus koŕewa oko anan, “Tiwurdi Né ane, ‘Na Naŕinah Tiwur nasip aw mena pewen,’ ” eko anan. ¹³ Nou memeg nug ih kuŕumba Yesus qepian malako ge, Yesus munurko am sén os qeperigri ameg man.

Yesus Kuak Nusig Galili Diguman

¹⁴ Sén qewa Koulli Gundi gagragsakwa Yesus buliko Galili atu qewa atko dian, am nug nei-hwah atu qe kunumba tualan. ¹⁵ Nug Yuda dilag binag mak lo kuŕumba danahas Tiwurdi Néri duak mardé. Danahas kuŕum nug binag sumdéw.

Yesus Kawag Diguwa Né Kusuan

¹⁶ Yesus nug nir nagurwa delle kena man ole kaw Nasaret qewa atan. Am nug Sabatwa sansan seré sillah Yuda dilag binag mak lo owa noko, Tiwurdi Né ewqerigri asan. ¹⁷ Asew ge, binag mak lori kuak danah profet Aisaiari Né yak qe nug moreg. Morweg kolako ge, né os ere anko yak qe mariko peko ewqan. ¹⁸ “Naŕinahri Koulli ge dagnéwa de. Keŕdi nug da danahas o duak agop Né Kena kusurildi kurulwa goŕen gogoŕko toqíran. Tiwur nug da Né Kena qe kuswelle danah kalabuswa qagrakwa dasi qe da séwi kusqak olagri am danah amlag gaŕu qe séwi bulieksi aminlagri meifew uŕiyin. Tiwur nug da danah kug owa dasi qe séwi kusqak olagri

meifew uriyin. ¹⁹ Am sén uriyew, da Narinah danahas nusgur buliko diardigri né qe kusurildi meifew uriyin.” ²⁰ Ewqeko malako ge, Yesus Né yak qeko buliko kuak danah qe morko, am nug Né digu kusurigri dian. Dewew ge, danahas kunum Yuda dilag binag mak lowa deg qe amlag atew nug ke’ eko anew dolagri kittureksi deg. ²¹ Am nug digumeko Né ewqan qe kusuan. “Gei Tiwurdi Né ewqewi iril duéw ene meřenah bé,” eko anan. ²² Danahas kunum dueksi nug binag sumeg. Ag nug kořewa né kenanah ban qeri dahmak kuřum ossi am aneg. “Danah uni Yosep nag, gam areg?” éksi aneg. ²³ Qere anweg ge, Yesus anan. “Meřenah, ag geisah nun né dasil ene anlag. ‘Dokta, na nagégé férún sewe pasaorar. Kowol are na Kapernaum sewe ig duet ole qe ih na kawan diguwa ewa ole qere se,’ éksi anirlag.” ²⁴ Qere anařelle anan, “Da meřenah amlagwa anina. Profet nug kawag diguwari danahas ag nug pi sumursi. ²⁵ Am da ag amlagwa anina. Elaisari sénwa saw megalko gu kawa makař kiam am kalam 6 qere laké naři Israel atu kunumba nian. Sén qe as qehřas kuřum Israel daréw. ²⁶ Gam Tiwur nug Elaisa mew Israel as qehřas usih os kéhnurdigri pi atan. Nug Elaisa mew Sarefat Saidon† atu qewa as qehřas os kéhnurdigri atan. ²⁷ Qe sillah sén profet Elisari sénwa Israel danah kuřum lepra waře ole daréw. Gam olagwa Elisa danah usih os waře nusig qe pi sew kawa man. Gam Naman Siriarer‡ qe ih sew

† 4:26 4:26 Sarafet kaw am Saidon atu ge Yudia atu kawa.

‡ 4:27 4:27 Siria ole Yudia atu kawa.

pasaoran,” eko anan. ²⁸ Qere anew ge, danah Yuda dilag binag mak lowa deg ole ge né qe dueksi olag uhri nounah ban. ²⁹ Uhfilag bew aseksi, Yesus berweksi kawlag qoukuwa de qe dougwa waneg. Waneksi qouku sékuwa béwa tourweg nurigri qere seg. ³⁰ Gam qer seppeg, nug buliko gamlagwa wanko ole ih nusig oko atan.

Yesus Koulli Nou Gerdan

³¹ Dimba ge, Yesus Nasaret minko noko Galili atu qe owa Kapernaum qewa atan. Qewa atko ge, Sabat der oswa ge Yuda dilag binag mak lo owa danahas Tiwurdi Né ismaran. ³² Ismarew ge, ag nusig né qe dueksi dahmak kuřum og, kerdi né nusig ge gagragsak am kuakri wittak ole. ³³ Am danah os féruwa koulli nou ole Yuda dilag binag mak lowa qewa dian. Nug qalko urwan. ³⁴ “Ei! Yesus Nasaretrer, na ig ker sigripri uriyam? Na sewe ig paral ménigri te uriyam? Da na duirina. Na Tiwurdi Gun Danah,” eko uruko anan. ³⁵ Uruko anew ge, Yesus koulli nou qe gagrag anoran. “Na torka danah qe paroka beka eit.” Qere anew ge, koulli nou danah qe parwurko beko atelle, tourew danahas nolagwa atko qewew beko atan. Gam nug gurak ospi moran. ³⁶ Danahas kunum dořlag new, ag agégé né marieksi aneg. “Uni ge ker nénah? Nug kuakri wittak ole am gagragsak olewa koulli nou né mare. Qeri ag dueksi ole parwureksi atsi,” éksi aneg. ³⁷ Qewa ge, Yesus neihwah Galili atu kunumba tualan.

Yesus Pita Numia Sew Waře Pasaoran

³⁸ Yesus Yuda dilag binag mak lo qe minko danah os wénih Saimon lougwa atan. Qewa ge Saimon numia féru gagrak narinah doko niewew, Yesus waře qe sew pasaurdigri anoreg. ³⁹ Géri nug wanko duk noko delle waře gaıra morew ge, as qe waře pasaoran. Pasaorew ge, as qe usihri asko ke asilag bawardigri dian. ⁴⁰ Kem nowew ge, danahas leilgar waře digu kowol kowol ole qe diaressi Yesus dowa uřiyege. Uřiweg ge, nug danahas kunum waře asilag usih usih qere feřlag ořwelle kunum ole sew pasaoreg. ⁴¹ Am qe ih kawa, koulli nou danahas kuřum pařwaressi atessi ole Yesusri uřweg, “Na Tiwur Bega!” éksi aneg. Gam nug gaıra marew kořlag qamtekxi né ospi mariege. Keřdi ag duege ge nug Křistus. ⁴² Kuagřewew ge, Yesus awen os danah kawawa unuqurdigri atan. Atege ge, danahas nug marieksi atessi peg. Peksi ge, nug minarko atewri dagoreg. ⁴³ Gam nug anan, “Da Né Kena Tiwur danahas nusgur dilag king delle gumare né qe§ kusuwi kaw lalawa ole dolag. Keřdi da kuak qe sérildi anew uřiyin,” eko anan. ⁴⁴ Qewa ge, nug Né Kena kuswelle, Yuda dilag binag mak lo kuřumba Yudia atu owa weiré.

5

Yesus Nug Béguř Digumeko Diaran

¹ Deř os Yesus Genesareř le koře kawa řanwa asko dewew, danahas kuřumnah nug Tiwurdi Né mariew dolagri omoreksi deg. ² Deppeg nug řanwa kuh ařit os deppes piatan. Sén qewa, kaké

§ 4:43 4:43 Qe ge Tiwurdi Kingdom.

wak danah ag kuh minatweg deppes usu isaressi deppeg piaran. ³ Yesus nug olko kuh oswa tan, kuh qe Saimonri. Teko Saimon kuh nakok bitlew řan minko lewa nurigri amegwa anan. Now ge, Yesus kuhwa delle danahas doulag patan. ⁴ Nug doulag patko malako ge, Saimonri anan. “Kuh palniwe nagur le gamagwa wanew, usu kaké wakri pařwarweg nos,” eko anan. ⁵ Anew Saimon kořewa oko anan, “Danah naři, ig tuřan usu touřehut kuagré, gam kaké ospi wam. Gam na anam qeri usu buliko pařwarwi nolag,” eko anan. ⁶ Qere séksi ge, kaké kuřumnah diarweg usu tatařlag seg. ⁷ Qere sew ge, leilgar kuak usih kuh oswa deg qe dolagri ewta qarweg, duksi keh narweg beřweg. Beřwarweg beweg ge, kuh ařit olele kaké yanweg ambew, torieksa lewa nolasri ses. ⁸ Sén Saimon wénih os ge Pita qere peko ge, unaka Yesus fégwa gatewa yako duk noko ge anan. “Nařinah, da hipunin danah. Qeri na da pařwilka eit,” eko anan. ⁹ Keřdi nug leigur kunum ole kaké huhak diareg qe peksi dorlag nan. ¹⁰ Saimon leikuř Yems, Yon ole Sebedi békuř qe a ole dorlas nan. Géři Yesus Saimonri anan, “Na aw fařwen. Na gei digumak danah diardip,” eko anan. ¹¹ Qere anew ge, kuh beřwatweg řanwa tewes, ken kunum mineksi ge, Yesus dimlamdeg.

Yesus Danah Os Lepra Waře Ole Sew Pasaoran

¹² Sén os Yesus nug taun oswa dewew, danah os féřu kunum lepra waře ole qe gumurko duan. Nug doko Yesus peko ge, gatewa yako duk noko Yesus nuqurko anan. “Nařinah, na

ot sew pe, na da féruwa waře ene sewe kena mar,” eko anan. ¹³ Anew ge, Yesus eweg tiorko danah qe féruwa meko anan. “Da ol de. Waře nasip pasaorar,” eko anew ge, usihri lepra waře qe mundan. ¹⁴ Qe dimba, Yesus danah qe gagrag anoran, “Na danah os amegwa awnah anwen. Mosesri Ró yakwa ane qe sillah atka férun pris* os ismureнна am doř os oka mor. Qeri danahas kunum dolag na waře nasip sew pasaoran,” eko anan. ¹⁵ Gam Yesus neihwah qe atu kuřumba tualan. Tualew dueksi ge, danahas nusig né dolagri am waře asilgar kusuqko mardigri kuřumnah uřiyeksi qagleg. ¹⁶ Gam Yesus sén kuřum minarko atko awen danah kawawa delle unuqordé.

*Yesus Danah Eweg Fég Mousak Ole Sew Pasao-
ran*

¹⁷ Deř os Yesus danahas doulag patelle dewew, Farisi os am Mosesri Ró duak danah ole qewa deg. Ag kaw kuřumbari Galiliri Yudiari am Yerusalemri ole uřiyeg. Am Tiwurdi gagragsak waře danah sew pasaorakri qe Yesus dowadian. ¹⁸ Sén qewa danah os ag danah eweg fég mousak ole os qarqarwa méksi maweg. Ag maweksi lo owa nuksi Yesus nohwa melagri seg. ¹⁹ Gam danahas kuřumnah, géri awen amban. Ambew ge, waře danah qe ukxi owa nolagri seg, gam ih ospi peg. Géri qarqar ole maweksi lo kořgowa teg. Téksi ge, lo kořgo siřeksi oře qewa qarqar ole pařoweg now danahas gamlagwa

* **5:14** 5:14 Tiwur am danahas ole gamlagwa Tiwurdi ofa mak danah

Yesus nohwa meg. ²⁰ Meweg ge, Yesus olag meře mak qe peko anan. “Lal, hipunin nasip kusqém,” eko anoran. ²¹ Anew ge, Ro duak danah am Farisi agégé né kuřum marieksi aneg. “Danah uni nug kér danah qeri Tiwur pihlure? Danah ounté la os hipunin kusuqrigri olele kawa. Qe Tiwur nugé nusig kuak,” éksi aneg. ²² Yesus asilag dahmak qe duan, géri amlagwa anan, “Ag keřdi olagwa dahmak qere usi? ²³ Keř né andil qe kug kawa? ‘Hipunin nasip kusqém,’ te kawa ‘Na aska wei,’ eko andil qe te kug kawa? ²⁴ Gam ag ere dolag. Tiwur nug Danah Bega wan enewa hipunin kusuqrigri kepařko kuakri wittak moran,” eko anan. Yesus buliko ge danah eweg fég kunum mousak ole qe amegwa anan. “Na aska qařqař nasip oka mouka ole louw eit,” eko anoran. ²⁵ Anew ge, usihri danah qe nolagwa asan. Asko qařqař nug nian ole qe oko mouko, Tiwur binag sumelle lougwa atan. ²⁶ Qeri danahas kunum dorlag new Tiwur binag sumessi am ag Tiwurdi gagragsak fařdeksi aneg. “Ig gei kowol founah os piam,” éksi aneg.

Yesus Liwai (Matiu) Keřan

²⁷ Qe dimba ge, Yesus atko takis wak danah os wénih Liwai† takis wak lowa dewew pian. Peko ge, amegwa anan, “Na doka da dimlamir.” ²⁸ Qere anew ge, Liwai keke kunum minelle asko Yesus dimlamdan. ²⁹ Dimba ge, Liwai nug lougwa Yesusri ke naři san. Sew ge, takis wak danah kuřum am danah la os ole a ole

† 5:27 5:27 Wénih os ge Matiu.

ninaqíreksi dessi ke qe leg. ³⁰ Gam Farisi am Ró duak danah Farisi dilag ag dougwa piareksi deg qe aseksi Yesus bégur agop né né kuřum marieg. “Ag takis wak danah am hipunin danah la ole ke am le ole ospi lelew sillah,” éksi aneg. ³¹ Anweg ge, Yesus amlagwa anan, “Danahas waře kawa ge dokta dow a pi atsi. Gam danahas waře ole qe ih dokta dow a atsi. ³² Da danahas mangu diardildi pi uřiyin. Gam da hipunin danahas anwi olag bulirigri uřiyin,” eko anaran.

Kurniak Kowoldi Yesus Kořmoreg

³³ Sén qewa, danah qe Yesus ere amegwa aneg. “Le Luarak danah Yon bégur ge sén kuřum kurdessi unuqursi. Am Farisi begalgar ag ole qere sési. Gam na begpar ge qere ospi sési ag ke le ole lési,” éksi aneg. ³⁴ Géri nug né tonak ene anaran, “Danah os as owew, ag nug leigur ke gun marlag olele te? Sén nug qe ole deppeg, kawa. ³⁵ Gam dimba geisah danah qe uksi atlag, géri nug foula leigur ole pi daweg. Sén qewa ge, leigur qe ke gun melag,” eko anaran. ³⁶ Yesus nug né tonak os anaran. “Danah ounté nug lamén fou ge parilko saríh nagur os oko am lamén alag oře pi titie. Am danah os qere sérig ge, nug lamén fou qe sew nou mérig. Am lamén saríh fou qe lamén alag qe ole amnak usíh kawa. ³⁷ Am danah ounté os nug wain fou bawrak le witakri doř gařa alagwa pi yane. Am danah os qere sérig ge, wain fou doř gařa parilko wain wanwa gogořdig. Am wain fou doř gařa le witakri qe ole sew nou mérig. ³⁸ Danah nug wain fou ge doř gařa fouwa ih yanar. ³⁹ Am danah nug wain

alag tatam le ole ge, nug wain fou bawrak qeri ospi sew. Nug ane, 'Wain alag ge kena,' " eko anan.

6

Sabat De'rdi Ko'rmak

¹ Sabat de'rdi oswa Yesus bégur ole reis dar owa nuksi ateg. Atessi ge, nug bégur reis qieksi ewlagwa mou o'roleksi damqéksi leg. ² Qere seweg ge, Farisi os piareksi ko'rmareg, "Sabat de'rdi qere sakri ge gun, gam ag ke'rdi qere séw," éksi ko'rmareg. ³ Yesus Farisi ko'rlagwa oko anan, "Ag Dewit danah nusgur ole laké aqarew seg qeri, Né yak nie ge ospi te ewqéksi dosi?" ⁴ Dewit Tiwur Loug owa noko, Tiwur nohwari ke beret qe wan. Beret qe gun, danah balbal kunum dilag kawa, pris* dilag mangu. Gam Dewit nug beret qe leko am danah nusgur qe ole marew leg. Ag Né yak qe ospi te ewqeg?" ⁵ Yesus buliko anaran, "Danah Bega nug Sabat de'rdi gume," eko anaran.

Yesus Sabat De'rdi Kekuan

⁶ Sabat de'rdi oswa Yesus nug Yuda dilag binag mak lowa noko danahas Tiwurdi Néri duak maran. Am danah os eweg kenari mousak ole qewa dian. ⁷ Ro duak danah am Farisi os ole ag ke'rdi ihwa os Yesus yago'rdi morlagri ih marieg. Géri ag Yesus Sabat de'rdi wa're danah kusqarew pelagri ka'féordéw. ⁸ Gam Yesus asilag dahmak qe iril duan. Doko ge, danah eweg mousak ole qe amegwa anan. "Aska danahas gamlagwa sirka

* **6:4** 6:4 Tiwur am danahas ole gamlagwa Tiwurdi ofa mak danah

da,” eko anoran. Géri danah qe asko sirko dian. ⁹ Dewew ge, Yesus koómaran, “Ag dosi ge, kowol are ge *Ó*o dimlamdak? Ig Sabat deérwa danah kowol kena te sarnig, kawa ig gurak te marnig? Ig danah kena dalagri te kehnarnig, kawa ig danah sarhut paral te melag?” eko koómaran. ¹⁰ Nug amnew weiyew danah kunum piarko ge, danah qe anoran. “Ewen tior,” eko anoran. Anew danah qe qere sew ge, eweg sew buliko pasaorko koutoran. ¹¹ Gam ag uhrílag bew ge, ag Yesus aregnah sorlagri qe ag agéagé marieg.

Yesus Aposel 12 Qere Kepráran

¹² Qe dimba sén os ge, Yesus Tiwurdi unuqur-digri qoukuwa tan. Teko ge, tuqan usih qe unuqorelle dewew kuagrán. ¹³ Kuagréw furuwa ge, nug bégur anew qagleg. Qagulweg ge, nug 12 qere kepráрко ag wenlag aposel† maran. ¹⁴ Os ge wénih Saimon, Yesus wénih Pita katrán. Am Endru, nug Saimon kamag. Yems am Yon ole. Am Filip, Batolomiu ole. ¹⁵ Matiu am Tomas ole. Am Yems nug Alfius nag. Am Saimon, nug Silot danah ameg qewari. ¹⁶ Am Yudas, nug Yems nag. Am Yudas Iskariotrer, nug dimba geisah Yesus kegeé ewlagwa mérig.

Yesus Danahas Doulag Patelle Am Kusqaran

¹⁷ Yesus Bégur 12 ole nuksi ge, nug wanko wan uémbe asko dian. Nug bégur kuóumnah ole deg. Am danahas kuóumnah Yudia atu kunumbari am Yerusalem taun qewari am Tair, Saidon

† **6:13** 6:13 Danah os Yesus nugégé toqarko meé arew kekuak nusig séksi ateg ole qe. Aposel ge Yesusri meé danah.

ole ránwari qe kunum ole deg. ¹⁸ Ag nusig né dolagri am nug feřlagwa waře kusuqřigri ole uřiyeg. Danahas koulli nou sarew nou marak ole ge, Yesus kusqaran. ¹⁹ Yesusri gagřagsak wanko danah kunum kusqaran, qeri danahas kuřumnah nug féru ořalagri seg.

O Duak Danah Olag Gamag Asdig

²⁰ Yesus nug bégur piarko delle anaran, “Danah ag gei o duak dasi, ag olag gamag asar. Keřdi Tiwurdi kingdom ge asilag. ²¹ Danah ag gei laké dasi, ag olag gamag asar. Keřdi dimba Tiwur sew ag kutuk ospi meweg. Danah ag gei kunnessi dassi, ag olag gamag asar. Keřdi dimba ag imlag. ²² Ag Danah Bega dimlamdeppag, qeri séksi danah ag kegeř maressi uksi uksi aqsi am geřaressi am wenlag seweg nou mew ge, ag olag gamag asar. ²³ Ag asilag qere seweg pe, ag sén qewa gamlag asakwa olessi des. Keřdi qe noh asilag saw kappa ge nařinah. Algu alalgar profet‡ dilag ole qere seréw. ²⁴ Gam danah keřlag ole ag kug os pelag. Ag keke sew olag kena diakri iřil oweg olele moran. ²⁵ Danah gei ke léksi koutursi, ag kug os pelag. Ag dimba laké aqardig. Danah ag gei imsi, ag ole geisah Tiwurdi uhřibak pelag. Dimba ag olag nou mew kuanak naři selag. ²⁶ Ag danah kunum binlag sumbeg ge, ag kug os pelag. Algu alalgar profet darmak dilag ole qere seréw,” eko anaran.

Kegeř Asilgar Dilag Olag Mousar

‡ **6:23** 6:23 Tiwurdi né oko mariak danah

²⁷ Yesus doulag patelle anaran. “Gam ag né dasil dosi ole ag anarina. Ag keger’ asilgar dilag olag mousar. Danah os kowol nouni sarweg ge, ag kowol kena sares. ²⁸ Ag danah os wittak nou marweg ge, ag Tiwur kořmorweg wittak kena marar. Am danah nouni sarweg ge, ag asilag unuqores. ²⁹ Danah os na siwen leis ge korew pe, leis ole buliwe korar. Am danah os lamen nasip ow ge, minwe kasuk nasip qe ole war, aw gagansi owen. ³⁰ Am danah os na kekeri kořmirew ge, na mor. Am danah os nasip keke ow ge, na buliko mirdigri wagé meka aw sewen. ³¹ Danah la ag kowol kena sarlagri olag nie qe sillah, ag ole qere sares. ³² Ag danah asilag olag mouse ole qe dilag ih olag mousew pe, oun ge ag danah kena eko anardig? Hipunin danah ag ole danah are asilag olag mouse ole qe dilag ih olag mouse. ³³ Am ag kowol kena danah os asilag sési ole qe dilag ih seweg pe, oun ge ag danah kena eko anardig? Hipunin danah ole ag kowol qere ih sési. ³⁴ Am ag danah keke marsi qe noh marlagri olele duessi marweg pe, oun ge ag danah kena eko anardig? Hipunin danah ole ag hipunin danah leilgar keke marsi qe ag keke noh olele bulieksi marlagri duessi marsi. ³⁵ Gam ag keger’ asilag dilag olag mousar am ag nouni aw sarweg. Ag keke mareksi am noh olagri aw dahmeweg. Ag qere seppeg ge, ag noh naři mardig am ag Tiwur Karannah bégur dalag, kerđi nug danah nou am danah keke marew kena sam éksi pi ansi qe ole nouni pi sare. ³⁶ Ag danah dilag olag duar, Memlag Tiwur o duak nie ole qe sillah.”

Ag Leilgar Aw Kep'arweg

³⁷ “Ag danahas dilag kowol nou aw kep'ressi am nou arweg. Qere seweg ge, Tiwur ole asilag qere sérig. Ag danahas kowol nou asilag noh olagri aw anweg. Qere seweg ge, Tiwur ole asilag qere sérig. Ag danah os nouni sarweg ge, hipunin asilag kusugqeg, Tiwur ole asilag hipunin kusugrig. ³⁸ Ag danah la qe keke mares am Tiwur geisah ag keke mardig. Geisah Tiwur keke yanew ambeko letewew mardig. Ag keke gane danah marsi qe sillah Tiwur ag ole mardig,” eko anaran. ³⁹ Anko ge, Yesus né tonak os ole amlagwa anan. “Danah os ameg garu nug ameg garu lia omaldigri olele te? Kawa, geisah a olele tolweksa morwa nolas. ⁴⁰ Sulnir nug duak nusig duak morak danah nusig pi érde. Sulnir are nug duak morak danah nusig dowari duak kunum oko malako ge, duak morak danah nusig qe sillah bérig. ⁴¹ Areg na liap amegwa kinkak nagurnah de qeri aminna? Gam na amenwa ker masa nafi de ge, pite dahmorna? ⁴² Na nagégé amenwa ker masa nafi de ge pite penna am areg liap anorna, ‘Lal, da na amenwa kinkak nagurnah de ge uril seina.’ Na darmak garanwa ih Tiwur dimlamdak danah! Na tatam na nagégé amenwa ker masa nafi ge oka, amen kena mew aminka koutorka ge, na kinkak nagurnah liap amegwa de qe uripri olele.”

Ker Am Mou Ole

⁴³ “Ker kena nug mou kena nie. Qe sillah ker nou nug mou nou nie. ⁴⁴ Danah ag ker mou tatam peksi ge, ker qe kena te, ker qe nou te ge ag

dosi. Danah ag gu'raw mou darér qoum olewari pi usi. Am ag peipé mou ker nagurnah qoum olewari pi tuqsi. ⁴⁵ Danah kena nug dahmak kena ku'rum owa nie. Qeri nug kowol kena se. Qe sillah danah nou nug dahmak nou ku'rum owa nie. Qeri nug kowol nou se. Ke'rdi nug dahmak nou owa ambak nie qe, ko'ewa bew ane."

Lo Fuakri Kowol A'rit

⁴⁶ "Ke'rdi ag dasil 'Na'rinah, Na'rinah,' éksi ansi, gam ag da ko'el ospi dimlamursi? ⁴⁷ Danah os da gumirko doko, am da fal doko dimlamurdig ge, da kowol nusig qe mariwi ag dolag. ⁴⁸ Nug danah os lo fuan qe sillah. Tatam ge, nug mo' pesorko oko, wandor lagko kétum qeko koutorko ge lo fuan. Dimba le kue neko lo qe yepian, gam qiakri olele kawa. Ke'rdi nug fuko koutoran. ⁴⁹ Am danah nug da fal doko pi dimlamde ge, nug danah os mo' oko, wandor diguwa kétum pi qak lo fuan qe sillah. Géri dimba lo qe le kue neko yepew ge, qiko neko ole kadurko nou meko koutoran," eko anaran.

7

Yesus Fan Kuriri Kekuak Nir Sew Pasaoran

¹ Sén Yesus nug danahas né qene marko malako ge, nug Kapernaum taunwa atan. ² Qewa ge, Romdi fan kuri danah nug kekuak nir os ole daré. Kuak nir qeri o na'ri niré ole qe wa're meko mousdigri malwak nian. ³ Fan kuri danah nug Yesus qewa dian né qe doko ge, nug Yuda dilag kuri danah me'arew ateg. Ateksi ge, Yesus amegwa anweg u'riko kuak nir nusig qe sew

waře pasaurdigri anoreg. ⁴ Yesus dow a teksi gagragnah ere aneg, “Danah qe kenanah. Na kéhnurdipri olelenah. ⁵ Nug ig Yuda isanig o niew binag mak lo isanig fuan.” ⁶ Géri Yesus ag ole ateksi, fan kuri danah qe loug mourak waneppege, nug leigur os meřarew Yesusri né uksi ateksi ere aneg. “O nařinah, na aw kekuak naři sewen. Na da loul owa neripri olele kawa, keřdi da danah kenanah kawa. ⁷ Qeri da duina ge, da na gumirko wanakri olele kawa. Na qere denna am né ih anwe, dasil kekuak nir waře pasaorar. ⁸ Keřdi da ole danah wénih ole kekuak miře qe kallowa deina. Am da ole fan danah os da kallolwa dasi. Am da usih os amegwa anina, ‘Na eit,’ eko anwi ge, nug ate. Am da la amegwa anina, ‘Na doka,’ eko anwi ge, nug do. Am da dasil kekuak nir qe amegwa anina, ‘Na kekuak ene se,’ eko anwi ge, nug qe se.” ⁹ Sén Yesus né qe doko ge, danah qeri o meře mak peko wawtuřko ole o gamag asan. Asew ge, nug buliko danahas ameg naři dimlamdeg qe anaran, “Da ag anarina. Israel olagwa danah usih os o meře mak ere ole ospi pégin.” ¹⁰ Qe dimba, fan kuri danah leigur meřarew ateg ge, bulieksi louw uriyeksi, kekuak nir qe iril sew pasaoran peg.

Yesus As Qehřas Nag Os Mousew Buliko Qaqran

¹¹ Nagur dimba Yesus taun os wénih Nain qewa atan. Nug bégur am danahas ameg naři qe ole nug dimlamdeg. ¹² Nug atko taun ihřam naři qe mourak wanewew ge, danah mousak os mawessi

dog. Danah mousak qe anig nug nag usih qe ih ole am nug as qehrás. Danahas ameg nañi taun qewari asessi as qe ole arié dog. ¹³ Nañinah nug as qe peko ge, o nañi dow, nug as qe amegwa anan. “Na aw kuanwen.” ¹⁴ Qere anelle ge, unaka wanko danah mousak nian ole qarqar qewa eweg man. Eweg mew ge, danah qarqar maweg qe asessi deppeg, Yesus anan. “Nir geir, da anirina, na as,” eko anan. ¹⁵ Anew ge, danah mousak qe buliko asko delle ge, digumeko né marian. Yesus nir qe parwew anig dowa wanan. ¹⁶ Géri danahas kunum faéksi nou méksi Tiwur binag meg. Ag aneg, “Profet nañi os onigwa bé. Tiwur danah nusgur kehnardigri uríé,” éksi aneg. ¹⁷ Danahas Yesusri né qe Yudia wanwa am atu lala talilorak nie qe kunumba mariweg tualan.

Yesus Am Le Luarak Danah Yon Ole

¹⁸ Yon nug bégur ag keke kunum dueg am peg qe nug amegwa anweg, nug békur arít urwatan. ¹⁹ Nug Nañinah ere kořmorlasri anew ates. “Na enan te Tiwur uriripri anan, kawa ig danah la te ameg ménig?” ²⁰ Sén danah arít qe Yesus dow ateksa ge, amegwa anes. “Le Luarak danah Yon anew i na kořmirnitti gumdekru uriah. Nug ere ané, ‘Na enan te Tiwur uriripri anan, kawa ig danah la te ameg ménig?’ ” eksa kořmores. ²¹ Sén qewa ih Yesus danahas kuřum waře digu digu ole sew pasaoreg am koulli nou danah feřlagwari kuřum geřaran. Am danah amlag gařu ole kuřum sew amlag kena mew bulieksi amneg. ²² Am danah arít qe amlaswa anan,

“Bulieksa ateksa Yon keke piap am duap ole qe amegwa anes. Amlag garu ge bulieksi aminsi, félag mousak ge bulieksi weisi, lepra danah ge féflag buliko pasaore, doulag itwak ge bulieksi né dosi, danah mousak ge bulieksi assi, am o duak danah ag Né Kena dossi. ²³ Am danah os o mére mak gagrag dewew da pi dimirdig ge, Tiwur nug wittak murdig.” ²⁴ Danah arit Yonri né oksa uries ole qe mundeksa atwes ge, Yesus digumeko danahas amlagwa Yonri anaran. “Ag awen danah kawawa kérnah pelagri Yon gumdeksi ateg? Ag ulas qawer os orwew ulle qe te pelagri ateg? ²⁵ Kawa ge, ag ker qewa pelagri ateg? Ag danah bala kena ole te pelagri ateg? Kawa, danah bala kena kena mési am danah kehlag ole qe king lougwa dasi. ²⁶ Gam ag ker pelagri ateg? Ag profet te pelagri ateg? Yo, da amlagwa anina. Nug profet la kunum érarak. ²⁷ Danah Yon eneri ih Tiwurdi Né yakwa ane. ‘Da dimba geisah mer danah dasil méwi atko na nom oko anuqko nasip ih bawardig.’ ²⁸ Da ag amlagwa anina. Yon nug danah wanwa dasi qe kunum érarak. Gam danah nug Tiwurdi Kingdomwa nagurnah de qe nug Yon érdak,” eko anaran. ²⁹ (Danahas kunum takis wak danah ole Yesusri né dueksi olag usihwa “Tiwur ge mangunah,” éksi dahmeg. Kerdi ag atweg Yon le luaran. ³⁰ Gam Farisi am Mosesri Ro duak danah ole Tiwur ag ih ismaran qe dimoreg, kerdi ag Yon le luarak mineg.) ³¹ Yesus buliko anaran. “Da ker né tonakwanah os danahas geiri ismardil? Kowol asilag ge aregnah? ³² Ag nir nounu sillah. Kaw gamagwa dessi nir nounu la urwaressi dasi

sillah. 'Ig asilag dumдум yaltu ge, ag kasi sak minéw. Am ig ginanig kuktu irtu, gam ag kuanak minéw,' éksi ansi. ³³ Le Luarak danah Yon nug uríyan am nug ke wain ole ospi leré. Qeri ag aneg, 'Koulli nou nug féruwa de.' ³⁴ Danah Bega uríyan, nug ke wain ole lewew, ag ansi, 'Danah ene pes. Nug ke wain ole narínah lelle de. Nug takis wak danah am hipunin danah ole liam patak dasi,' éksi ansi. ³⁵ Gam danahas Tiwurdi duak usi ole kowol asilagwa ismigsi ge, duak qe keke mérenah," eko anan.

Hipunin As Yesus Fég Gořenwa Wařwuran

³⁶ Farisi os nug Yesus ole ke lelasri anew ge, Yesus Farisi qe lougwa atko ninaqırko dian. ³⁷ Hipunin as os taun qewa daré. Nug Yesus Farisi qe lougwa ke lelle dian né qe doko ge, nug gořen murdig kenanah ole siné ambak oko uríyan. ³⁸ Sén nug wanko Yesus dimugwa fég mourak kunnelle dewew ge, amrı gogoırko noko Yesus fég lourew ge, kuri urugwa urtian. Urtielle ge fég kis morko gořenwa fég wařwuran. ³⁹ Farisi Yesus nug lougwa uríyan ole qe, kowol qe peko ge, owa ih anan. "Danah uni nug profetnah wen, nug as uni keř as nugnéwa eweg me qe dolo am nug as qe hipunin as qe ole dolo." ⁴⁰ Géri Yesus nug danah qeri dahmak doko ge, amegwa anan, "Saimon, da né os ole na amenwa andildi." Anew ge, Saimon anan, "Aria, duak marak danah, né nasip ge an." ⁴¹ Yesus anan, "Danah arıt os ateksa danah qarég ole qe dowá waneksa qarég os anwes matan. Danah os ge anew 10,000 kina moran am danah os ge anew

100 kina ih moran. ⁴² Danah arít qe qarég qe buliko morakri olele kawa, géri danah nugnéwa qarég os ole qe nugégé kug asilas qe duew doug katian. Qeri danah arít qe olaswa oun nug danah qe o kunum ole murdig?" ⁴³ Saimon anan, "Arté, danah qarég nafi wan ole qe." Yesus amegwa anan, "Né noh nasip qe mangu." ⁴⁴ Am Yesus buliko as qe peko delle ge, Saimon amegwa anan. "Na as ene pena te? Da na lout owa ném, am na da fél isdilri le ospi mirám. Gam as ene ge nug amfiwa fél uhru oko am kuri urugwa urtié. ⁴⁵ Na da kis ospi mirám. Gam sén da owa ném am uriyew geisah e patak as ene da fél bulibuli kis moré. ⁴⁶ Na ig kounigwa da kurulwa oliw gořen nagur ospi warwuram, gam as ene gořen murdig olewa da fél warwuré. ⁴⁷ Qeri da na amenwa anina. Nug o narinah mire, qeri da hipunin nusig kurumnah kusqém. Gam danah os nug hipunin nagur se eko ane qe kusuqwi ge, nug o nagur ih mire." ⁴⁸ Qe dimba Yesus as qe amegwa anan, "Hipunin nasip kusqém." ⁴⁹ Danah nug ole ke lessi deg qe agégé nug kormorew wane morew duak séssi aneg, "Danah ene ounnah qeri nug hipunin kusqe?" ⁵⁰ Yesus as qe amegwa anan, "Na dasil ot mére mé qewa buliko wirém! Na aska ot kenawa ih eit," eko anan.

8

As Os Yesus Dimlamdessi Weiyeg

¹ Qe dimba nagur os dessi ge, Yesus taunwa am kappa ole weiyelle Tiwurdi Né Kena kusuko

anan. “Tiwur danahas nusgur dilag king delle gumardigri sén uríyé.” Nug Bégur 12 qe am as os ole arié ateg. ² As qe tatam Yesus koulli nou ferlagwari geʼaran am waʼe ole deppeg sew pasaoreg. Os ge wénih Maria taun Makdalari. Tatam Yesus koulli nou 7 qere féruwari geʼaran. ³ Am Yoana, nug gému Kusa ge Herod loug qeri kuakri kuri danah. Susana am as la kuʼum os ole ateg. As qe ag asilag kekewa Yesus bégur ole kehnareg.

Danah Ke Saʼeg Touʼakri Né Tonak

⁴ Danahas kuʼumnah taun lalawari uríyessi Yesus dowa qagleg. Qagulweg ge, Yesus né tonak os amlagwa anan. ⁵ “Danah os atko dara ke saʼeg touʼan. Nug touʼelle atewew ge, ke saʼeg os ihwa tolweg. Tolwessi neweg ge danah tapareg am kunum é diareksi lareg. ⁶ Am ke saʼeg os ge wan qarqar olewa tolweg. Tolweksi qaʼa beg, gam wan qe le ole kawa, géri ke qaʼa wagam kawa ole meirég. ⁷ Am ke saʼeg os ge meʼ qoum ole gamlagwa tolweg, géri arié béksi meʼ qoum ole ke qaʼa tonarweg meirég. ⁸ Gam ke saʼeg os ge wan kenawa tolweg. Ag béksi mou kuʼumnah nieg. Mou ge 100 érdak qere.” Yesus qere anko ge uruko anan, “Danah oun os doug né duakri ole dew pe, né ene doko koutorar.” ⁹ Yesus nug bégur né tonak qe diguri koʼmoreg. ¹⁰ Géri nug anan, “Tiwurdi Kingdomri duak qe algu lariak daré, gam gei nug sew ag duak lugmak qe dosi. Gam, danahas lala qe duak lugmak qe da né tonakwa anarina. Qeri Né yak qe mou bérig. ‘Ag aminsi gam ospi peweg. Am

né qe dosi gam digu ge olag ospi mourew,' " eko anan.

Ke Sařegri Né Tonak Digu

¹¹ Yesus anaran, "Né tonak ene digu ge ere, ke sařeg ge Tiwurdi Né. ¹² Ke sařeg os ge ihwa tolasi, qe ge danah né dosi gam dimba nou memeg doko né qe olagwari o. Keřdi nug qere sew ag olag meře pi mew ge, hipunin asilag noh ospi éřurweg. ¹³ Am ke sařeg os wan qarqar olewa tolweg ge, danah né qe dueksi uksi olag gamag ase. Gam ag ke qařa diři wan kunuk pi no sillah. Qeri ag olag meře mak sén kutuk ih de, gam qepiak urıyewew ge, ag tolasi. ¹⁴ Am ke sařeg os meř qoum ole gamlagwa tolasi qe sillah ge, danah né dossi gam ag sén kuřum asilag kug kowol kowolri dahmési, ag wan ewa kehlak ole am o gamag asakwa dalagri, dahmak qe Tiwurdi Né tone. Qeri ag olag meře mak mou ole kawa. ¹⁵ Am ke sařeg wan kirag olewa tolwe qe sillah ge, danah olag kena am dahmak mangu ole Tiwurdi Né dueksi gagrag orwessi, am ag olag meře mak gagrag dewew mou kuřum nisi."

Lam Wa Kallowa Pi Tonsi

¹⁶ Yesus buliko né marian. "Danah os lam kamutko wawa pi tone am qarqar kallowa pi me. Kawa, nug karan eisew nie. Qeri danah lo owa nuksi ge, sarmeré qe pelag. ¹⁷ Keř keř lugmak dasi ge, dimba Tiwur ambo mérig. Am keř keř tonak ge, dimba qe ole ambo mew dolag. ¹⁸ Qeri dosi koutores. Danah are nug né doko orwe ge, Tiwur sew nug o mourew geisah naři qere murdig. Gam danah are nug né pi duelle 'da

duina,' eko ane ge, nug nagur os due qe Tiwur buliko ka'urdig," eko anan.

Yesus Anig Am Kamgur Ole

¹⁹ Sén qewa Yesus anig am kamgur ole pelagri úriyeg. Gam danah ku'umnah qagleg, qeri ag nug gumdeksi unaka wanakri olele kawa.

²⁰ Danah os Yesus anoran, "Na anin am kampar ole peirlagri dimdim ewa aséw dasi." ²¹ Yesus buliko anaran, "Da anil am kamlar ge danahas Tiwurdi Né dueksi am dimlamursi ole qe," eko anan.

Yesus Ulas Na'ri Anew Toran

²² De' os Yesus bégur dilag anan. "Doweg, ig le ko're kawa séku leis uwa atet." Qere anew ge, kuh oswa olessi téksi ateg. ²³ Kuhwa atessi ge, Yesus usameg new nian. Niewew ge, ulas gagrag le ko're kawawa bew, le ko' ko' na'ri qeko kuhwa noko ambew kug na'ri owa deg. ²⁴ Yesus bégur gumdessi wanessi qa'qressi aneg. "Danah na'ri, Danah na'ri, ig torinigri sétu." Géri Yesus asko ulas ko'ko' uh'ri na'ri ole ga'ra matew tores. Torwes ge, le ameg mousko nian. ²⁵ Yesus bégur dilag anan, "O me're mak asilag arewa de?" Gam ag fa'essi dahmak ku'um uksi agéagé aneg. "Danah ene oun? Nug ulas le ole gagrag anatew, né nusig dimlamdap," éksi aneg.

Yesus Koulli Nou Danah Os Féruwari Gerdan

²⁶ Yesus bégur ole kuhwa ateksi Gerasa waneg. Atu qe Galili le ko're kawa nie qe séku leis de.

²⁷ Yesus kuh minko pitiyewew, danah os féruwa koulli nou ole taun os owari nug Yesus gumurko duan. Sén welah nug lamén ospi tagré am louw

ospi daré, nug matmatwa ih niré. ²⁸⁻²⁹ Sén kuřum koulli nou danah qe pi pařwurdé. Danah kuřum nusig sansan amneksi koutordéw, am nug sen darér olewa qagdéw. Gam nug sen darér ole qe tatrárdé. Koulli nou souorew awen danah kawawa atté. Danah qe Yesus peko ge, qalko urwelle unaka fégwá wanwa qere tolwan. Tolwew peko ge, Yesus koulli nou danah qe pařwurdigri gagrag anoran. Qeri nug fag gogwa uruko anan, “Yesus, na Tiwur Karannah Bega. Na kerđi dagrowa uriyam? Da gurak aw mirwen.” ³⁰ Yesus kořmoran, “Na wénim oun?” Eko anew am nug anan, “Ameg naři.” Kerđi koulli nou kuřum nug féruwa nog. ³¹ Koulli nou qe qagleksi urweksi Yesus bulibuli kořmoreg. “Na ig aw geřigwe moř aminweg atko kutuk mewa nuhut.” ³² Fo kuřum qouku nagur os qewa ke lessi deg. Qeri koulli nou qe ag Yesus dowá qagleksi urwessi aneg. “Na ig minigwe fo uni feřlagwa wanet.” ³³ Am Yesus anew koulli nou ag danah qe mundeksi fo feřlagwa waneg. Fo qe gueksi waneksi béwa tolweksi le koře kawa qewa nuksi le léksi mouseg. ³⁴ Fo gumarak danah ag kowol qe peksi kum atessi taunwa am kaw lalawa ole mariweg tualan. ³⁵ Géři danahas ag keř ban qe pelagri taun pařweksi ateg. Ateksi Yesus dowá waneksi ge, danah koulli nou pařwureksi ateg qe, dahmak qaorew am lamén tako Yesus nohwa ninapiřko dewew pessi fařeg. ³⁶ Danah os keke qe amlagwa peg ole ge, ag danahas la danah koulli nou ole dewew Yesus areg sew kena man qeri mariweg dueg. ³⁷ Géři danahas kunum Gerasa atu qewari

Yesus minarko attigri sinanah anoreg. Keꝛdi ag olag nouninah faꝛan. Géri Yesus buliko attigri kuhwa olko tan. ³⁸ Danah koulli nou paꝛwureg ole qe Yesus nuꝓurko anan, “Da na ole atnit,” eko anan. Gam Yesus anew buliko atewew ge anoran. ³⁹ “Na bulika kawanwa atka, Tiwur keke kunum nasip san qe mariwe dues.” Géri danah qe taun kunumba atko danahas amlagwa Yesus keke kunum san qe kusuko marian.

Yesus Nir Asin Mousak Qaqran Am Waꝛe As Sew Pasaoran

⁴⁰ Yesus buliko le koꝛe kawa séku leis atew ge, danahas kunum nug felqoreg. Keꝛdi ag kunum nug ameg méksi deg. ⁴¹ Sén qewa danah os wénih Yairus nug Yesus gumurko wanan. Nug Yuda dilag binag mak lo osri kuri danah. Nug Yesus nohwa gatewa yako gagrag nuꝓuran. “Na da ole loulwa atnit olele te?” eko koꝛmoran. ⁴² Keꝛdi nug nir as usihnah ole am nug makaꝛ nusig 12 keke qere qe mousdig malwak nian. Géri Yesus wanko atewew ge, danahas ameg naꝛi duksi nug omorweg ateg. ⁴³ Am as usih os nug makaꝛ 12 qere as dilag waꝛe qe ole daré. Am nug kéhu kunum dokta agop malwan. Gam danah ounté os sew waꝛe nusig ospi pasaoran. ⁴⁴ As qe Yesus dimugwa doko, Yesusri lamén noh orwew ole waꝛe nusig usihri kawa man. ⁴⁵ Yesus koꝛman, “Oun da urwilé?” Eko anew, kunum aneg. “Ig kawa, ig kawa.” Éksi anweg Pita anan, “Danah naꝛi, danahas ameg naꝛi na omiressi qataoréw dasi.” ⁴⁶ Gam Yesus anan, “Ounte da urwilé. Keꝛdi da gagragsak dasil os

pa'rwilko atew dahmorém.”⁴⁷ As qe duan ge, nug lugumdigri olele kawa. Géri nug sahréle Yesus nohwa doko wanwa duk noko, danahas kunum nolagwa nug kérdi Yesus dowa eweg man qe kopatko amegwa anan. “Wa're dasil ge usihri sew pasaoré.”⁴⁸ Yesus as qe anoran, “Nir dasil, na dasil ot mére mé qewa na férun sew kena mé. Na aska ot kena ih dewew eit.”⁴⁹ Yesus né marielle dewew, Yuda dilag binag mak lori kuri danah Yairus qe lougwari mé' danah os uríyan. Uríko ge, Yairus anoran, “Na arén ge ífil mousé. Na duak marak danah aw kug morwen.”⁵⁰ Gam sén Yesus qe doko ge, Yairus amegwa anan, “Na aw fa'rwén. Na dasil ot mére mew, geisah arén séwi kena mérig.”⁵¹ Yesus nug Yairus lougwa atko ge, nug danah la os minarew nug ole lo owa pi nog. Gam Yesus nug, Pita, Yon, Yems, am nir as qe memeg anig ole ag ih owa nog.⁵² Danahas kunum nir as qeri masieppég ge, Yesus amlagwa anan. “Ag aw masiwég. Nir qe pi mousé, nug usnie,” eko anan.⁵³ Anew ge, ag dueg nir qe ífil mousan, qeri ag nug imdeg.⁵⁴ Gam Yesus lo owa noko nir qe ewegwa o'ráko qalko anan, “Nir dasil, na as.”⁵⁵ Anko malwew, nir qeri koulli buliko féruwa uríyew foumak oko usihri asan. Yesus amlagwa anan, “Ag ke os morweg lar.”⁵⁶ Nir qe memeg anig ole dorlas new ole fa'rés. Gam Yesus gagrag anatan. “A ounté os aw keke eneri amegwa anwes,” eko anan.

9

Yesus Bégur 12 Qe Kekuak Maran

¹ Yesus Bégur 12 qe úrwarew dog. Doweg ge, nug koulli nou kunum geárlagri am waé kowol kowol ole kusqarlagri gagragsak am kuakri witak ole maran. ² Am nug Né Kena “Tiwur king delle danahas nusgur gumardigri” qe kusulagri am waé danah seweg pasaorlagri ole anew ateg. ³ Yesus amlagwa anan, “Ag weiyakri sénwa kité os aw oweg. Ag durqak sokét, baram, ke, qarég am siot arít os aw oweg. ⁴ Ag lo arewa diarweg nuksi pe, ag qewa ih dessi ole taun qe mineksi ates. ⁵ Gam danahas ag fel pi qaressi diareksi loulagwa pi atweg pe, ag taun qe mineksi atessi ge félagwari usur qeqlessi ates. Ag kowol qe peksi ge, kowol nou asilag qe olag mourdig.” ⁶ Géri Yesus Bégur ateksi kaw kunumba weiyessi, Né Kena kuswessi am waé danah atu kunumbari seweg pasaorég.

Herod Yesusri Katat Qan

⁷ Herod Antipas nug Galili dilag king. Nug Yesus Bégur ole kuak seg qeri né doko katat qan. Keédi danah os ge aneg, “Le Luarak danah Yon buliko siran.” ⁸ Am os ge aneg, “Elaisa gumarko duan.” Am la os aneg, “Profet* os algunah mousan qe buliko siran.” ⁹ Géri Herod anan, “Da anwi Yon fag íril kotrég. Gam danah qe ounnah nusig kuak am kowol ole mariweg duina?” eko anan. Géri nug Yesus perigri dahman.

Yesus 5,000 Danah Ke Maran

* **9:8** 9:8 Tiwurdi né oko mariak danah

10 Yesusri aposel† bulieksi uriyeksi keke kunum seg qeri nug amegwa marieg. Qe dimba ge, nug omlarew, danah la minareksi ag agé kaw os wénih Betsaida qewa ateg. 11 Gam danahas dueksi ge, nug dimlamdeksi ateg. Ag nugnéwa atweg ge, nug felqarelle Tiwur king delle danahas nusgur gumardigri né qe kuswew dueg. Am danah os waére ole qe sew pasaoéeg. 12 Kem noko tueh manew ge, Béгур 12 qe duksi Yesus amegwa aneg. “Na danahas anwe atares. Ag kaw naři am kaw nounu unaka dassi qewa ateksi niak awen am ke lakri os ole maries. Awen ig datu ole ene ge danah kawa,” éksi aneg. 13 Anweg ge, Yesus buliko anaran, “Ag agégé ke mares.” Gam Béгур 12 qe aneg, “Ig ke kuřum ole kawa, beret tanig ole am kaké ařit ole ih de. Ig atektu danahas ene kunum dilag ke daren te méktu marnig?” 14 (5,000 danah keke qere qewa deg.) Yesus nug béгур amlagwa anan, “Ag danahas amlagwa anweg, qaglak ameg 50, 50 qere qagleksi des.” 15 Yesus nug anan sillah, béгур né nusig dimlamdeksi anweg danahas kunum ninapiřessi deg. 16 Yesus beret tanig ole am kaké ařit qe ole oko saw karan annelle kena sam elle keri unuqoran. Malako ge, temelle béгур danahas agop panilagri maran. 17 Géři danahas kunum ke léksi olag orwew ge, ke big big minareg qe Yesus Béгур diareksi kaleg 12 qere yanareg.

Pita Né Kopatko Yesus Ge Kristus Eko Anan

† **9:10** 9:10 Danah os Yesus nugégé toqarko anew kekuak nusig séksi ateg ole qe. Aposel ge Yesusri meř danah.

18 Deŕ os Yesus bégur ole dessi am nug nugé kepaŕko unuqorewew, am bégur gumdeksi doweg koŕmaran. “Danahas dasil ge oun éksi ansi?” 19 Nug bégur aneg, “Os ge Le Luarak danah Yon éksi ansi. Am os ge Elaia éksi anirsi. Am la os ge profet os algunah mousan qe buliko siran éksi ansi.” 20 Anweg ge, Yesus bégur koŕmaran, “Gam ag ge dasil oun éksi ansi?” Pita anan, “Na Tiwurdi Kristus[‡], Tiwur danahas nusgur bulika diardipri toqiran.” 21 Géri né qe danah os amegwa anwegri Yesus bégur gun qaran.

Yesus Mousko Am Buliko Asdigri Anan

22 Am Yesus amlagwa anan, “Meŕenah, danah Bega geisah gurak kuŕum morlag. Kuri danah am pris dilag anqak danah ole am Mosesri Ró duak danah ole geisah nug dimoreksi, am qeweg mousdig. Gam deŕ kiamba ge buliko sirdig.” 23 Anko ge, buliko danahas kunum anaran, “Danah os da dimlamiŕdigri dew ge, nug nugégé nusig sak am o mourak ole qe dimorko, am ker mawanak nusig deŕ dorog mouko ge da dimlamŕar. § 24 Danah os nug nugégé nusig sak am o mourak ole dimlamurko ge, nug foumak ospi ow. Gam danah os nug da dimlamŕelle mousko ge, foumak oko sansan darig. 25 Am danah nug wan kénih ole delle mousew ge, keke qe ospinah kéhnurweg. 26 Am danah os dasil

‡ 9:20 9:20 Kristus ge Mesaia. Tiwur danahas nusgur buliko diardigri danah toqoran. § 9:23 9:23 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

am né dasildi urá new pe, sén Danah Bega nug nusig kamsahlak gun olewa am Memegriwa am Tiwurdi doup gun dilagwa uririg ge, danah qeri urá nérig. ²⁷ Da ag amlagwa meřenah anina. Danah os ewa aséw dasi ge, geisah ag pi mousak, Tiwur king delle danahas nusgur gumarewew pelag,” eko anan.

Yesusri Kamsahlak Gun Ole Béгур Peg

²⁸ Yesus né qe anko malwew, deř 8 keke qere atew ge, nug unuqurdigri Pita, Yon am Yems ole diarew qoukuwa teg. ²⁹ Nug unuqorelle dewew ge, nug kitru ge buliko sonrewew am nug féru bala qe ole ampir sillah sonran. ³⁰ Usihri danah arit Moses Elaisa ole kamsahlak gun olewa dowes nug ole né marieg. ³¹ Yesus nug wagam kawa Tiwurdi Né dimlamurko olele morko Yerusalem mousdigri danah arit qe ole marieg. ³² Pita leikuř arit qe ole amlag kug morew nilag seg. Gam sén amlag fou mew ge, danah arit qe am Yesus ole aseksi kamsahlak gun ole qe owa deppeg piareg. ³³ Danah arit qe Yesus mundeksa atepes, Pita Yesus amegwa anan. “Danah naři, ig ewa dalom ge kena. Ig laklak kiam os sénig, os nasip am os Mosesri, am os Elaisari.” (Pita nug o pi mourak né qe anan.) ³⁴ Nug né qe anewew ge, fur os doko tonarew owa dessi olag fařan. ³⁵ Tiwur fur owa anan, “Ene nir dasilnah. Da nug algu toqurin. Ag nug fag duessi dimlamdes.” ³⁶ Tiwur né qe anko malwew ge, ag Yesus nugé dewew peg. Am béгур ag sén qe keke peg qeri né ospi marieg, asilag dahmakwa ih dian.

Yesus Nir Os Koulli Nou Ole Sew Kena Man

³⁷ Deř qe dimba ge, Yesus am bęgur kiam qe ole qoukuwari noppeg, danahas ameg naři uřiyeksi Yesus ihwa peg. ³⁸ Am danah os danahas ameg naři qe olagwa urwan, “Duak marak danah, na da nal ene peripri nuqrina. Da nir danah usihnah enan ih. ³⁹ Koulli nou os nir qe owa now ge, gelelle ole usihri atko kauřko kawqelle sihru newew nie. Koulli nou qe nir ofer ospi pařwe, am fęru sew nounah me. ⁴⁰ Da na begpar koulli nou ene geřurlagri nuqarin, gam ag sakri olele kawa.” ⁴¹ Gęri Yesus anan, “Danahas geiri, ag olag meře mak ole kawa am olag ge mangu kawa. Sęn gane da ag ole dettu olag meře męrigri amlag męril?” elle ge anan, “Nir nasip oka ere do,” eko anan. ⁴² Nir nag qe Yesus gumurko dowew ge, koulli nou qe touřew atko wanwa qeko kawqelle nian. Gęri Yesus koulli nou qe nir qe pařorigri gařa morko geřdan. Geřurko nir qe sew kena mew ge, buliko memeg moran. ⁴³ Gęri danahas kunum Tiwurdi gagragsak qe peksi dorlag nan. Danahas qe Yesus keř keř kunum san qe peksi dorlag new seppег, nug bęgur anaran. ⁴⁴ “Nę andil seina, ene dossi koutores! Danah os Danah Bega kegeř ewlagwa męrig,” eko anan. ⁴⁵ Gam bęgur ag nę qe olag pi mouran. Tiwur sew nę digu qe larian, qeri ag olag ospi mouran. Am ag Yesus nę qeri kořmorakri fařeg.

Oun Nug Naři?

⁴⁶ Yesus bęgur ag kořlagwa ih oun nug naři asilag qeri kareg. ⁴⁷ Yesus dahmak asilag qe

doko ge, nir nag os oko doko nug dianwa man. ⁴⁸ Meko ge, nug amlagwa anan. “Oun os nug da wénilwa nir nag ene sillah oko dahmore ge, nug da dahmiré. Kerdi nug dasil o meře me qeri qere se. Am oun nug da wiře ge, nug Tiwur da anew uriyin qe o. Géri oun ag kallolagwa de qe, nug nari.” ⁴⁹ Yon anan, “Danah nari, ig danah os na wénimba koulli nou geřarew pektu anurhut minan. Kerdi nug ig ole pi weitu.” ⁵⁰ Gam Yesus anaran, “Ag nug aw dagorweg. Oun nug ag keger pi mare ge, nug ag leilag,” eko anan.

Samaria Yesus Kawlagwa Nuakri Mineg

⁵¹ Yesus wan minko saw kappa attigri sén durmurew ge, Yesus o kunum morko ole Yerusalem attigri atan. ⁵² Am nug danah os meřarew anqeksi kaw os Samaria qewa keke dalagri am ke lelagri qe kunum bawarlagri ateg. ⁵³ Gam danah kaw qewari ag dueg ge nug Yerusalem attigri atan qeri Yesus uksi loulagwa atakri mineg. ⁵⁴ Yesus békuř Yems Yon ole, a né qe dueksa anes. “Narinah, na ot niew pe, i kew saw karandi anhuř ařelle neko danah uni ařardig!” eksa anes. ⁵⁵ Gam Yesus buliko ařit qe gařa matan. ⁵⁶ Qe dimba ge, Yesus bégur ole kaw lawa ateg.

Yesus Dimlamdakri Kowol

⁵⁷ Ag ihwa ateksi ge, danah os Yesusri anan, “Na arewa attip ge, da na dimlamirwi ole atnit.” ⁵⁸ Yesus danah qe kořewa oko anan, “Qé déguř ag wan ořewa nisi am é ag teřlag ole. Gam Danah Bega nug ge niakri lo ole kawa.” ⁵⁹ Nug danah la os amegwa anan, “Na doka da dimlamir,” eko anan. Gam danah qe

anan, “Nařinah, na minwe tatam ge da atko mem mousan suhumko am dimlamirdil,” eko anan. ⁶⁰ Yesus danah qe amegwa anan, “Danah mousak qe minwe agé agé mousak leilgar qe suhmares. Gam na atka Tiwurdi Kingdomri* Né kusu.” ⁶¹ Am danah la os Yesusri anan, “Nařinah, da na dimlamirdil. Gam tatam na minwe da louw atwi ke séktu léktu ewlag ořako am na dimlamirdil.” ⁶² Gam Yesus danah qe anoran, “Danah palangis digumeko tořelle am sansan nug buliko dimugwa amne ole qe, nug Tiwurdi Kingdom owa kekuakri olele kawa,” eko anan.

10

Yesus 72 Danah Nusgur Kekuak Marew Ateg

¹ Dimba ge, Nařinah nug Bégur 12 qe am danah la os ole keprārko 72 danah qere anew awen are nug attigri ole qe kunumba ařit ařit nug noh uksi anqeksi ateg. ² Nug ere eko anaran, “Ke lep kuřum nie, gam ke lep qe tuqakri kuak danah kuřum kawa. Qeri ag dar memegri unuqorweg nug sew kekuak danah la os ateksi dar nusigwa ke lep tuqlag. ³ Ag ates! Da séwi ag sipsip nagur sillah qé déguř olagwa atsi. ⁴ Ag asilag qarég yanakri sogot am keke yanakri baram aw oweg, am félag gařa la os ole aw diarweg. Am ag ihagwa danahas piareksi ge, aw félag yeksi né marweg. ⁵ Ag danah os diarko lougwa now ge, ere tatam anares, “Tiwur o maror ag ole dalag.” ⁶ Am lo qe memeg o kenawa

* **9:60** 9:60 Tiwur danahas nusgur dilag king delle gumare.

diarew pe, Tiwurdi kena sak lo qewa darig. Gam pi diarew pe, Tiwurdi kena sak lo qewa pi dew buliko agrowa durig. ⁷ Ag lo qewa ih deppeg ke' marlag ge, lessi des. Ke'rdi kekuak danah nug kekuak nusig qe noh urig olele. Ag lo oswari am oswa aw weiweg. ⁸ Ag taun oswa noweg, felqareksi diareksi am ke' ke bawresi marlag ge, ag les. ⁹ Wa'e danah os taun qewa dalag ge, ag seweg wa'e pasaorar. Am ag Tiwurdi Kingdom* agrowa u'riye unaka de qe anweg dues. ¹⁰ Gam ag taun oswa noweg fel pi qarweg ge, taun qeri ihwa aseksi dessi anes. ¹¹ 'Ig fenigwa usu' asilag taunwari de, qe ag pelagri qeqalhut ne. Gam ag dahmeksi koutores: Tiwur danahas nusgur dilag king delle gumardigri sen unaka de.' ¹² Da ag amlagwa anina, Tiwurdi uh'ribak derwa geisah Tiwur Sodom kaw kug moran qe erdak ag kug na'ri pelag. ¹³ Korasin am Betsaida ole ag olag duak! Ag geisah kug na'ri pelag. Ke'rdi da mirakel os agn'ewa sein qe Tair Saidon ole selem ben, ag algu olag bulilo. Ag asilag hipunin qeri nouni dueksi neko aqarew am usu' luessi dessi olag bulilo. ¹⁴ Gam Tiwurdi uh'ribak derwa Tair Saidon ole kug olas qe erdak ge ag olag. ¹⁵ Am Kapernaum, ag te os Tiwur ag binlag karan sumdig? Kawa. Ag ole Tiwur tou'arew nuksi paral melag," eko anan. ¹⁶ Am Yesus buliko anaran, "Oun os nug asilag ne dorig ge, nug dasil ne due. Am oun os nug ag dimardig ge, nug da dimire. Gam danah da dimire ge, nug Tiwur anew da u'riyin qe dimore," eko anan.

* **10:9** 10:9 Tiwur danahas nusgur dilag king delle gumare.

72 Keuak Danah Bulieksi Uriyeg

¹⁷ 72 danah qe bulieksi uriyeksi olag gamag asakwa aneg. “Nañinah, ig na wénimba anektu, koulli nou geñarhut né dueksi ateg.” ¹⁸ Géri Yesus koñlagwa oko anaran, “Da Satan saw karandi ampiñ sillah usihri tolwewew pégin. ¹⁹ Ag dues. Da ag mat am kappiéñ ole qañlagwa tapeksi oñollarlagri gagragsak marin. Am kegeñ asilagri gagragsak kunum qe seweg kéwsi kawa mérigri gagragsak marin. Qeri ag kité ospi sarew nou meweg. ²⁰ Gam koulli nou ag koñlag dimlamdeg qeri ag aw olag gamag asew. Ag Tiwur saw kappa iril wenlag yan qeri olag gamag asar.” ²¹ Sén qewa Koulli Gun nug sew Yesus o gamag asew anan, “Mem, na wan saw oleri Nañinah. Da binam sumina. Keñdi na keke ene duak danah dowegri sewe larian, gam danah nir nounu sillah ge ismaren. Meñenah, Mem na ere séripri ot nian ole qe sen. ²² Mem gagragsak am keke kunum ole da ewelwa man. Tiwur Bega ge oun qe ounté ospi due, gam Mem ih due. Am Mem ge oun qe ounté ospi due, gam Bega ge due. Am danah are da keprarko ismarin qe ag ole Mem dossi.” ²³ Géri Yesus buliko bégur ih dolagri anan, “Danah keke ag pesi ole qe pesi, qe ag olag gamag asdig. ²⁴ Da ere anarina keñdi ge, algu profet am king kuñum ole keke ag gei pesi ole qe pelagri seg, gam ag pi peg. Am né ag gei dossi ole qe dolagri seg, gam ag ospi dueg,” eko anan.

Samaria Danah Kenari Né Tonak

²⁵ Deñ os Río duak danah os asko Yesus sew perigri seko koñmoran. “Duak marak danah, da

areg seko ge foumak sansan diakri uril?” ²⁶ Géri Yesus kořewa oko anan, “Mosesri Ŕo yakwa keř eko ane? Na dona ge areg?” ²⁷ Géri danah ge anan, “Ŕo ane: Nařinah nasip Tiwurdi ot mousew, ot kunum ole, kitton ole, gagragsak nasip kunum ole am dahmak nasip kunum ole Tiwur mor. Am na nagégé nasip ot mouse ge sillah liapri ole qere ot mousar.” ²⁸ Géri Yesus danah ge kořewa oko anan, “Na meře anam. Na qere seka ge, foumak owe Tiwur ole sansan dalas,” eko anan. ²⁹ Gam danah ge nug da mangu elle qeri Yesus kořmoran. “Am oun ge da lial?” eko kořmoran. ³⁰ Am Yesus amegwa anan, “Danah os Yerusalemri noko Yeriko atewew, yawsen danah ihwa ořweksi féru balla nusig kunum urdeksi keke nusig kunum kařdeksi, mouřaweg ameg tařiew niewew ateg. ³¹ Niewew ge, pris† danah os ih ge dimlamurko noko nug danah ge peko ge, ih séku leis wanko nanřurko atan. ³² Qe sillah, Liwai‡ danah os ole qere noko peko, nug ole ih leis wanko nanřurko atan. ³³ Gam Samaria danah os ih unari uriko danah ge nianwa doko qere peko ge, o duan. ³⁴ O dow ge, nug danah ge gumurko wanko isiwa gořen am wain ole gogřew now isi witan. Malako ge, danah ge sumew donki nusigwa tew oko řo lo oswa atko qewa meko guman. ³⁵ Kuagřew ge, qarég silwa ařit ipko řo lo gumak danah ge morko anan. ‘Na danah ene dahmoreppe da buliko uriko ge na qarég gane tourdip ge noh

† **10:31** 10:31 Tiwur am danahas ole gamlagwa Tiwurdi ofa mak danah ‡ **10:32** 10:32 Pris kéhnurak danah am nug Liwai fuřuh

ménil, ' eko anan." ³⁶ Am Yesus Ró duak danah qe kořmoran, "Danah kiam ene na dona ge danah are ge yawsen danah mouřweg ole qe lia?" eko kořmoran. ³⁷ Kořmorew ge, nug kořewa oko anan, "Danah o dow kéhnuran ole qe." Géri Yesus danah qe anoran, "Na ole atka qere ih se," eko anoran.

Yesus Mata Maria Ole Piattig Atan

³⁸ Yesus bégur ole Yerusalem atlagri atessi kaw oswa waneg. Yesus kaw qewari as os wénih Mata qe lougwa atew, Mata felqoran. ³⁹ Nug mageg os wénih Maria, qe Nařinah fégwa delle né marian qe duelle dian. ⁴⁰ Gam Mata ge ke bawrakri sik nou qan. Géri nug doko Yesusri anan, "Nařinah, da magel ene minřew kekuak dagé seina, qe na areg dona? Na anwe nug ole da kéhniřar," eko anan. ⁴¹ Gam Nařinah anoran, "O Mata, na keke kuřumrinah ot sik qew ot nou me. ⁴² Gam keke usihri qe na kutuk. Qeri Maria nug keke kenanah kepařko se. Am ounté os nug keke kepré qe pi kařdew," eko anoran.

11

Yesus Bégur Unuqorakri Ismaran

¹ Deř os Yesus awen oswa unuqoran. Sén nug unuqorko malwew ge, nug bega os anoran. "Nařinah, Le Luarak danah Yon bégur unuqorakri ismaran sillah, ig ole ismig." ² Géri Yesus anaran, "Sén ag unuqoressi ge, ere anes: 'Ig Mémnig, na wéhnim gun ole karan sumnig. Na uřika king denna danahas gumardip. ³ Na ig deř dorog ke mig. ⁴ Ig ole oun nouni sige qe kusqektu

dohut dounig katie qe sillah, hipunin isanig kusuqka mig. Am ig aw pa'rwigwe qepiakwa tolahut.' ” ⁵ Am Yesus bégur dilag anan. “Olagwa usih os tuqan tugamag lia lougwa atko qaqurko ko'rmurdig. ‘Lal, beret kiam os mi'rdip olele te? ⁶ Ke'rdi da lial os weiko u'riko loulwa dué. Gam da ke nug morakri ole kawa.’ ⁷ Géri danah lo owa ge andig, ‘Na da aw kekuak mi'rwén. Ih'ram i'ril maném, am da nir dahlar ole niak awenwa nitu. Da asko keke mirakri olele kawa.’ ⁸ Da ag anarina. Nug lia qeri nug asko keke ospi morew. Gam nug pi fa'rak ko'rmurdig qeri nug asko keke qe murdig. ⁹ Qeri da ag amlagwa anina. Ag ko'rmeweg, Tiwur ag mardig. Mariweg ge, nug ismardig. Ag ih'ram qouqou orweg, nug ih'ram matuldig. ¹⁰ Qeri oun os Tiwur ko'rmurdig ge, nug urig. Oun os maririg ge, nug ismurew perig. Am oun os ih'ram qouqou orew ge, nug ih'ram matulko murdig. ¹¹ Oun os nug nir memeg ge, nir kaké murdigri ko'rmew ge, mat nou os murdig te? ¹² Am maru owah murdigri ko'rmew ge, kappié'p os oko murdig te? ¹³ Qeri hipunin danah ag ole nir keke kena marlagri qe dueksi koutursi. Am Mem saw kappari danah are ko'rmési ge me'renah Koulli Gun mew u'ririg,” eko anan.

Yesus Belsebul Ole

¹⁴ De' os Yesus danah os ko're kunum fé'ruwa koulli nou qe sew ko're kunum daré qe ge'rdan. Ge'rdew atew ge, danah qe né buliko mariew danahas peksi dorlag nan. ¹⁵ Gam olagwa danah

os ge aneg, “Nug koulli nou dilag kuri Belsebulri* gagragsakwa koulli nou geřare.” ¹⁶ Am olagwa danah la os Yesus mirakel os sérigri kořmoreg. Keřdi ag nug meřenah Tiwur dowari te úriyan qe pelagri kořmoreg. ¹⁷ Gam Yesus nug asilag dahmak qe doko ge, amlagwa anan. “Danah kaw usihwari ag kopatweg ařit patew fan selag ge, geisah kaw qe paral mérig. Am danah os ag ateré usihwari ag kopatweg ařit patew fan selag ge, geisah ateré qe kawa mérig. ¹⁸ Am Satan leigur ole kopatweg ařit patew fan selag ge, gagragsak nusig kawa mew ag paral melag. Ag ansi ge da Belsebulri gagragsakwa koulli nou geřarina, qeri da ere anina. ¹⁹ Da Belsebulri gagragsakwa koulli nou geřarwi pe, asilgar danah ge oundi gagragsakwa koulli nou geřarsi? Qeri asilgar danah ih qewa ismigi ge ag darmési. ²⁰ Gam da meře Tiwurdi gagragsakwa koulli nou geřarwi pe, Tiwur danahas nusgur gamlagwa king delle gumardigri agrowa úriyan.” ²¹ Am Yesus né tonak os anaran. “Danah os gagragsak ole nug fan sakri keke bawarko loug kařiah wite ge, keke nusig kunum kena dasi. ²² Gam danah gagragnah os beko fan seko éřurko ge, fan sakri keke kunum gagrag qore qe urig. Am nug keke kunum urig qe danah la agop panirig. ²³ Oun nug da lial kawa ge, nug dasil kegeř. Oun nug da pi kéhniřew sipsip qaglarřu ge, nug sipsip lamarew pihřauri,” eko anaran.

Koulli Nou Buliko Úriye

* **11:15** 11:15 Koulli nouri kuri am nug nou memeg Satan

24 Yesus anaran, “Sén koulli nou danah os féruwari géurweg doko atko ge, atu meirakwa sik oko darigri awen mariko weiye. Am nug awen os pi peko ge, ane. ‘Da lo minko ufiyin qewa buliko attil,’ eko ane. 25 Géri nug buliko atko danah qe owa lo qe kinkak ekaŕko bawarko koutorak pe. 26 Peko ge, nug atko am koulli nou la nug erdak nounah 7 qere diarew ufiyeksi qewa dasi. Géri danah qe tatam dian qe éruŕko ole nounah me,” eko anan. 27 Yesus né qe anewew, as os danahas ameg naŕi qe olagwa uruko anoran, “As na mémnirko ouma mirelle begran ole qe nug o gamag ase.” 28 Gam Yesus anan, “Danah areg Tiwurdi né dueksi dimla-mursi ge, ag olag gamag asak naŕiwa dalag,” eko anan.

Yesus Mirakel Sew Pelag Aneg

29 Sén danahas kuŕum qaglessi omorweg ge, Yesus anaran, “Danahas geiri ag olagwa sak nouninah ambak. Ag da mirakel séwi pelagri koŕmési. Gam da mirakel usih ospi séwi peweg. Ag profet Yona féruwa kowol nian qe sillah ih pelag. 30 Niniwe danahas kowol Yona dowab an qe peksi ge, Tiwur nug mew atan qe ag dueg. Qe sillah danahas geiri ag ole Danah Bega qere peksi ge ag dolag. 31 Dimba Tiwurdi uhŕibak deŕwa kenariwari kuin sirko danahas geiri ole aseksi dessi asilag sak nou qe ambo marko ismarew pelag. Keŕdi kuin qe wan atko patakwari Solomonri duak kena qe dorigri uŕiyan. Gam ag olagwa danah os Solomon erdak ge ewa de, am ag nusig né duak minsi. 32 Sén Tiwurdi uhŕibak deŕwa Niniwe danahas sireksi

geiri danahas ole aseksi dessi geiri danahas dilag sak nou qe ambo melag. Ke’rdi ag Yona né kuswew olag bulian. Gam gei ge danah os Yona e’rdak ge ewa de, am ag olag buliak minsi,” eko anaran.

Férundi Kamsahlak

³³ Yesus anan, “Danah os lam kamutko pi larium, am wawa pi tone. Kawa, nug karan eisew nie. Géri danah lo owa nuksi ge, lam a’ré qe pesi. ³⁴ Na amen ge na férundi lam sillah. Na amen kena dew ge, férún kunum ole kamsahlakwa darig. Gam na amen nou ge, férún kunum ole gattuwa darig. ³⁵ Qeri kamsahlak otwa de qe gattu tonewri na dahmeka koutor. ³⁶ Qeri na férún kunum kamsahlakwa darig am gattu nagur ospi férúnwa darig ole ge, férún kunum kamsahlelle darig. Lam a’rko atko férúnwa kamsahle qe sillah,” eko anan.

Yesus Farisi Am Ró Duak Danah Ole Alaran

³⁷ Yesus né mariko malwew ge, Farisi os nug lougwa atew ke lelasri anoran. Géri Yesus nug lougwa atko ninaqírko dian. ³⁸ Farisi qe Yesus eweg tatam pi isak ke lew peko ge, nug dorog nan. ³⁹ Géri Na’rinah anan, “Farisi, ag asilag kap am plet ole dimdim ih issi, gam ag olagwa ge ameg qak am kowol nounah ole ambak. ⁴⁰ Ag né tapewnak danah! Tiwur férnig ih te kawian? Am onig owa ole pi te san? ⁴¹ Gam asilag kap am plet ole owa ke’r ke’r dassi qe o duak danah kehnaressi mares. Ag qere selag ge, Tiwur amegwa ag olag isak perig. ⁴² Gam Farisi ag dahmes! Ag kug os pelag. Ke’rdi ag danahas

agop sak mangu ospi sési am Tiwurdi olag pi mouse. Ag qané, lombu am darari kes kowol kowol ge watiweg ameg 10 qere new ameg usih qe Tiwur mursi. Gam ag qere séssi am ole Tiwurdi olag mousewew am danahas agop sak mangu ses. ⁴³ Farisi ag dahmes! Ag kug os pelag. Keédi ag binag mak lowa danah wenlag ole dilag diak awen qewa ih dalagri séssi am ag qaglak awenwa felqareppag ih weilagri olag nari de. ⁴⁴ Ag dahmes! Ag kug os pelag. Keédi ag matmat bala pi kehak qe sillah, danahas pi duak qařewa tapeksi weisi,” eko anaran. ⁴⁵ Ŗo duak danah os anan, “Duak marak danah, na Farisi dilag né anna qe, na sewe ig ole urnig ne.” ⁴⁶ Qeri Yesus né noh meko anan, “Ŗo duak danah, ag ole dahmes! Ag kug os pelag. Ag Ŗo kug ole danahas qařlagwa mési, géri ag mawakri kug aqare. Gam ag mawakri kehnareksi ewlag ospi marsi. ⁴⁷ Ag dahmes! Ag kug os pelag. Keédi ag alalgar profet qe aqareg am ag profet dilag matmatwa bala kehareksi bawarsi. ⁴⁸ Kowol asilag qewa danah ismarsi ge, ag alalgar algu profet aqareg qe kowol kena seg essi ag matmatwa bala keharsi. ⁴⁹ Qeri Tiwurdi duak kena qewa nug iril anan, ‘Da profet† am aposel‡ ole anwi atlag. Ag os ge nouni sarlag am gurak marlag. Am la os ge ag aqarweg mouslag.’ ⁵⁰ Qeri kug algu wan digumakwa profet aqareppag uriyew gei patak qe noh danahas geiri ag olag. ⁵¹ Algu Abel

† **11:49** 11:49 Tiwurdi né oko mariak danah ‡ **11:49** 11:49 Danah os Yesus nugégé toqarko anew kekuak nusig séksi ateg ole qe. Aposel ge Yesusri meř danah.

qakwari uriyew pris Sakaraia ge Tiwurdi doꝛ manko morakri qaréw mourak am Tiwur Loug gamagwa ole qeg. Da meꝛe anarina. Kug qe kunum noh qe danahas geiri ag olag. ⁵² Ró duak danah, ag dahmes! Ag kug os pelag. Keꝛdi ag danahas Tiwur dowegri dagareg. Am ag agégé Tiwur duak mineksi ge danahas Tiwur dolagri sepeg ag dagareg,” eko anaran. ⁵³ Sén Yesus lo qe minko attig sew ge, Farisi am Ró duak danah ole uhrilag bew, kegeꝛ moreksi diguméksi gurgur koꝛmoreg. ⁵⁴ Ag Yesus né nouni os anew dueksi oꝛalagri kaꝛéordéw.

12

Né Darmak Kowolri Dahmes

¹ Sén qewa ih danahas kuꝛumnah 1,000 eꝛdak ag Yesus pelagri qagleksi agégé nug tapeksi sepeg, Yesus bégur dilag tatam anan. “Ag Farisi danah dilag yis* qeri dahméksi koutores. Yis qe darmak gaꝛlagwa ih Tiwur dimlandak kowol. Qe sillah aw seweg. ² Ag keꝛ keꝛ larieksi tonak nie ge Tiwur sew ambo melag. Am keꝛ lariakwa sési qe ole sew kunum pelag am dolag. ³ Qeri keꝛ ag gattuwa lugmeksi agé marilag ge, dimba kémunwa danahas kunum dolag. Am keꝛ kutiptip kurugwa marisi ge, dimba tamniakwa mariew kunum dolag.”

Tiwur Ih Faꝛdes

⁴ “Da leilar, ag anarina. Ag danah feꝛlag qelag seweg qeri aw faꝛarweg. Keꝛdi ag dimba kite

* **12:1** 12:1 Yis ge palawa ole kawlieksi palawa manweg titré.

la os pi seweg. ⁵ Gam da ag oun faúrúlagri qe anwi dolag. Ag Tiwur ih fárdes. Nug ge koulli kařwarew mouslagri am ole dimba touřarew kew pi qouse olewa nolagri gagragsak ole. Meřenah, da buliko anarina, ag Tiwur ih fárdes. ⁶ Ag dossi, danah ag é reis anig tanig ole qarég nagurnah usihwa irar mési. Gam Tiwur nug reis anig usih ospi doug katie. ⁷ Am meřenah Tiwur ag kurlag ufug kunum ge gane qe nug due. Qeri ag aw farweg. Am nug asilag o nie ge, é nounou kuřum dilag dahme qe éřdak.”

Yesusri Aw Uřlag New

⁸ “Da ag anarina. Oun os nug danahas amlagwa nug da dimlamřeri andig ge, Danah Bega Da ole geisah Tiwurdi doup amlagwa nug danah dasil eko andil. ⁹ Gam ounté os danahas amlagwa nug da dimiřew ge, da ole geisah Tiwurdi doup amlagwa nug danah dasil kawa eko andil. ¹⁰ Danah oun os pi duak Danah Begari nouni andig ge, Tiwur hipunin nusig kusuqrig. Gam oun os nug duelle Koulli Gun oko oko qurdig ge, Tiwur hipunin nusig qe ospi kusqew. ¹¹ Ag da dimlamiřsi qeri danah os ag ořwareksi diareksi Yuda dilag binag mak lowa am kuri danah wagé wagé am danah kuakri wittak marak ole qe nolagwa atweg ge, keř né am areg anlagri aw dahmak kuřum oweg. ¹² Keřdi ag keř éksi anlagri ge sén qewa Koulli Gun ag ismardig,” eko anan.

Danah Kéhu Oleri Né Tonak

¹³ Danah usih os danahas ameg naři qe olagwa nug Yesus amegwa anan, “Duak marak danah,

na da awal amegwa anwe nug keke i memnitdi ge wasaŋko dasil sillah qe miŋar.” ¹⁴ Gam Yesus né qe noh meko anan, “Lal, oun da asilas ken watiko mattildi kepraŋk danah toŋiŋan?” ¹⁵ Elle ge nug kunum amlagwa anan, “Ag dahméksi koutores! Ag keke kunumdi aw amlag qew. Danah kénih naŋi ole ge, kénih qe sew nug kena ospi dew.” ¹⁶ Am Yesus nug né tonak usih os amlagwa anan, “Danah kéhu ole os dar seko ke kehew mou kuŋumnah nian. ¹⁷ Qewa ge, nug nugégé dahman, ‘Da ke ene oko mew diakri awen olele kawa. Qeri da aregnah séril?’ ¹⁸ Am nug anan, ‘Da ere séril. Geisah da ke makri lo kunum logŋarŋko am lo wagé wagé fuarŋko ge, ke kunum am keke dahlar kunum ole qewa mardil. ¹⁹ Am da dagégé dasil ere andil, da ke am keke la kunum qe makaŋ kuŋum úrwildigri olele qaglin. Aria, da sam delle ke lelle am ke naŋi selle gamal asakwa daril.’ ²⁰ Gam Tiwur nug amegwa anan, ‘Na né tapewnak danah! Gei tuŋan ewa na mousdip. Am keke kunum bawren de ene ge geisah oun memeg mérig?’ ²¹ Géri danah keke kuŋumnah wan ewari nugé nusig qagle ole qe dow a qere bérig, gam Tiwur nohwa ge nug keke kawa,” eko anan.

Wan Kénihri Dahmak Naŋinah Aw Oweg

²² Yesus bégur dilag anan, “Qeri da ag amlagwa anina. Ag wan enewa fou diakri aw dahmak kuŋum oweg. Ag ke lessi fou dalagri am feŋlag balari ole dahmak kuŋum aw oweg. ²³ Ag fou dasi qe ke eŋdak am ag feŋlag qe feŋlagri bala qe eŋdak. ²⁴ Ag kalog dilag dahmes. Ag

ke pi kéhsi am ke uksi qagleksi louw pi mési, gam Tiwur ke mare. Tiwur é dahmare qe érdak ge ag dahmare. ²⁵ Ounté os olagwa dahmak kuřum ow fou darigri sén deř usih yako terigri olele té? ²⁶ Géri ag keke nagur usih os sakri olele kawa ge, kérdi ag dahmak kuřumnah keke lari usi? ²⁷ Ag bala areg besi qe dahmores. Ag teret pi sési am lamén asilag pi sési. Gam da anarina. Bala qe asilag amnak ge king Solomon féru bala kenanah qe érdak. ²⁸ Gisgar nug gei de am kérew ih danah kotařko kewba touřew ardig. Gisgar sam qe Tiwur nug bala mare. Qeri Tiwur ag gumardig qe gisgar gumare érdak gumardig. Ag danahas olag meře mak kutuk ole! ²⁹ Qeri ag kéř ke am le ole lelagri aw dahmak kuřum oweg. ³⁰ Wan ewa danah Tiwur pi dosi ole ag keke qeri marieksi sik aqare. Gam ag ge, Memlag Tiwur ag keke qeri olag nie qe nug ířil doko malwe. ³¹ Qeri ag Tiwurdi Kingdom meweg anqew dimlamurweg ge, nug keke qe ole mardig.”

Keke Kena Saw Kappari Qaglakri Kowol

³² “Ag da beglar kuřum kawa, gam ag aw farweg. Ag Memlag Tiwur nug o gamag asakwa Kingdom nusig mardig. ³³ Ag keke asilgar daren marweg qarég uksi o duak danah mares. Qe ge saw kappa keke kena asilag qe qaglak darig. Am qarég yanakri sogot saw kappari ge ofe ole kawa. Asilag keke kena qe ospi kawa mew qe darig, yawsen danah ospi yawsen oweg am diruř ospi seweg nou mew. ³⁴ Asilag keke kenanah

arewa de qewa ih ag olag am dahmak asilag kunum ole qewa darig," eko anan.

Nařinah Uřirigra Bawrena Da

³⁵ Yesus anaran, "Ag lamen asilag kutuk mappieksi tageksi am lam kamutweg ařewew bawressi des. ³⁶ Ag kuak nir dilag danah naři danah as wakri mallenwa uřirigri ameg męksi dasi qe sillah bawressi des. Gęri sęn nug uřiko ihřam qouqou orew ge, usihri ihřam nusig matleksi morlag. ³⁷ Kekuak nir are ag danah naři asilag uřirigri bawreksi us aw niweg ameg męksi deppeg buliko uřiko piarew ge, ag olag gamag asdig. Da meře anarina. Nug nugęgę lamen tagko sew ag daweg ke bawarko mardig. ³⁸ Nug tuřan tugamag tę kuagařdigri maru gelleppęg tę uřiko kuak nir ameg męksi deppeg piarew ge, ag olag gamag asdig. ³⁹ Am ag nę dasil orwes: Lo memęg os yawsen danah nug lougwa uřirigri sęn qe iril duewew ge, yawsen danah qe loug ospi logařko owa now. ⁴⁰ Qe sillah, ag ole sansan bawressi des. Keřdi ag Danah Bega da keř sęnwa buliko uřiril qe ag pi dosi," eko anan.

Kekuak Nir Kenari Nę Tonak

⁴¹ Yesus nę qe anko malwew ge, Pita kořmoran. "Nařinah, na ig amnigwa ih te nę tonak ene marina, kawa danahas kunum ole amlagwa te marina?" ⁴² Nařinah kořewa oko anan, "Oun ge kekuak nir kena duak kena ole qe danah naři nusig nug tořorew kuak nir la qe gumarelle ke marak sęnwa ke wasařko mardig? ⁴³ Dimba danah naři nusig qe buliko uřiko am kuak nir qe kekuak mangu ih sewew perig ge,

kuak nir qe nug o gamag asdig. ⁴⁴ Meřenah anarina, danah naři qe geisah sew kuak nir qe keke nusgur kunum ole gumardig. ⁴⁵ Gam kuak nir os ere dahmelo, ‘Danah naři dasil ofer ospi buliko uřiyeu,’ elle nug kuak nir am kuak as la qe digumeko mouřwarko ke naři seko lelle am le gagrag qe leko gar qelo. ⁴⁶ Danah naři qe deř kuak nir qe pi dahmurdig ole qewa am sėn os nug pi dorigwa uřiko kuak nir qere peko ge, nug kotřew new danah olag meře pi me dalag awen qewa touřew nurig. ⁴⁷ Kuak nir nug danah naři nusig keřdi o nie qe duelle pi bawarko dimlamdew pe, danah naři nusig sew nouninah qelag. ⁴⁸ Gam kuak nir nug danah naři nusig keřdi o nie qe pi duelle nuni sew pe, danah naři nusig naři pi qew. Tiwur danah are ag naři mare ge, ag naři morlag. Am danahas are ag keke naři gumlagri mare ge, nug ag naři bulieksi morlagri kořmardig.”

Yesus Dimlamdakwa Danahas Watilag

⁴⁹ “Da wan ewa kew mėril uřiyeu, am da ol se ge kew qe iřil digumeko ařan. ⁵⁰ Am da le lourak oswa nuril. Qeri da kug naři iwřewew atew sėn qe durig. ⁵¹ Ag dahmėsi ge diak kena te darigri wan ewa uřiyeu? Kawa. Da anarina, da danahas olagwa koptak bėrigri uřiyeu. ⁵² Gei digumak lo usihwa danahas tanig ole qe watieksi, kiam ge ařit dilas olag usih ospi dew am ařit ge kiam qe dilag olas usih ospi dew. ⁵³ Ag watieksi memeg nug nag ole olas usih ospi dew am nag nug memeg ole olas usih ospi dew. Anig ge ařeg ole olas usih ospi dew am ařeg nug anig ole olas usih

ospi dew. Am anig nug aswa ole olas usih ospi dew am aswa nug anig ole olas usih ospi dew,” eko anan.

Sén Peksi Olag Mourar!

⁵⁴ Yesus danahas ku’rum amlagwa anan, “Ag fur kem nuakwa qaglew peksi ge, ofe’ ole ansi. ‘Gu nérigri se.’ Am qe me’re, gu ne. ⁵⁵ Am sén ag ulas kenariwa yalew ge, ag ansi. ‘Geisah kem gaga’rdig.’ Am qe me’re kem gag’re. ⁵⁶ Ag darmak ga’rlagwa ih Tiwur dimlamdak danah! Ag wanwa am saw karan sén kit’ru peko anakri ge dosi koutursi. Gam ke’rdi ag gei sén ewa ke’ ke’ beko ate qe peksi digu olag ospi moure? ⁵⁷ Ke’rdi ag agégé kowol mangu ih sakri ospi kepréksi dimlamursi? ⁵⁸ Na danah os na kitéri yago’ mirew pe, kugri né keprák lowa pi wanak ih umuwa né qe bawreksa olas usih melasri mena pe. Kawa ge, nug na keprák danah dowa wirko wanew ró danah ewlagwa meirew kalabuswa yanirlag. ⁵⁹ Da na anirina. Na kug noh qarég makri anak qe kunum mewe atew am nagurnah ospi meka malarip ge, na kalabuswari dindim ospi downen,” eko anan.

13

Danah Os O Pi Bulirig Ge, Paral Mérig

¹ Danah os Yesus ole sén qewa dessi Yesus anoreg. Galili danah os do’r manko Tiwur morak qe seppeg, Pailot anew aqarweg mousweg karlag noko do’r karag qe ole kawlian. ² Yesus anan, “Ag dosi ge, Galili danah mouseg ole qe hipunin asilag ge Galili danah la kunum dilag hipunin qe

érdak nouninah, qeri te ag kug qe og? ³ Kawa! Da ag anarina, ag olag pi buliew pe, ag ole qere ih paral melag. ⁴ Am danah 18 qere Siloam lo welah nañi karan uwa qiko aqarew mouseg qe, ag dosi ge, ag qe Yerusalem danahas la érareksi hipunin nouninah te seg? ⁵ Kawanah! Da anarina, ag olag buliar. Kawa ge, ag ole qere ih paral melag,” eko anan.

Guñaw Mou Pi Nieri Né Tonak

⁶ Am Yesus né tonak ene amlagwa marian. “Danah os wain dar nusig owa guñaw ker os kehew dian. Géri dimba ge, guñaw qe mou niew perigri atan, gam mou usihnah ospi niew pian. ⁷ Géri nug dar gumak danah nusig qe anoran, ‘Da makañ kiam qere guñaw ene mou niew perildi sén kuñum urirém, gam mou usih ospi niew pégin. Qeri na kowe qiar. Keñdi nug awen oko delle wan kirag pi malwew.’ ⁸ Gam dar gumak danah qe koñewa oko anan, ‘Danah nañi, minwe makañ usih la os ole dew. Am da diguwa wan kapatko mol morelle am kinkak ole diguwa méril. ⁹ Makañ os uwa mou niew pe, qe kena. Gam mou ospi niew pe, kuwi qirig,’ ” eko anan.

Yesus Sabatwa As Os Sew Wañe Pasaoran

¹⁰ Sabat derwa Yesus Yuda dilag binag mak lowa danahas Tiwurdi Néri duak maran. ¹¹ Am as os qewa dian ge koulli nou sew nug makañ 18 qere gumi tupiak, géri nug gumi mangu morakri olele kawa daré. ¹² Sén Yesus as qe peko ge, urwurew dow anoran, “As, da wañe nasip séwi pasaoré.” ¹³ Yesus qere anelle eweg as qe gumiwa mew, usihri asko mangu delle

Tiwur binag suman. ¹⁴ Yesus Sabatwa as qe sew kena man, qeri kuri danah Yuda dilag binag mak lori qe Yesusri uhribew danahas dilag anan, “Ag kekuak der la qewa ge uriyeksi anweg waré asilag sew pasaorar, gam Sabat derwa uriyeksi ge ag aw anweg waré asilag sew pasaorew,” eko anan. ¹⁵ Géri Nařinah kuri danah qe anoran, “Ag darmak gařlagwa ih Tiwur dimlamdak danah! Ag Sabat derwa makau am donki ole asilgar le marlagri pi te kusqareksi diareksi atsi? ¹⁶ Qeri as Abraham fuřuh ene Satan waréwa dagorew makař 18 qere dian. Nug Sabatwa kusqak murdil ge nouni te?” ¹⁷ Sén Yesus qere anew ge, danah nug kegeř moreg qe ag uřlag nan. Gam danahas ge nug kuak kunum kenanah san qeri olag gamag asan.

Mastet Égri Né Tonak

¹⁸ Géri Yesus anaran, “Tiwurdi Kingdom ge kité sillah? Da qe kité sillah eko andil? ¹⁹ Qe ker os wénih mastet ég sillah qe danah os oko dar nusigwa kehan. Ker qe beko naři mew ewegwa é kuřum uriyeksi sik uksi dasi,” eko anan. ²⁰ Am nug buliko anaran, “Da Tiwurdi Kingdom ge kité sillahnah eko andil? ²¹ Qe yis sillah. As os yis oko palawa nařiwa gogrew now kawlian. Yis qe sew palawa titiřko naři me qe sillah,” eko anan.

Ihřam Nagurdi Né Tonak

²² Yesus Yerusalem attigri atelle taun am kaw eraran ole qe danahas doulag patelle atan. ²³ Danah os kořmoran, “Nařinah, danah usih usih te foumak uksi sansan dalag?” Qere anew ge, Yesus anaran. ²⁴ “Ag ihřam nagur qewa

nolagri gagrag mes. Da anarina, danahas kuꝛum ihꝛam qewa nolagri selag, gam ospi noweg. ²⁵ Sén lo memeg asko ihꝛam manew ge, ag dimdim aseksi dessi ihꝛam qouqou oressi anlag, ‘Danah naꝛi, ihꝛam matulwe ig ole not,’ éksi anlag. Gam nug koꝛlagwa oko andig, ‘Da ag pi duarina am ag arewari uꝛiyéw.’ ²⁶ Qere anew ge, ag anlag, ‘Ig na ole ke am le ole let am na ig kawngwa dounig paten ole qe,’ éksi anlag. ²⁷ Gam nug koꝛlagwa oko andig, ‘Da ag pi duarina am ag arewari uꝛiyéw. Ag kunum kowol nou sak danah, ag uwa wanes! ²⁸ Sén qewa ge Abraham, Aisak, Yakop am profet kunum saw kappa deppeg piarlag. Gam ag ge minarak dimdim dessi, qeri olag nou mew kuanessi élag gaꝛmessi dalag. ²⁹ Geisah danahas kem bakwari, kem nuakwari, kenariwari am nanettiwari am wan atu kunumbari ole uꝛiyeksi awen asilag uksi saw kappa mallen naꝛi qewa dalag. ³⁰ Meꝛenah, danahas gei ag wenlag kawa dasi ge Tiwurdi Kingdom owa ag wenlag ole dalag. Am danahas gei ag wenlag ole dasi ge ag wenlag kawa dalag,’ ” eko anan.

Yesus Yerusalemri Kuanan

³¹ Sén qewa ih Farisi os duksi Yesusri aneg, “Na awen ene minka awen oswa eit, keꝛdi king Herod Antipas na iwirdigri se.” ³² Géri nug koꝛlagwa oko anan, “Ag ateksi qé déguꝛ qe ere anores, ‘Da gei keꝛew ole am atak ge danahas feꝛlagwa koulli nou geꝛardil am waꝛe danah séwi waꝛe pasaorlag. Am sén dasil uꝛiyew ge kekuak dasil malaril.’ ³³ Areg darig ge da gei,

keřew, am éřul attil. Keřdi Tiwurdi profet ge Yerusalem ih ařarweg moussi! ³⁴ O Yerusalem, Yerusalem! Ag ih Tiwurdi profet agrowa uřiyeg ge, qar touřeg am ařarweg mouseg. Sėn kuřum da maru anig nagur sougwa řaglarke tonare ře sillah, nir asilgar řaglardil sein, gam ag mineg. ³⁵ Ag řere dues! Gei Tiwur ag minarke loulag dimurdig. Da ag amlagwa anina. Ag da bulieksi ospi peřweg atew sėn uřiyew ag ere anlag, ‘Ig Nařinah Tiwur wėnihwa Danah uřirig ře binag mėnig,’ ėksi anlag,” eko Yesus anan.

14

Yesus Sabat Deřwa Waře Danah Os Sew Kena Man

¹ Sabat deř oswa Yesus Farisi dilag naři os lougwa ke lakri atan. Atew ag nug kařėoreksi koutoreg. ² Qewa ge, nug nohwa aminko danah os waře fėřu titřarak ole ře dewew pian. ³ Yesus Farisi am Řo duak danah ole kořmaran. “Sabatwa waře danah sew kena mak ge Řo dimlamdak te?” ⁴ Gam ag nė kawa deg. Gėri Yesus danah ře ořako sew kena mew ge anorew atan. ⁵ Atewew ge, Yesus kořmaran, “Ag eneri olagwa usih os nag te kawa makau nusig te os Sabat deřwa moř ořewa tolako now pe, ag ofeř pi te bėřuweg bew?” ⁶ Am ag nė ospi aneg.

Mallen Memeg Am Řo Danah Ole Dilag Ně

⁷ Sėn Yesus danah mallenwa ke lakri uřieg ře danah wenlag ole dilag awen qewa dalagri seweg peko ge, nė tonak ene anaran. ⁸ “Sėn danah os ag nug wakri mallenwa atakri anew

ateksi ge, ag danah wenlag ole dilag awen qewa aw daweg. Keŕdi danah os wénih naŕi ole na érđak úrwurweg úririg ge na pi dona. ⁹ Qere dew ge, mallen memeg a aŕié úrwattig ole qe doko anirdig. ‘Na danah ene awen mor,’ eko anew úŕan newew atka danah wenlag kawa dasiwa darip. ¹⁰ Gam sén na anew atka ge, awen danah wenlag kawa dasi qewa deppe, mallen memeg doko anirdig, ‘Lal, na aska atka awen kena danah wenlag ole dasiwa da,’ eko anirdig. Qe ge danah mallen qewa úrilag ole leipar qe nolagwa na wénim sumdig. ¹¹ Danah oun os nug nugégé wénih sumdig ge, Tiwur danah qe wénih qew nérig. Am danah oun os nug nugégé wénih pi sumdig ge, Tiwur nug wénih karan sumdig.” ¹² Géri Yesus mallen memeg qe amegwa anan, “Sén na ke naŕi os seka ge, na leipar, awnar kampar ole, nasipwari am leipar kehlag ole na mourirak dasi qe aw úrwarwen. Na qere sérip ge, ag ke séksi noh méksi na úrwirlag. ¹³ Gam na ke naŕi seka ge, o duak danah, danah ewlag félag nou ole am amlag gaŕu ole qe úrwarwe ates. ¹⁴ Qere sérip ge, ag noh makri olele kawa. Gam sén danahas mangunah ag Tiwur nohwa sirlag ge, Tiwur na noh mirko wittak mirdig,” eko anan.

Mallen Naŕiri Né Tonak

¹⁵ Danah os ke lelle Yesusri né qe doko ge anan, “Danah os mallen naŕi Tiwurđi kingdom owa ke lérig ge, nug Tiwur wittak kena morew o gamag asdig.” ¹⁶ Yesus né qe noh meko anan, “Danah os mallen naŕi órwelle danah kuŕum

urwaran. ¹⁷ Sén keke kunum bawarko malako ge kekuak nir anew atko danah urwaran qe anaran, 'Keke kunum bawrakra doweg atet,' eko anaran. ¹⁸ Danah urwaran ole qe kunum ole ag kekuak la ole, géri ospi atweg éksi aneg. Danah anqak qe anan, 'Da wan fou os daren mein, géri minwe da atko wan qe kitalko peril,' eko anan. ¹⁹ Os ge nug anan. 'Da tuménah makau 10 qere daren marin. Géri ag areg kekolag qe seweg peril qeri da ospi attil,' eko anan. ²⁰ Am la os ge anan, 'Da tuménah as win, géri ospi attil,' eko anan. ²¹ Kekuak nir qe buliko atko lo memeg qe amegwa anan. Anew ge, lo memeg qe uhribew kuak nir nusigri anan, 'Ofernah atka taunwa ih naři am nounu olewa o duak danah, ewlag félag nou ole am amlag gařu ole qe diarka uři,' eko anan. ²² Kekuak nir qe qere seko ge anan, 'Danah naři, na aniřam sillah sém, gam lo ospi ambé.' ²³ Géri mallen memeg kekuak nir nusigri anan. 'Na atka taun dimdim ih nařiwa am nounuwa ole keigarwe uřiweg da loul ambar. ²⁴ Da anarina, da danah tatam urwarwi mineg ole qe kunum mallen dasilwa ke nagurnah ospi leweg,' eko anan," Yesus qere anaran.

Yesus Dimlamdakri Kug

²⁵ Danahas ameg naři Yesus dimlamdepppeg, nug buliko danahas qe anaran. ²⁶ "Oun os dagrowa durigri dew pe, nug dasil o naři mousar. Am nug memegri am anigri, wawri, nir nusgur dilag, awgur kamgur dilag, am kéwingur dilag am nugégé nusig o naři niew pe, nug da begal diakri olele kawa. ²⁷ Am oun os nug nugégé nusig

ker mawanak ospi mouko am da pi dimlamiŕko pe, nug da begal diakri olele kawa*. ²⁸ Am ag olagwa danah usih os lo welah am karan os furigri ge, nug dako qarég gane tourko lo fuko malarigri qe dahmeko peko am digumérig. ²⁹ Keŕdi nug digumeko lo lagko am pi malarig ge, danah kunum lo qe peksi siwegkoleksi ere anlag. ³⁰ ‘Danah ene lo digumeko fuan gam nug malwakri olele kawa,’ éksi anorlag. ³¹ Am king os 10,000 fan danah ih ole nug king os 20,000 fan danah ole fan selasri ge, nug lia qe éŕurdigri ge delle dahmeko koutorko peko digumeko fan sérig. ³² Nug olele kawa dew pe, king os qe lawaŕ dewew danah os anarew keŕ ihwa olas usih melasri koŕmorlagri atlag. ³³ Am ih qewa, ag oun os nug keŕ keŕ nusig qe kunum pi dimorko pe, nug da begal diakri olele kawa.”

Sol Mumda Kawa

³⁴ “Sol ge keke kena, gam nug mumda kawa mew ge, areg seweg am buliko mumda ole darig? Kawa. ³⁵ Sol mumda ole kawa qe nug ker os diguwa wanwa meko ker ke morakri kawa, nug kekuak ole kawa. Qeri sol qe tourweg ate. Oun os doug né duakri ole dew pe, né ene doko koutorar,” eko Yesus anaran.

15

Sipsip Lariakri Né Tonak

* **14:27** 14:27 Ker mawanak mouko dimlamdak digu ge, nugégé nusig sak am o mourak dimorko am kug mawelle Tiwur dimlamdakri kowol.

¹ Der os takis wak danah am hipunin danahas ole qe ag Yesus né mariew dolagri úriyeksi qagleg. ² Gam Farisi am Mosesri Óo duak danah ole né né marieksi aneg, “Danah ene hipunin danah ole liam pateksi arié ke lési.” ³ Géri Yesus né tonak ene anaran. ⁴ “Ag olagwa danah os nug sipsip 100 qere ole darig am sipsip usih os lariew ge, nug areg sérig? Nug 99 qe minarew awen gisgar olewa deppeg am nug atko sipsip usih larie qe pi te mariko pew? ⁵ Am sén nug peko ge, o gamag asew sipsip qe sumko guqawa meko mouko louw ate. ⁶ Atko ge, nug leigur am nusigwari qe ole úrwarew úriyeksi qagulweg anare. ‘Ig onig gamag asar. Kerdi da sipsip dasil usih larian qe peko buliko wém.’ ⁷ Da anarina. Kowol qewa ih, hipunin danah os o buliew ge, saw kappa ole olag gamag asak nañinah nie am danah mangu 99 olag buliakri olele kawa qe dilag olag gamag ase qe érdak.”

Qarég Lariakri Né Tonak

⁸ “Qe sillah, as os qarég silwa* ¹⁰ qere ole am usih os lariew pe, nug areg sérig? Nug lam kamutko louw kinkak ekrelle yamorko mariko mariko peko urig. ⁹ Am sén nug peko oko ge, leigur am nusigwari qe ole úrwarew úriweg anare. ‘Ag da ole onig gamag asar, kerdi qarég silwa dasil larian qe peko buliko wém.’ ¹⁰ Da anarina. Kowol qewa ih, hipunin danah os o buliew ge, Tiwurdi doup qe ag ole olag gamag ase,” eko anan.

* **15:8** 15:8 Silwa qarég ene drakma. Qe der usihri kekuak noh.

Nir Geir Memeg Munurko Atanri Né Tonak

¹¹ Yesus né ene buliko anaran, “Danah os békuř arít ole daré. ¹² Géri nag dimbari ge memegri anan, ‘Mem, na keke wasařka dasil sillah qe miř.’ Géri memeg keke kunum nakuř dilas wasařko matan. ¹³ Wagam ole kawa, nag dimbari qe keke nusig kunum qaglew daren meg. Meweg qarég oko ořwelle atu os una qewa atan. Atko qewa delle ge, nug o mourakwa ih nouwa qarég sew kawa man. ¹⁴ Kawa mew dimba ge, atu qewa laké naři nian. Niew ge, nug digumeko qagrakwa dian. ¹⁵ Géri nug atu qewari danah os dowa kekurigri atew ge, danah qe sew atko awen qewa fo nusig ke marelle gumardé. ¹⁶ Nug laké qew fo tounam gone mardé ole qe lérigri o naři daré, gam ounté kité ospi mordé. ¹⁷ Sén dahmak kena nugrowa uřiyew ge, nug nugégé anan, ‘Da memri kekuak nir ge ag ke olele, gam da ge ewa lakéri mousdil sein. ¹⁸ Da mem dowa buliko atko andil, “Mem, da Tiwur nohwa am na nomba ole hipunin sein. ¹⁹ Da na nam eka anirđipri olele kawa, gam sewe da kekuak nir nasip de,” ’ eko andil, eko anan. ²⁰ Géri nug asko buliko memeg dowa atan. Gam nug ih una uřiyewew memeg peko nusig o dow guko atko qagru ořako gamnurko kis moran. ²¹ Géri nag memegri anan, ‘Mem, da Tiwur nohwa am na nomba ole hipunin sein. Da na nam diakri olele kawa.’ ²² Gam memeg kekuak nir nusgur dilag anan, ‘Ag oferé féřu bala kenanah qe uksi méksi mores. Eweg dořohwa ring ořaweg now am féř gařa méksi mores. ²³ Am makau yu titřaknah

qe qéksi ke naří seweg lettu onig gamag asar. ²⁴ Keřídi ig da nal ene mousko malwan qere dahmet, gam buliko uríyé. Nug larian, gam buliko peko wém.' Géri ag olag gamag asakwa ke naří qe leg. ²⁵ Sén qe, nag digam nug dara dian. Nug uríko lo mourko dolle ge, kasi sepegg uttulag duan. ²⁶ Géri nug kekuak nir os urwurew wanew ge, kořmoran, 'Uni keř sessi sési?' ²⁷ Kekuak nir qe anan, 'Na kamap ge buliko uríyé. Am na memen makau yu titřaknah qe qew ke naří sam. Keřídi nug nag larian qe gurak ospi wan kena ih buliko uríyew o gamag asew sé,' eko anan. ²⁸ Gam awag ge uhřibew lo owa nuak minan. Géri memeg dindim wanko lo owa nurigri sinanah kořmoran. ²⁹ Gam nug memegri anan, 'Na pe! Da makař kuřum nasip kekuak sam sein am né nasip ospi tappi nan. Gam qeri na meme yu usih ospi miřwe da leilar ole ke nag ospi séktu let. ³⁰ Sén na nam ene qarég nasip naří oko atko o mourakwa ih nouwa am ihwari as feřlagwa sew kawa mew, am buliko louw uríyew ge, na makau yu titřaknah qeka mořam,' eko anan. ³¹ Géri memeg anan, 'Da nal, na sansan da ole dařu. Am keke dasil kunum qe nasip. ³² Gam ig ke lettu onig gamag asé, keřídi na kamap ene mousan gam fouman. Nug larian gam buliko kappa uríyew ge, ig buliektu piam,' eko anan," Yesus qere anaran.

16

Kekuak Gumak Danah Duak Kena Ole

¹ Yesus bégur anaran, “Sén os danah kéhu oleri kuak nir dilag anqak danah keke nusig kunum gumardé ole qe daré. Deí os danah os atko danah kéhu ole qe amegwa kekuak nir nusgur dilag anqak danah qe qarég nusig sew kawa meré qeri anoran. ² Géri nug urwurew now koírmoran, ‘Danah nasip marisi qe meí te? Keídi na kuak qewari malwirdil, na qarég areg gumen qe kunum ole yaka mir,’ eko anan. ³ Géri kekuak gumak danah qe nugégé anan, ‘Danah nári da gumré ge kuakwari géíldig, géri da aregnah séril? Da dar kekuakri gagragsak ole kawa am da nuqak uíal ne. ⁴ Sén da kekuak ewari malwiréw ge, aregnah séwi danahas wirweg loulagwa danigri ge da duina,’ eko anan. ⁵ Géri nug né mew danah nári nusig qeri qarég noh makri danah qe usih usih uríyeg. Anuqko uríyan qe koírmoran, ‘Na keke gane bulika noh meka danah nári dasil murdip?’ ⁶ Danah qe né noh meko anan, ‘Oliw goíren siné 100 qere.’ Kuak gumak danah anoran, ‘Na pepa bulika noh makri ene oka oferé qere daka siné 50 ih qere ya,’ eko anoran. ⁷ Qe dímba am danah os dow koírmoran, ‘Am na ge keke gane noh mérip?’ Danah qe koírmak noh meko anan, ‘Reis bek 100 qere.’ Kuak gumak danah anoran, ‘Pepa bulika noh makri nasip enan da oka 80 bek ih qere ya.’ ⁸ Qeri danah nári qe kekuak gumak danah kena kawa qeri ‘Kena sam. Na duak kena ole,’ eko anoran. Keídi danah wan ewari ag keke gumarakri duak qe ag dosi koutursi, danah kamsahlak owari dilag duak qe eíarak. ⁹ Da

amlagwa anina. Keke wan ewariwa ag leilgar kehnares, geisah keke qe ole diakri s n olele morew, Tiwur ag sumarew saw kappa awen ole dalag. ¹⁰ Oun os nug keke nagur pesorko gumdig ge, nug keke na ri ole pesorko gumdig. Am oun os nug keke nagur nouni gumdig ge, nug keke na ri qe ole nouni gumdig. ¹¹ G ri wan k hu nouni gumarlag ge, oun nug saw kaw k hu me enah qe gumlagri mardig? ¹² Am ag danah osri keke nouni gumarlag ge, oun nug keke asilagnah qe mardig? Kawa. ¹³ Kekuak nir os danah na ri a rit dilas s n usihwa kekuakri olele kawa. Nug os ge dimorelle am osri ih o nirig. Nug os ge dimlamdelle am os ge mindig. Qe sillah ag Tiwur m riwanessi am keke wan ewari ole m riwanakri olele kawa,” eko anan. ¹⁴ Qere anew ge, Farisi qar gri olag nir  ole qe dueksi Yesusri n  siwkolessi aneg. ¹⁵ N  siwkolessi anweg ge, nug anaran. “Ag ansi, ‘Danah amlagwa ig mangunah,’ gam Tiwur ge ag olag pe am due. Danah ag ke  kekeri olag na ri nie ole ge, Tiwur amegwa keke qe nouninah.”

Yesus N  Ene Ole Marian

¹⁶ “Mosesri R o am profet dilag n  kusweppege u riyew Yonwa patan. Qe dimba ge, Tiwurdi Kingdomri n  kena qeri kusweppege u riye. Am danahas kunum qewa nolagri kekuak na ri s si. ¹⁷ Wan saw ole ge kawa m rigri kug kawa, gam Tiwurdi R o Yak ge nagurnah ospi kawa mew. ¹⁸ Danah oun os waw munurko am as la urig ge, nug do  dilag kowol qe s rig. Am danah os as

gému mundak urig qe ole nug doʻ dilag kowol qe sérig,” eko anan.

Danah Kéhu Ole Am Lasarus Ole

¹⁹ Yesus né marielle am né ene ole anaran. “Danah os kéhu ole am nug féru bala kena kenanah meré. Nug deʻ dorog keke kunum olele daré. ²⁰ Nusig kaʻ ihʻramba ge o duak danah os wénih Lasarus qe niré. Lasarus nug féru kunum isi olele morak. ²¹ Am nug danah kéhu ole qe lougwari ke le minak biʻra os lelemba daré. Am o duak danah ge qé isi meʻweppeg daré. ²² Sén dow o duak danah Lasarus mousew, Tiwurdi doup maweksi ateksi awen kena Abraham dianwa Abraham waʻutqorweg des. Danah kéhu ole qe ole mousew suhmeg. ²³ Nug kew pi qouse olewa gurak naʻrinah olle delle amnew tew ge, Abraham unanah uwa pian. Lasarus ole waʻutqorak dewew pian. ²⁴ Géri nug Abraham urʻwuran, ‘Mem Abraham, da nuqrina. Na dasil ot dow Lasarus anwe eweg guʻ noh lewa meko lémrul oug mérigri mar. Keʻrdi da kew ewa gurak naʻrinah wina,’ eko anan. ²⁵ Gam Abraham noh meko anan, ‘Nir dasil, na dahmor. Na wanwa keke kena ot nian ole qe kunum on, gam Lasarus ge keke nou qe diaran. Gam gei ge nug gamag asewew ewa de am na ge gurakwa dana. ²⁶ Am ole, ig gamnigwa kuhaʻ naʻrinah nie, géri oun ewari agrowa wanakri olele kawa am qewari ole igrowa ewa mataʻko duakri olele kawa.’ ²⁷ Danah kéhu ole ge Abrahamri anan. ‘Da nuqrina, mem! Lasarus anwe da memel lougwa atar. ²⁸ Keʻrdi da awlar kamlar tanig

ole ena dasi. Nug gagrag anarew da gurak duina awen enewa ag aw uříweg,' eko anan. ²⁹ Abraham noh meko anan, 'Mosesri Ro am profet dilag né yak nie, géri minwe ag qe dues.' ³⁰ Géri nug anan, 'Kawa, mem Abraham. Qe olele kawa. Danah os mousko am buliko asko atko amlagwa andig qe ih ge, ag dueksi olag bulirig.' ³¹ Abraham nug anoran, 'Ag Moses am profet ole dilag né dueksi pi dimlamurlag ge, danah mousko am sirko anarew qe ole ospi dueksi dimlamurweg,' " eko Yesus anan.

17

Yesus Hipuninri Anan

¹ Yesus bégur anaran, "Sak o kowol seweg danahas hipuninwa tolalagri qe uřílag, gam danah qe sérig ole ge nug kug os perig. ² Danah qe sew nir nagur ene os hipunin sew pe, nug fagwa qar naří eiseksi tourweg iwba nurig olelenah. ³ Qeri dahméksi koutores. Na liap nagrowa hipunin sew pe, gaía morwe buliko aw sew. Am nug o buliew kowol qe minko dimorew ge, hipunin noh nusig kusuqka dowe dout katiar. ⁴ Am nug deí usihwa nagrowa hipunin seko 7 qere patko am buliko sén 7 qere patak uříko 'Kowol qe nouni sém,' elle o buliew pe, hipunin nusig kusuqka dowe dout katiar," eko anaran.

O Meře Mak

⁵ Aposel* Nařinah anoreg, “Na sewe ig nasip onig meře mak naři mar.” ⁶ Nug noh meko anaran, “Ag olag meře mak nagurnah kapis ég sillah darig ge, ag ker naři giřam eneri anlag, ‘Na siřka atka iwba diřin noka be,’ éksi anweg nug dimlamurko qere sérig.”

Kuak Nirdi Kowol

⁷ “Né os anwi dolag. Ag olagwa usih os nug kuak nir nusig wan kopattig am sipsip gumardig. Sén nug kuak awenwari uřiyew ge, danah naři nusig ‘Na ere daka ke le,’ eko anurdig te? ⁸ Kawa. Nug ere andig, ‘Na le loka bawarka ke dasil se. Na amel meka deppe da ke lewi tatam, am na ke le.’ ⁹ Kuak nir nusig né dimlamurko keke kunum sérig, qeri danah naři nusig ‘Kena sam,’ eko ospi anew. ¹⁰ Géri ag ole Tiwur keř sakri ane qe kunum séksi malweksi ge, ag anes, ‘Ig kuak nir nasip sam. Ig kekuak migak qe sam,’ éksi anes,” eko anaran.

Yesus Lepra Danah 10 Qere Sew Pasaoreg

¹¹ Sén Yesus Yerusalem attigri atelle Samaria atu uřiko patak qe dimlamurko atan. ¹² Nug atko kaw oswa nowew, danah 10 qere leprasi ole peksi unaka pi waneg lawař deg. ¹³ Dessi ge, ag uřweksi anoreg. “O danah naři, Yesus! Na isanig ot duar!” ¹⁴ Sén nug piarke ge anaran, “Ag ateksi feřlag pris† ismares.” Ag atessi ge, ihwa feřlag pasaorew peg. ¹⁵ Danah 10 qe kunum

* **17:5** 17:5 Danah os Yesus nugégé toqarko meř arew kekuak nusig séksi ateg ole qe. Aposel ge Yesusri meř danah. † **17:14** 17:14 Tiwur am danahas ole gamlagwa Tiwurdi ofa mak danah

feřlagwa leprasi pasaorew peg. Gam danah usih os s3n f3ru pasaorew peko ge, fag nařıwa qalko Tiwur binag sumelle buliko uřıyan. ¹⁶ Nug atko Yesus nohwa ole f3gwa gatewa yako duk noko “Kenanah sam,” eko anoran. Am nug ge Samaria danah. ¹⁷ Yesus kořman, “Danah 10 qere s3wi feřlag pasaore. Am danah 9 qere ge arewa dasi? ¹⁸ Aregri uřıyak danah usih ene ih Tiwur binag m3rigri buliko uřıy3?” ¹⁹ Qere anelle Samariarer qeri anan, “Aska eit, na ot meře mak qewa Tiwur f3run sew pasaore,” eko anoran.

Danah Bega Buliko Uřıyewew S3n Areg Darig

²⁰ Deř os Farisi danah Yesus kořmoreg. “Ganeh Tiwur king beko danahas nusgur gumardig?” Yesus noh meko anaran, “Tiwurdi Kingdom digumeko b3rig ge ag amlagwa peppeg pi bew. ²¹ Danahas ‘Enan de,’ am ‘Unan de,’ 3ksi ospi anweg. Keřdi Tiwurdi Kingdom iril uřıyan danahas gamlagwa de,” eko anan. ²² Yesus b3gur dilag anan, “S3n qe uřirig qewa ag da Danah Bega deř usih os peiřlagri selag, gam ag ospi peiřweg. ²³ Danah anarlag, ‘Mesaia† nug unan de,’ am ‘Nug enan de,’ 3ksi anlag. Gam ag aw gueksi dimlamareksi atweg. ²⁴ Keřdi Danah Bega da uřirildi deřwa saw karan ampiř oko atu kunum olele more qe sillah peksi ge dolag. ²⁵ Gam tatam ge, da gurak nařı uril am geiri danahas dimiřlag. ²⁶ Nuari s3nwa danahas kowol nou ser3w qe sillah Danah Begari uřıyak s3nwa ole qere ih selag. ²⁷ Danahas ke leg, le

† **17:23** 17:23 Tiwur danahas nusgur buliko diardigri danah toqoran.

leg, danahas nug oppeg atew atew ole Nua kuh nařinah qe owa nuan. Sn qewa gu naři neko le kue naři bew paral meg. ²⁸ Qe sillah Lotri snwa ole qere serw. Danahas ke lessi, le lessi, keke darendi maressi, keke fou daren maressi, ke keharessi am lo fuaressi darw. ²⁹ Gam Lot Sodom minko atewew sn qewa ge, Tiwur sew kew am qar ařelle saw karandi gu sillah neko ařarew kunum ole paral meg. ³⁰ Qe sillah danahas pi bawrak deppeg deř qewa Danah Bega kamsahlak gun olewa uřirig. ³¹ Deř qewa danah os loug dimdim darig ge, lo owa keke nusgur diardigri pi now. Qe sillah danah os dara darig ge, lougwa keke diardigri buliko ospi atew. ³² Keř ihwa Lot waw paral man qe dahmores. ³³ Oun os nug nugg kowol kunum nusig dimlamurko ge, foumak sansan diakri ospi ow. Gam oun os kowol kunum nusig dimorko da dimlamřelle mousdig ge foumak sansan diakri urig. ³⁴ Da anarina. Danah Bega uřirig sn qewa danah ařit os tuřan ařiq nieppes ge, os ge olle am os ge munurdig. ³⁵ As ařit os ařiq ke sagřessa dalas ge, os ge olle am os ge munurdig.” ³⁶ (Danah ařit os ařiq dar usihwa dalas ge, os ge olle am os ge munurdig.) ³⁷ Yesus n mariko malwew, ag kořmoreg. “Nařinah, qe arewanah brig?” Nug kořmak noh meko anaran. “Awen arewa doř mousak os niewew ge, tum qewa qagulsi. Qe sillah, da lugmak ospi uřiwin ag dueppeg uřiril,” eko anaran.

As Qehrás Am Né Keprák Danah Ole Dilas Né Tonak

¹ Am Yesus nug Bégur 12 unuqorak pi minweg sansan unuqorlagri né tonak ene amlagwa anan. ² Nug anan, “Né keprák danah os taun oswa daré. Nug Tiwur pi farurdé am danah dilag ole pi dahmeré. ³ Am as qehrás os taun qewa daré. Nug bulibuli né keprák danah qe dowa atko nuqurko andé. ‘Kegeér dasil nouni siran. Qeri na da dimulwa daka né dasil kepar,’ eko anan. ⁴ Sén welah né keprák danah qe kité ospi san, gam dimba nug nugégé anan. ‘Da Tiwur pi fardina am danah dilag ole pi dahmeina. ⁵ Gam as ene bulibuli dagnéwa uriyew sériag iwre, géri né nusig keparko mangu murdil. Kerdi nug sew da kéwsil kawa ospi mew!’ eko anan.” ⁶ Am Yesus anan, “Né keprák danah mangu kawa nug keér eko anan qe dues. ⁷ Am Tiwur nug danahas nusgur kepraran qe dilag kug tuqan kémun ole unuqorakwa mursi ge, asilag seko pi te mangu morko mare? Nug qere duelle te darig? Kawa. ⁸ Da anarina. Nug oferdi mangu morko mardig. Gam sén Danah Bega da wan ewa buliko uriko ge, o mére mak danah os piardil te?” eko kořmaran.

Farisi Danah Am Takis Wak Danah Ole Dilas Né Tonak

⁹ Danah os ag dueg ge ag mangu essi am la kunum ge sam sillah duardéw qeri Yesus né tonak ene anaran. ¹⁰ “Danah arit os unuqorlasri Tiwur Lougwa ates. Os ge Farisi danah am os ge takis wak danah. ¹¹ Farisi danah qe asko lawar delle nug unuqoran. ‘Tiwur, da na kena

sam eko anirina, keŕdi da danah la kunum sillah kawa. Da yawsen danah kawa, sak nou sak danah kawa, danah la walgar diko weiyak danah kawa, am takis wak danah ene sillah kawa. ¹² Da kuha usihwa kurdako aŕit patina am keke kunum wina ge watiwi ameg 10 qere new ameg usih qe na mirina,' elle unuqoran. ¹³ Gam takis wak danah ge lawar asko delle saw karan os ole pi amnan, gam eweg damkowa meko delle unuqoran, "Tiwur, da hipunin danah. Na dasil ot dow hipunin dasil kusuqka mir,' eko anan. ¹⁴ Da anarina. Takis wak danah qe Tiwur hipunin nusig noh kusqew Tiwur nohwa danah mangu delle lougwa atan. Gam Farisi danah ge qere kawa. Keŕdi oun due nug wénih ole ge, Tiwur sew nug wénih kawa darig. Am oun nug due nug wénih kawa ge, Tiwur sew nug wénih ole darig," eko anan.

Yesus Nir Nounu Wittak Kena Maran

¹⁵ Danahas Yesus nir yu feŕlagwa eweg meko wittak kena mardigri dieksi dog. Sén Yesus bégur ag piareksi ge, gaŕa mareg. ¹⁶ Gam Yesus nir nounu urwarew nugrowa doweg ge anan. "Nir nounu paŕwarweg dagrowa dos. Ag aw dagarweg. Keŕdi danahas nir nounu ene sillah qe Tiwurdi Kingdom ge asilag. ¹⁷ Da meŕenah anarina. Danahas are nir nounu ene sillah ag Tiwur kallowa pi dalag ge, ag Tiwurdi Kingdom owa ospi noweg," eko anan.

Yuda Dilag Kuri Danah Kéhu Ole

¹⁸ Yuda dilag kuri danah os Yesus koŕmoran, "Duak marak danah kena, da aregnah seko

foumak sansan diakri uril?” ¹⁹ Yesus kořewa oko anan, “Na keřdi dasil kena eka anam? Ounté kena os kawa. Tiwur nug nugé ih kena. ²⁰ Na Tiwurdi Řo 10 dona: ‘Na watnah dewew as la ole aw weiwes, danah aw dug kowen, yawsen aw sewen, né dar aw mewen, am anin memen ole kallolaswa denna kořlas dimlamur,’ ” eko anoran. ²¹ Anew kuri danah qe anan, “Řo qe kunum ole da nir nagurwa delle dimlamurwi uríyan,” eko anan. ²² Sén Yesus né qe doko ge anoran, “Na ih usih os tuqren. Na kéhun kunum anwe daren meweg am qarég oka o duak danah marka ge, na saw kappari wittak kena qe urip. Qere seka ge, doka da dimlamír,” eko anan. ²³ Gam nug danah kéhu naři ole géri, sén Yesus qere anew doko ge neko qan. ²⁴ Géri Yesus danah qe neko qew peko anan, “Danah kéhu ole os keke nusig kunum minko Tiwurdi kingdomwa nurigri ge kug ole. ²⁵ Meřenah, doř naři wénih kamel ge keke titiyakri nil ořewa nurigri ge kug ole, gam danah kéhu ole ge Tiwurdi kingdomwa nurigri ge kug qe eřdak.” ²⁶ Danahas né qe dueksi Yesus kořmoreg, “Am oun ge foumak sansan diakri urig olele?” ²⁷ Yesus kořmak noh meko anaran, “Keř os danah sakri olele kawa ge, Tiwur ge sérig olele,” eko anan. ²⁸ Anew Pita anoran, “Ig na dimlamirnigri keke isangar kunum minaret,” eko anan. ²⁹ Anew Yesus anaran, “Da meřenah anarina. Danah os nug Tiwurdi kingdomri seko loug minko, waw minko awgur kamgur minarko, anig memeg ole am nir nusgur minarko asdig ge, ³⁰ nug sén wan ewa dewew saw kappari wittak kena kuřum tatam moran qe eřdak murdig am

keřew né foumak sansan diakri ole murdig,” eko anaran.

Yesus Mousko Am Asdigri Buliko Anan

³¹ Yesus Bégur 12 qe urwarew wanweg agé dessi anaran, “Ig Yerusalem tehut ge, Danah Begari né profet yeg qe kunum mou bérig. ³² Danah ag Danah Bega uksi Yuda danahas kawa la qe ewlagwa melag. Meweg ag geisah nug siwegkolessi uksiuksi qoressi sunu qessi qisleksi am qeweg mousdig. ³³ Gam deř kiamba ge nug buliko asdig,” eko anan. ³⁴ Nug Bégur ag né qe kunum dueg, gam olag ospinah mouran. Né digu lugman, géri ag nug keř eko marian ge sam sillah dueg.

Yesus Danah Ameg Gařwak Ole Sew Kena Man

³⁵ Yesus Yeriko wandigri wanewew, danah os ameg gařu ole ih dougwa ninapiřko delle nuqran. ³⁶ Sén nug danahas ameg naři duksi érdeksi ateppeg uttulag doko kořman, “Areg sé?” ³⁷ Danah os anoreg, “Yesus Nasaretrer qe doko wane,” éksi anoreg. ³⁸ Anweg ge, nug uruko anan, “Yesus, Dewit fuřuh, na dasil ot dow pe kéhniř!” eko anan. ³⁹ Danah anqeksi waneg qe gařa moreksi, “Na torka da,” éksi anoreg. Gam nug qalko urwan, “Dewit fuřuh, na dasil ot duar!” eko anan. ⁴⁰ Yesus fég yako delle nuqak danah qe omalko nugrowa duakri anan. Unaka dow Yesus kořmoran. ⁴¹ “Na da keř sérildi ot nie?” eko anan. Anew danah ameg gařu ge anan, “Nařinah, da amindil ol nie,” eko anan. ⁴² Anew Yesus anoran, “Na amin. Na ot meře mak qewa Tiwur sew kena mam.” ⁴³ Usihri

nug ameg koptew ole Tiwur binag melle Yesus dimlamdan. Sén danah kunum qe peksi ge, ag ole Tiwur binag meg.

19

Sakias Takis Wak Danah

¹ Yesus Yeriko taun owa noko ih dimlamurko atan. ² Danah os wénih Sakias nug qewa dian. Nug takis wak danah qe dilag kuri am nug kéhu ole. ³ Nug Yesus ge oun qe perigrinah san gam olele kawa. Kerdi nug danah kutuk am danah kuřum am qataorak. ⁴ Géri nug anuqko guko atko guřaw ker naři os teko Yesus qere wanew perigri qewa ameg meko dian. ⁵ Sén Yesus awen qewa wanko amnew tew peko ge anoran, “Sakias, na ofer ne. Kerdi da gei ole na loutwa daril.” ⁶ Géri Sakias usihri neko gamag asakwa Yesus gamnurelle omlew lougwa ates. ⁷ Danahas kunum qere peksi Yesusri né né marieg, “Nug aregri hipunin danah enenah lougwa řo até,” éksi aneg. ⁸ Louw ge Sakias asko Nařinahri anan, “Nařinah, na né ene doka. Da keke dasil kunum gamagwa watiko leis ge o duak danah mardil. Am da oun os darmakwa qarég kařdin ge wařos patak noh meko murdil,” eko anan. ⁹ Yesus anoran, “Gei ole Tiwur na fénarwa ole dilag hipunin noh kusqé. Am danah ene ole Abraham fuřuh. ¹⁰ Qeri Danah Bega nug oun os gattu owa de qe mariko peko buliko ow Tiwurdi uhřibak éřurdigri uřiyan,” eko anan.

Kekuak Nir 10 Dilag Né Tonak

¹¹ Yesus né qe mariew duepppeg, nug Yerusalem mourak nuan am danahas ag Tiwurdi Kingdom usihri wanwa bérig éksi dahmeg. Géri Yesus né tonak ene anaran. ¹² “Danah binlag ole qe fu’uh os atu una oswa atew king darigri wittak morew u’irigri atan. ¹³ Géri nug kekuak nir nusgur 10 qere anew noweg usih usih qarég gol mina* awen awen qere maran. Marko ge anan, ‘Qarég ene uksi kekuak morepppeg da buliko u’iril,’ eko anaran. ¹⁴ Gam danah nusgur os danah na’ri qeri olag pi nian ole qe danah la os nug dimugri me’arweg danah na’ri qe atanwa ateksi, ‘Ig danah ene king isanig diakri onig pi nie,’ ellagri ateg. ¹⁵ Gam nug king beko buliko kawagwa u’riyan. U’riko ge, kekuak nir nusgur 10 qere qarég maran ole qe dilag né man. ‘Ag qarégwa kekuak areg seg?’ qe dorigri ko’maran. ¹⁶ Kekuak nir anuqko duan qe anan. ‘Danah na’ri, qarég na mi’ren qe kekuak murwi qarég gol mina 10 la ole qa’ewa ban,’ eko anoran. ¹⁷ Anew king nusig doko ge anan, ‘Kena sen. Na kekuak nir dasil kena. Na qarég nagurwa kekuak kena sen, géri gei na taun ten qere gumardipri anina.’ ¹⁸ Am a’rit patak qe doko anan, ‘King dasil, qarég nasip kekuak murwi qarég gol mina tanig ole la qa’ewa ban,’ eko anan. ¹⁹ Anew ge king nusig anoran, ‘Na taun tanig ole gumardip.’ ²⁰ Am kekuak nir kiam patak qe doko anan, ‘King dasil, qarég gol mina usih nasip na mi’ren ge enan. Da lamén qariwa saputko pesorko méwi dian. ²¹ Na danah gagran

* **19:13** 19:13 Mina usih ge kalam kiam kekuakri noh olele.

ole. Ke' os na pi kehna qe na funa, am danah la os keke mési qe ole na ona. Qeri da na fa'irko qere sein.' ²² King nusig qe ko'ewa oko anoran, 'Na kekuak nir nou am né nasip dimlamdak ge séwi noh urip. Na duen ge da danah gag'ral ole am danah la os keke mési qe da wina am danah la kéhsi qe ole da fuina. ²³ Na kérdi qarég dasil buliko uriko qa'ewa noh la ole olem, gam na qarég lougwa pi men?' eko anan. ²⁴ Anko ge, danah aseksi deg qe dilag anan, 'Qarég nusig ka'rdeksi danah qarég gol mina 10 la qa'ewa sew ban ole qe mores.' ²⁵ 'King na'ri, nug qarég gol mina 10 ge iril wé,' éksi aneg. ²⁶ Anweg anaran, 'Da anarina, oun os ke' os pesorko gumdig ge, fou la ole urig. Gam oun os ke' nagur ole am nouni gumdig ge, da nug qe ka'urdil. ²⁷ Gam keger' dasil da king asilag diakri mineg ole qe diareksi duksi da nolwa aqares,' " eko Yesus anaran.

Yesus Yerusalem Nuan

²⁸ Yesus qere anko ge, Yerusalem attigri anu'ko atan. ²⁹ Yesus kaw arit Betfage am Betani ole Oliw qouku éksi ansi qe sékuwa dasa qe mouratak wanan. Wanko ge, béku' arit me' atew anqeksa atepes anatan. ³⁰ "A kaw uniwa ateksa waneksa ge, donki os fou kena mak ounté os pi teko weiyan ole qe qagak dewew pelas. Peksa ge, kusqeksa oksa uriyes. ³¹ Oun os a kérdi donki kusuqsa eko ko'rmew ge anores. 'Na'ri nah kekuak murdigri kusuq'ru,' eksa anores," eko anan. ³² Béku' arit qe ateksa ge nug anan qe sillah ole pes. ³³ A donki fou kena mak qe

kusqepes donki memeg koʻrmateg. “A keʻrdi donki kusuqsa?” éksi aneg. ³⁴ A koʻrmak noh meksa anes. “Naʻrinah kekuak murdigri,” eksa anares. ³⁵ Géri donki oksa Yesus dowa uʻriyeksa ge, siot asilas qaʻewari qe uʻreksa donki qaʻewa duqessa, Yesus eweg oʻrawes teko donki karan dian. ³⁶ Yesus donkiwa atewew, danahas siot asilag qaʻewari uʻreksi ihwa duqarepppeg nug qaʻewa atan. ³⁷ Sén nug Oliw qouku minko nuakri ih qewa dowew ge, nug bégur dimlamdeg qe kunum ole olag gamag asakwa diguméksi qaleksi Tiwur binag sumeg. Keʻrdi ag Yesus mirakel sew piareg. ³⁸ “King Tiwur Naʻrinah wénihwa uʻriye ge nug wittak more. Saw kappa Tiwur ole maror nirig am Tiwur karannah nug binag karan sumnig.” ³⁹ Am Farisi la os danah ameg naʻri qe owa deg qe Yesusri aneg, “Duak marak danah, na begpar gaʻra marwe mines,” éksi aneg. ⁴⁰ Yesus noh meko anaran, “Da anarina. Danah ene torweg ge, qar koʻrlag koptew uʻrwessi binag sumlag,” eko anan.

Yesus Yerusalemri Kuanan

⁴¹ Sén Yesus atko unaka wanko Yerusalem taun naʻri qe peko ge, o dow kuanelle anan. ⁴² “Yerusalem danahas, ag olag duaknah! Ag Tiwurdi maror owa kena diakri qe dollewri kenanah. Gam ag amlag gaʻrwé dasi. ⁴³ Sén qe uʻriyew ge, keger asilag fanlag uʻriyeksi kaʻr asilag taliloreksi wan qagulweg tew, o mareksi dalag. ⁴⁴ Am taun asilag logréksi ag aqeksi keke kunum ole seweg nou mérig. Am qar usih os minweg

lia qařewa ospi dew. Kerđi ag s3n Tiwur agrowa urıyan ge, peksi olag pi mouran,” elle kuanan.

Yesus Tiwur Lougwa Duak Maran

⁴⁵ Yesus Yerusalem noko Tiwur Lougri karı owa atko qewa danah keke irardi m3ksi deppeg nug piarko ge digumeko lamaran. ⁴⁶ Nug ere anelle lamaran, “Tiwurdi N3 yak ere ane, ‘Da loul ge unuqorakri lo.’ Gam ag seweg yawsen danah dilag lariak awen sillah beko se,” eko anan. ⁴⁷ Nug sansan Tiwur Lougri karı owa danahas doulag patt3. Gam pris dilag anqak danah, Mosesri R3o duak danah am Yuda dilag kuri danah ole ag Yesus qeweg mousdigri ih marir3w. ⁴⁸ Gam ag ih ospi peg, kerđi danahas kunum n3 nusig dolagri ser3w.

20

Kuri Danah Yesus Kuakri Wittak Sew Pelagri Kořmoreg

¹ Derı os Yesus Tiwur Lougri karı owa danahas duak marelle am N3 Kena kuswewew, pris dilag anqak danah, Mosesri R3o duak danah am Yuda dilag kuri danah ole duksi anoreg. ² “Na anwe ig duet. Na kuakri wittak arwari oka Tiwur Lougwa kuak ene sena? Na oun kuakri wittak qe mirew sena?” ³ Nug kořlagwa oko anan, “Da ole ag kořmardil. ⁴ Ag anweg due, Yon le luaran ge kuakri wittak Tiwur dowari te, kawa danah dowari te oko san?” ⁵ Ag ag3g3 marieksi aneg, “Saw kappari ektu annig ge nug kořmigdig. ‘Ag kerđi nusig kuak qeri olag meře pi man?’ ⁶ Am

ig Yonri kuakri wittak danah agopri éktu annig ge danahas uni kunum qar uksi kuiglag, kérdi ag olag mére me ge Yon ge Tiwurdi profet.” ⁷ Géri ag Yesusri aneg, “Arewari té ge ig pi dotu.” ⁸ Qeri Yesus anan, “Da ole oun kuakri wittak miréw kekuina ge ospi anwi doweg,” eko anan.

Wain Dar Gumak Danah Nou Dilag Né Tonak

⁹ Am Yesus né tonak ene danahas amlagwa anan. “Sén danah os wain dar na’ri kehko am nug danah os wain dar nusig gumeksi morlagri mine marelle ge, nug atu una oswa atko wagam darigri atan. ¹⁰ Wain mou wegak sénwa nug sew kekuak nir nusig os wain dar gumak danah ge agop wain mou os morlagri atan. Gam wain dar gumak danah ge mou’weksi anweg eweg sam buliko atan. ¹¹ Nug kekuak nir la anew atan, gam ge ole mou’weksi nouni sorweg eweg sam am buliko atan. ¹² Wain dar memeg kiam patak kekuak nir os mew atew ge, mou’weksi karag moreksi keigorweg dar dimdim atan. ¹³ Géri wain dar memeg anan. ‘Da aregnah séril? Da nir dasil ol mouse ole ge attig ge, né nusig dueksi dimlamurlag té,’ elle anew wain dar gumak danah ge agop atan. ¹⁴ Gam sén wain dar gumak danah dar memeg nag ge peksi ge, ag agégé né qageksi aneg. ‘Danah ene wain dar memeg mérig. Doweg qéhut mousew dar ge isanig darig,’ éksi aneg. ¹⁵ Géri keigoreksi be’weksi dar dimdim ateksi qeweg mousan. Qeri wain dar memeg ge aregnah sardig? ¹⁶ Nug uriko wain dar gumak danah ge sew aqarweg mousweg am dar oko danah la gumlagri mardig,” eko anan. Sén

danahas né tonak qe dueksi ge aneg, “Qere aw bew.” ¹⁷ Yesus kittarko delle kořman, “Qere ge Né yak ene digu areg? ‘Lo fuak danah wandor mineksi gerdeg ole qe lo memeg wandor qe oko gamagwa lagew delle lo mawe.’ ¹⁸ Danah wandor qe qařewa tolalag ole ge, kunum ole kaduřlag. Am wandor qe oun os qařewa tolarig ge, maduřew nounu nérig. Qe sillah, oun os nug da dimiřdig ge nug paral mérig,” eko anan. ¹⁹ Mosesri Řo duak danah am pris dilag anqak danah ole ag dueg ge, né tonak qe asilag nou qe uřameko marian. Géri sén qewa ih ag ih os peksi ořalagri seg, gam ag danahas dilag fařeg.

Yuda Danahas Sisari Takis Melag Te?

²⁰ Mosesri Řo duak danah am pris dilag anqak danah ole ag Yesus kařéordéw. Géri ag danah os darmak danah anweg danah mangu sillah ateksi yawsen amneksi Yesus pelag ateg. Ag nug keř os nouni anew qewa ořweksi wan atu dilag kuri danah kuakri wittak morak am gagragsak ole qe ewegwa melagri ateg. ²¹ Géri yawsen amnak danah qe Yesus kořmoreg. “Duak marak danah, ig dotu ge na né mangu ih marina, ismigna am na danah kunum nouni ospi sarna. Am na né meře Tiwur danahas areg dalagri o nie qe ismarna. ²² Na an, ig sétu sillah Sisari takis touřnig kena te, kawa te?” ²³ Yesus darmak dahmak asilag qe doko anaran. ²⁴ “Qarég silwa os seweg pawi. Oun dorogrog am wénih ole qewa de?” eko kořmaran. ²⁵ Ag kořewa uksi aneg. “Sisa dorogrog am wénih ole.” Nug anaran, “Aria! Sisari ge Sisa mores, am Tiwurdi

ge Tiwur mores,” eko anan. ²⁶ Ag Yesus né nouni os anew dolagri dahmeg, gam sén nug danahas ole dessi nug né nouni usih ospi anew dueg. Ag nug né noh man, qeri dorlag new ole toreksi deg.

Mousko Am Dimba Diakri Kořmak

²⁷ Sadusi* os danah mouseksi am bulieksi pi asweg éksi andéw ole qe uriyeksi Yesus kořmoreg. ²⁸ “Duak marak danah, Moses Řo isanig yan ge danah os mousko as nir kawa mundew ge, kamag as qe oko awagri nir os memandig. ²⁹ Sén os awag kamag 7 qere daréw, géri awlag digam as os wan, gam as qe nir kawa dewew gému qe mousan. ³⁰ Mousew am dimugwari qe wan, am qe ole as nir kawa dewew mousan. ³¹ Qe sillah kiam patak am atko 7 patak qe kunum ole as qe og, gam nir kawa dewew mouseg. ³² Qe dimba as qe ole mousan. ³³ Am buliko sirak sénwa as qe awag kamag 7 qe kunum og, géri as qe oun waw darig?” éksi kořmoreg. ³⁴ Yesus né qe noh meko anan, “Danahas wan ewa dasi ag nug usi. ³⁵ Gam Tiwur sew danahas mousak sireksi foumak olag ole qe nug wak ospi niew. ³⁶ Ag saw doup sillah dalag, géri ag ospi mousweg. Ag Tiwurdi nir dalag, kérdi ag Tiwur sew sireksi foumak olag. ³⁷ Am Moses ole ker nagur os arakri né yakwa ismige ge, mousak bulieksi sirlag. Qeri nug Nařinah Tiwurdi ere anan, ‘Abrahamri Tiwur, Aisakri Tiwur am Yakopri Tiwur ole,’ eko anan. ³⁸ Géri ig Mosesri né qewa dotu ge Abraham,

* **20:27** 20:27 Sadusi pris ameg os danah mouseksi pi bulieksi assi qeri olag meře me.

Aisak am Yakop ge Tiwur ole fou dasi. Keŕdi mousak danah Tiwur binag pi mési, gam danah fou dasi qe Tiwur binag mési. Keŕdi nug nohwa danahas nusgur ge kunum fou dasi,” eko anan. ³⁹ Mosesri Ró duak danah os Yesusri aneg, “Duak marak danah, na né noh mangu anam.” ⁴⁰ Qeri ounté koŕmak fou la ole ospi san.

Yesus Dewit Fuŕuhri Koŕman

⁴¹ Am Yesus kuri danah qe koŕmaran, “Aregri ere ansi Kristus† ge Dewit fuŕuh? ⁴² King Dewitri Kasi Yakwa ere ane, ‘Naŕinah Tiwur, Naŕinah dasil Kristusri anan: Na ewel kenariwa deppe, ⁴³ da kegeŕ nasip taparko séwi nuksi na kallonwa dalag,’ eko ane. ⁴⁴ Dewit nug ‘Naŕinah,’ eko anore, gam areg nug Dewit fuŕuh darig?” eko koŕmaran.

Yuda Kuri Danah Dilag Kowol Nou

⁴⁵ Danahas kunum duepppeg Yesus bégur dilag anan. ⁴⁶ “Ag Mosesri Ró duak danah dilag dahmes. Ag feŕlag bala welah kena méksi maket awenwa weiyeppeg danahas piareksi felqarlagri sési. Am Yuda dilag binag mak lowa danah wenlag ole dasiwa dalagri sési. Am mallen sénwa danah wenlag ole dilag diak awenwa dalagri sési. ⁴⁷ Ag as qehŕas dilag keke kunum darmak ihwa memeg mési am qe tonlagri dessi unuqorak welah welah sési. Danah qere ge sak nou noh asilag qe nouninah mardig,” eko anan.

† **20:41** 20:41 Kristus ge Mesaia. Tiwur danahas nusgur buliko diardigri danah toqoran.

21

As Qehrás Ofa Man

¹ Yesus Tiwur Lougwa delle danah kehlak ole Tiwurdi ofa mak awenwa qarég meppeg piaran. ² Am nug as qehrás os o duak ole qarég 10 toia arít ih ole mewew pian. ³ Peko ge nug anan. “Da meřenah anarina. As qehrás uni o duak, gam nug qarég ofa mé ge, danahas uni kunum érarak naři mé. ⁴ Danahas la kunum ge qarég asilag naři dewew am qarég sirin ge méw, gam as uni ge o duak as gam nug keř os oko lellori sillah ge qarég qe kunum ole mé,” eko anaran.

Tiwur Loug Qiko Nérig

⁵ Sén qewa nug bégur os aneg. “Tiwur Loug ene qar kena kenawa fueg am Tiwurdi ofa meg qewa bala moreksi koutoreg,” éksi aneg. Gam Yesus anan. ⁶ “Sén os uríyew ge, keke kunum pesi qe qiko neko kaddurđig am qar usih os lia qařewa ospi dewew peweg,” eko anan.

Yesus Kug Uririg Qeri Anan

⁷ Ag kořmoreg, “Duak marak danah, na anam keke qe ganahnah bérig? Ig keřnah pektu am donig ge qe bérigri sén unaka de?” ⁸ Yesus anan, “Geisah ag darmarwegra, dahméksi koutores. Geisah danah kuřum da wénilwa béksi ‘Da Kristus,’ am ‘Geiri kuagřak sén ufiko malwé,’ éksi anlag. Gam danah qe aw dimlamarweg. ⁹ Sén ag wan atu oswa fan neihwah am karak neihwah dueksi ge, ag aw fařweg. Keke qe tatam belag, gam malwakri sén qe ofer ospi bew.” ¹⁰ Yesus buliko anaran, “Wan atu os asweg wan

atu la ole fan selag am king os asew king la ole fan selas. ¹¹ Mim nañi atu kuñumba nérig am atu kuñum laké nañi niewew kousarlag am wañe nouni ole belag. Am saw karan fañakri keke am kowol wagé wagé ole béksi atlag. ¹² Gam keke qe kunum pi bak dewew, ag da dimlamirñlag qeri orwareksi beñwareksi Yuda dilag binag mak lo owa nolag am gurak maressi nouni saressi kalabuswa yanarlag. Am ag dieksi king am wan atu dilag kuri danah agop ole wanlag. ¹³ Sén qewa ag dasil olag meñe me qe ag anarlagri sén darig. ¹⁴ Qeri ag olag meñe mak gagrag diar. Ag keñ éksi anarlagri tatam aw dahmeweg. ¹⁵ Da ag kegeñ asilgar dilag né noh melagri né am dahmak kena ole mardil. Qeri ag kegeñ asilgar né asilag ospi qeweg new am ospi kotañweg. ¹⁶ Sén qewa ag da dimlamirñlag, qeri ag memelgar anilgar am awalgar kamalgar am leilgar ole kegeñ marlag. Am geisah ag la os ge aqarweg mouslag. ¹⁷ Ag da dimlamirñlag, qeri danahas kuñum asilag olag nou mew kegeñ marlag. ¹⁸ Gam ag kurlag urug usihnah ospi lariewra, qeri ag aw fañweg. ¹⁹ Ag da dahuhul dalag ge, ag founak sansan diakri olag.”

Yerusalem Taun Logarñdig

²⁰ “Sén ag fan danah uriyeksi Yerusalem o morweg peksi ge, ag dolag ge wagam kawa nug logarñlag. ²¹ Sén qewa danahas Yuda dalag ge, kum oleksi qoukuwa ates. Am danahas taun qewa dalag ge, taun qe mineksi kum ates. Am areg os taun dimdim dalag ge, aw bulieksi owa noweg. ²² Keñdi sén qe Tiwur Yerusalem danahas

kug asilag qe noh mardig am Tiwurdi Né yakwa nie qe kunum ole mou bérig. ²³ Sén qewa ge, as olag ole am nir yu ole ge kug nařinah pelag, keřdi ag kum atakri olele kawa. Keřdi kug narinah atu qewa bérig am Tiwurdi uhřibak danahas qewari dilag qe noh meko mardig. ²⁴ Danahas os ge fan barinwa kotřarlag. Am os ge ořwareksi diareksi wan atu la kunumba kalabuswa atlag. Am Yerusalem taun ge Yuda danah kawa danah la qe tutuweg atew Tiwur sén moran qewa pattig,” eko anan.

Danah Bega Buliko Uřirig

²⁵ Yesus buliko anaran. “Sén qewa kowol os kember kalamba am sořwéwa ole beweg piarlag. Wanwa danahas kunum iw kořkoř naři qelle urwag nérig qe dueksi olag fařew am dahmak kařwarew kité ospi seweg. ²⁶ Danahas kuřum wan ewa keř bérig qe peksi olag fařew amlag tařirig. Keřdi saw karan keke gagragsak naři ole qe kunum sahařlag. ²⁷ Sén qe ge Danah Bega da lombigwa gagragsak naři ole am kamsahlak naři gun olewa uřiyepi kunum peiřlag. ²⁸ Sén keke qe kunum digumeko bewew ge, ag gagrag méksi aminweg karan tew des, keřdi Tiwur ag gattu owari buliko diarko kusqak mardigri sén unaka durig,” eko anan.

Guřaw Kerdi Né Tonak

²⁹ Yesus né tonak ene bégur anaran. “Guřaw ker am ker la ole piales. ³⁰ Sén ker qere lounweg ge, ag agégé dolag qe kem sén durig malwe. ³¹ Qe sillah, da aném qere bew peksi ge ag dues.

Wagam kawa ge Tiwurdi Kingdom bérig*. ³² Da meřenah anarina. Geiri danahas pi mousak deppeg keke aném qe kunum bérig. ³³ Wan saw ole ge qerórdig, gam né dasil ge nagurnah ospi kawa mew.”

Yesus Buliko Uřirigri Dahmessi Des

³⁴ “Dahmessi des! Ag ke lelle am le leko gar qakri aw dahmeweg. Ag wan ewa kena diakri naři aw dahmeweg. Ag kowol qere séssi dalag ge, da agrowa pi duepppeg uřiril. Keřdi dasil uřiyak deř qe pelem sillah darig. ³⁵ Geisah wanwari danahas kunum kug qewa dessi pelag. ³⁶ Dahméksi koutoressi am bulibuli Tiwurdi unuqorweg gagrag qarar. Qewa ge, kug belag qe eřdessi deppeg Danah Bega da uřiwi nolwa sirlag,” eko anaran. ³⁷ Yesus kemunwa deř dorog Tiwur Lougwa duak mardé. Am tuqan ge nug atko Oliw qoukuwa daré. ³⁸ Danahas kunum furwanah Tiwur Lougwa Yesus duak mardigri qaguldéw.

22

Yudas Yesus Kegeř Ewlagwa Mérigri Ih Marian

¹ Yuda dilag mallen beret yis kawa oleri wénih Nanřurak Deř* qe unaka duan. ² Am pris dilag anqak danah am Mosesri Řo duak danah ole ag danahas fařareksi larieksi Yesus orweksi qeweg

* **21:31** 21:31 Tiwur danahas nusgur dilag king delle gumardig.

* **22:1** 22:1 Nanřurak Deř ge Yuda dilag mallen os. Sén Yuda danahas Isip darew qe, mousak nir danah anqakri nanřaran qe dahmorakri sén.

mousdigri ih marieg. ³ Sén qewa ge, nou memeg Satan, Yesus Béгур 12 qe olagwa usih os wénih Yudas Iskariotrer qe owa nuan. ⁴ Now ge Yudas atew pris dilag anqak danah am Tiwur Loug gumakri felag tutu dilag kuri danah ole Yesus areg ag ewlagwa mérigri né marieg. ⁵ Qeri ag olag gamag asew Yudas qarégwa daren morlagri né fag qeg. ⁶ Yudas ag aneg qeri o niew digumeko ih are os peko, danahas pi duepppeg Yesus ag ewlagwa mérigri ih marian.

Yesus Békuř Nanřurak Deřdi Ke Bawres

⁷ Yuda dilag mallen beret yis kawa oleri qe duan. Deř qewa ge Yuda danahas Nanřurak Deřdi sipsip yu aqeksi mallen qewa lelagri sén. ⁸ Yesus Pita Yon ole meřatko anatan. “A ateksa Nanřurak Deřdi ke lakri isanig bawres,” eko anan. ⁹ Gam a kořmores, “Nařinah, i ke arewa bawarnit?” ¹⁰ Yesus anatan, “A Yerusalem taunwa noksa ge danah os le witko mouko wanew pelas. Peksa ge, dimlamurwes lo nug nurig ole qewa nos. ¹¹ Sén a lo qewa noksa ge, lo memeg ere kořmores. ‘Duak marak danah nasip ere ané: Da Beglar 12 qe ole kurug arewa Nanřurak Deřdi ke lenig?’ eksa anes. ¹² Lo memeg ge lo karan awen naři os tewol ole keke kunum bawrak ismattig. Qewa ge, ig Nanřurak Deřdi ke lenigri bawres,” eko anatan. ¹³ A ateksa ge, Yesus anan qe sillah keke kunum pes. Peksa ge, Nanřurak Deřdi ke qewa bawres.

Nařinahri Ke

14 Sén Nanrurak Deédi ke qe lakri dow ge, Yesus aposel† nusgur 12 qe ole lo qe karan ke bawres awen qewa tewol o moreksi ninaqireksi deg. 15 Dessi ge, nug anan. “Da ol nari nie ge ag ole Nanrurak Deédi ke ene léktu tatam am da gurak oko mousdil. 16 Da anarina. Da Nanrurak Deédi ke fou la ospi léwin atew ole mallen ene digu ambo meko Tiwurdi Kingdomwa bérig,” eko anan. 17 Anko malako ge, Yesus wain kapwa qériak oko, Tiwurdi kena sam elle unuqorko Béгур dilag anan. “Ene uksi arié les. 18 Da anarina. Gei digumak da buliko wain ospi léwin atew sén uriyew Tiwur wan eneri King bérig,” eko anan. 19 Am Yesus beret os oko, Tiwurdi kena sam elle unuqorko temew nounu new marko anan. “Ene ge da férul. Da asilag seko mardil. Ag ere sesissi da dahmires,” eko anan. 20 Ke léksi malweksi ge, Yesus kap wain ole os oko ge anaran. “Wain kap owa ene da karal. Qewa Tiwur titwanak fou danahas dilag sérig. Da karal qe asilag seko gogoórdig. 21 Gam ag peksi! Danah da keger ewlagwa meirdig ole qe da ole tewol usihwa arié ke leú. 22 Danah Bega ge Tiwur ih man qewa mousdig. Gam danah oun nug keger ewlagwa mérig ole qe ge nug kug os perig,” eko anan. 23 Sén Béгур ag né qe dueksi ge, ag agégé ounnah qere sérig essi kořmeweg wane meweg duan.

Ag Olagwa Oun Nari Darig

† 22:14 22:14 Danah os Yesus nugégé toqarko anew kekuak nusig séksi ateg ole qe. Aposel ge Yesusri meř danah.

²⁴ Yesus Bégur ag agégé oun asilag naíri qeri néwa ih kareg. ²⁵ Karweg ge, Yesus anaran. “King wan eneri ge gagragsak asilagwa danahas gumaressi bilagwa qesi. Am wan ewa danah gagragsak ole qe ag danahas kehnaarak danah éksi anarlagri feílag mési. ²⁶ Gam ag ge qere aw seweg. Oun os asilag naíri de ge, nug danah sam sillah ag kallolagwa diar. Am danah oun ag gumardig ole ge nug asilag kekuak nir sillah diar. ²⁷ Qeri da koímarina. Oun ge danah naíri? Danah tewolwa sam dewew ke bawreksi morweg le ole qe te? Kawa, danah ke bawre ole qe te? Ag dosi ge danah tewolwa de qe ge danah naíri. Gam da ge enan. Ag olagwa danah ke bawarko mare ole qe sillah deina. ²⁸ Ag da ole kug dasil kunumba datu. ²⁹ Géri Mem da king delle danahas gumardilri kekuakri gagragsak miíran. Qe sillah ag ole danahas gumarlagri kekuakri gagragsak marina. ³⁰ Qeri Kingdom dasil owa ag ole tewol dasilwa arié dettu ke am le ole léksi am kingri sia awen awenwa dessi Israel ater 12 qe gumarlag,” eko anan.

Yesus Pita Nug Dimurdig Qeri Anan

³¹ Yesus Saimonri anan. “Saimon, Saimon, na doka. Reis ulaswa gogreppeg kéwsi am kar ole yalew ate qe sillah Satan o mére mak asilag qeperigri koíman. ³² Gam Saimon, da na ot mére mak pi tolwewri unuqurin. Géri sén na ot buliew dagnewa bulika doka ge, kuak usih leipar olag mére mak gagrag qor,” eko anan. ³³ Anew, Pita anoran. “Naírinah, da na dimlamirwi ole arié kalabuswa atnit am mousnitri ole bawréw deina.” ³⁴ Yesus koírewa oko anan, “Pita, da

anirina. Na kefew furwa maru pi gelak, na kiam patak da pi dui'na eka andip," eko anoran.

Yesus Béгур Gagrag Dalag Anan

³⁵ Qe dimba Yesus Béгур dilag anan. "Sén tatam da kuak marwi ateg ge, ag qarég yanakri sogot, baram, am félag ga'ra aw oweg eko anin. Sén qewa ag kitéri os qagreg te?" "Kawa," éksi aneg. ³⁶ Yesus anaran, "Gam gei ge oun os sogotwa qarég ole ge war am baram ole os. Am oun os fan barin kawa ole ge siot qa'ewari qe qarégri mew oweg am fan barin os daren mar. ³⁷ Tiwurdi Né yakwa ane, 'Danahas nug ró tapewnak danah sillah peg.' Am Né yakwa dasil ane qe olele murdig am dasil Né yakwa ane qe sén mou bérigri qe unaka do," eko anan. ³⁸ Anew nug Béгур aneg, "Na'rinah, fan barin a'rit enan," éksi anweg am Yesus anan. "Malwew, qe olele," eko anan.

Yesus Oliy Qoukuwa Unuqoran

³⁹ Yesus sansan seré sillah Oliy qoukuwa atewew Béгур ole dimlamurweg a'rié ateg. ⁴⁰ Ateksi ge, Béгур anaran. "Ag qepiakwa pi tolaweg qeri Tiwurdi unuqores," eko anan. ⁴¹ Nug Béгур minarko nagur lawa' qar tourweg atko qe, qe sillah wanko ge gatewa yako delle unuqoran. ⁴² Unuqorko anan, "Mem, na ot niew pe, na kug na'rinah wirdig ene moutina mi'. Gam da ol mourak aw dimlamurwen, na ot mourak qe dimlamur," eko anan. ⁴³ Anew ge, saw kappari Tiwurdi doup os gumurko doko nug gagrag qoran. ⁴⁴ Yesus kug na'rinah doko

gagrag unuqoran. Unuqorewew ge séri qeko karag sillah katré katré wanwa nan. ⁴⁵ Nug unuqorak malako asko ge, buliko Bégur agop wanan. Wanko ge, ag olag kug qew usniepppeg piaran. ⁴⁶ Piarko ge anan, “Ag kérdi usnisi? Aseksi qepiak uríyew tolawegra unuqores,” eko anan.

Yesus Órweg

⁴⁷ Yesus né mariewew, danah ameg naíri teg. Yesus Bégur qe olagwa usih os wénih Yudas qe omlarew teg. Nug Yuda koulagwa Yesus kiss murdigri unaka wanan. ⁴⁸ Wanew Yesus anoran, “Yudas, na Danah Bega da keger ewlagwa méirdipri te kiss mírdip sena?” ⁴⁹ Sén Yesus Bégur ag kug bérig sew peksi ge, koímoreg. “Naínah, ig fan barinwa fan sénig te?” ⁵⁰ Bégur qe usih os fan barinwa pris dilag kuri danahri kekuak nir doug kenari qe seiyan. ⁵¹ Yesus qere peko ge anan, “Aw! Malwam genan,” elle doug oko meko lamsiew buliko duírduan. ⁵² Yesus pris dilag anqak danah, Tiwur Lougri felag tutu am Yuda dilag kuri danah ole nug óralagri uríyeg qe dilag anan. “Ag tapewnak danah te óralagri fan barin am ker qetak ole kahweksi uríyew?” ⁵³ Da ag ole deí dorog Tiwur Lougwa daram, gam ag da ospi urwileg. Am gei ge asilag sén gatturi gagragsak ag gumare,” eko anaran.

Pita Yesus Pi Duina Eko Anan

⁵⁴ Anko malwew ge, Yesus órweksi omleksi pris dilag kuri danah qe lougwa ateg. Atepppeg ge, Pita nug dimqeko nagur lawar qere dimlamaran. ⁵⁵ Danah os kar owa lo ihíamba kew yaleksi

uǎgessi deppeg, Pita ole wanew qere kew o moreksi deg. ⁵⁶ Lo qewari kekuak as os Pita kew uǎgelle dewew peko kitturko de de ge anan. “Danah ene ole Yesus dimlamdak weiréw,” eko anan. ⁵⁷ Gam Pita anan, “Kawa, da danah qe pi duina,” eko anan. ⁵⁸ Am wagam kawa danah os peko anan, “Na os ole enan,” eko anan. Anew Pita anan, “Kawa, da ole kawa.” ⁵⁹ Kem ameg usih keke qere atew ge, danah os gagrag anan. “Meřenah! Danah ene Galilirer, qeri nug Yesus ole weiréw,” eko anan. ⁶⁰ Anew Pita noh meko anan, “Na kitéri té marina ge da pi duina,” eko anewew ole maru gelan. ⁶¹ Sén qewa ole Nařinah buliko mangu ole Pita amegwa amnan. Pew ge Pita Nařinah ere anoran qe dahmoran. “Na keřew furwa maru pi gelak, na kiam patak na da pi duiřna eka andip,” eko anan qe dahmoran. ⁶² Pita dimdim wanko delle ge, owa qetko atew qalko kuanan.

Yesus Siwegkolessi Uksiuksi Qoressi Am Koreg

⁶³ Tiwur Lougri felag tutu Yesus gumessi deg qe nug diguméksi siwegkolessi am koreg. ⁶⁴ Ag Yesus lamenwa ameg qageksi koreksi am kořmoreg. “Na profet daka pe, anwe duet. Oun na kuiré?” ⁶⁵ Ag né nouni kowol kowol Yesusri aneg.

Yudari Kuri Danah Dilag Qaglakwa Yesus Kořmoreg

⁶⁶ Kuagřew ge Yuda dilag kuri danah, pris dilag anqak danah am Mosesri Řo duak danah ole qagulweg ge, Yesus omleksi qaglak qewa waneg. ⁶⁷ Kuri danah wagé wagé qe Yesus kořmoreg.

“Na anwe duet. Na Kristus† qenan te?” éksi aneg. Yesus kořlagwa oko anan, “Da anwi ge, ag dasil olag meře ospi mew. ⁶⁸ Am da os ag kořmardil ge, ag né qe noh ospi meweg. ⁶⁹ Gam gei digumeko atak Danah Bega Da Tiwur gagragsak ole eweg kenariwa daril,” eko anan. ⁷⁰ Anew danah wagé wagé qe kunum bulieksi kořmoreg. “Qenan géri na Tiwur Bega te?” éksi anweg, nug anan. “Ag anéw ge da qenan.” ⁷¹ Qewa danah wagé wagé aneg, “Ig né gagrag qorakri né la ospi marihut. Ig igégé nou nusig qe nug kořewa duam qe olele,” éksi aneg.

23

Yesus Uksi Pailot Dowa Ateg

¹ Yudari kuri danah wagé wagé qe kunum qaglakwari aseksi Yesus omleksi Pailot* dowa ateg. ² Qewa ge nug diguméksi yagoř moreksi aneg. “Ig danah ene danahas isangar nouni omlardig sew pet. Am Sisari takis pi tourwegri doulagwa nolle am ole nug ane, ‘Da Kristus am da king,’ eko anew ořwektu uktu uřiyam,” éksi aneg. ³ Géri Pailot Yesus kořmoran, “Meře te na Yuda danah dilag king?” Yesus né noh meko anan, “Na anam qenan.” ⁴ Pailot pris dilag anqak danah am danah ameg naři ole dilag anan. “Da danah ene piém ge nug kité nouni ospi san.” ⁵ Gam ag duessi bulibuli gagrag aneg. “Nug Yudia atu kunumba weiyelle né mariyelle

† **22:67** 22:67 Kristus ge Mesaia. Tiwur danahas nusgur buliko diardigri danah toqoran. * **23:1** 23:1 Pailot nug Rom danah am Yudia wan atu qe gumdé.

danahas olag ye. Nug Galili tatam diguman am gei ge ewa uñyan se,” éksi aneg.

Yesus Uksi Herod Dowa Ateg

⁶ Sén Pailot qere doko ge nug koñmaran. “Danah ene Galilirer te?” ⁷ Ag koñewa uksi aneg, “Yo, nug Galilirer.” Pailot qe doko ge, ag Yesus uksi king Herod dowa ates eko anaran. Keñdi Herod nug Galili gumdé am sén qewa Herod nug ole Yerusalem dian. ⁸ Sén nug Yesus peko ge, o gamag nañi asan. Keñdi nug Yesus neihwah mañiweg doko sén welah perigri o nian. Am nug Yesus mirakel os sew piardigrinah dahmeré. ⁹ Qeri Herod Yesus koñkoñ moran, gam Yesus koñewa ospi wan. ¹⁰ Pris dilag anqak danah am Mosesri Ró duak danah ole qewa dessi ge, Yesus gagragnah yagoñ moreg. ¹¹ Qe dimba Herod fan danah nusgur ole Yesus uksiuksi qoressi siwegkolessi kingri bala kena urwurweg now uksi Pailot dowa bulieksi ateg. ¹² Tatam ge Herod am Pailot ole a olas usih pi daré, gam deñ qewa ih ole a liam pates.

Pailot Yesus Ker Mawanakwa Katullag Anan

¹³ Pailot anew pris dilag anqak danah, danahas gumarak danah am danahas ole qagleg. ¹⁴ Qagulweg nug anaran, “Ag danah ene uksi dagnéwa uñiyeksi anéw, ‘Nug danahas isangar nouni omlardigri olagwa ye,’ éksi anéw. Gam da ag nolagwa koñmorko piém ge, ag yagoñ moreksi aneg sillah nug kité nouni ospi san. ¹⁵ Qeri Herod ole qere peko mew buliko ignéwa uñiyé. Danah ene anwí qeweg mousdigri sillah kité nouni ospi

san piém. ¹⁶ Qeri da anwi siwirwa qisleksi am paroweg attig.” ¹⁷ (Pailot qere anan, keŕdi sansan Nanŕurak Derwa kalabus danah usih os danahas ag nusig olag nie ole qe paroweg doko dimdim ate.) ¹⁸ Gam danahas kunum urweksi aneg. “Danah qe qewe mousar! Barabas matulwe do migar!” ¹⁹ Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan. Qeri nug kalabuswa yaneg. ²⁰ Pailot nug Yesus mundew attigri o dian, qeri buliko danahas koŕmaran. ²¹ Gam danahas bulibuli urweksi aneg, “Ker mawanakwa katul! Ker mawanakwa katul!” ²² Pailot kiam patak danahas anaran, “Kitéri? Nug keŕ kugnah san, qeri anwi qeweg mousdig? Danah ene qeweg mousdigri sillah kité nouni ospi san piém. Géri qisleksi am paroweg attig,” eko anan. ²³ Gam gagragnah urweksi Yesus ker mawanakwa katlakri aneksi Pailotri né qeweg nan. ²⁴ Géri Pailot minko ag aneg qe dimlamurko Yesus qeweg mousdigri anan. ²⁵ Yuda aneg sillah, Pailot anew tapewnak danah Barabas nug sew Yerusalem taun gumak danah Yuda dilag danahas ole karak naŕi seg am nug danah os ole qew mousan, qeri kalabus dian qe matlew duan. Am Yuda olag nian sillah, Yesus ge qelagri Rom fan danah ewlagwa man.

Yesus Ker Mawanakwa Katleg

²⁶ Qewari ge ag Yesus uksi taun dimdim ateppeg danah os wénih Saimon Sairinirer qe uriko taun owa nurig sewew orweg. Orweksi keigoreksi ker mawanak sumeksi guqawa meweg mouko Yesus dimlamdan. ²⁷ Danahas

ameg na'ri Yesus dimlamdeg. Qe olagwa as os Yesusri kunnessi dimlamareg. ²⁸ Yesus piarko anaran. "Yerusalem as, ag dasil aw kuanweg. Ag agégé asilag am nir nounou asilgar ole dilag kuanes. ²⁹ Kerdi geisah sén os u'riyew danahas anlag, 'As olagwa nir kawa, as nir pi memnak am as ouma asilag nir ospi lak ole qe ge kena.' ³⁰ Sén qewa danahas qouku wagé wagé am nounu dilag ole anlag, 'Ag néksi tonigweg mouset,' éksi anlag. ³¹ Kerdi ag da kité nouni ospi séwi am qere sírlag ge, ag ge nouninah sarlag," eko anan. ³² Sén qewa Rom fan danah tapewnak danah a'rit os Yesus ole a'rié ker mawanakwa katlarlagri diareksi ateg. ³³ Ateksi awen os wénih mousak danah kuri kéwsi éksi ansi qewa ge Yesus ker mawanakwa katleg. Am tapewnak danah a'rit qe os ge kenariwa katleksi am la os ge nanettiwa katleg. ³⁴ Yesus unuqorko anan, "Ó Mem, hipunin asilag kusuq. Kerdi danah ene duessi pi sési," eko unuqoran. Danah ameg na'ri amneksi deppeg fan danah ag oun Yesus féru bala qe urigri ker masawa namba yeksi touressi sago'weg. ³⁵ Am Yuda dilag kuri danah Yesusri né siwkolessi aneg. "Nug danahas la ge kehnarko kusqaran. Géri gei ge nug me'nenah Kristus Tiwur toqoran dako pe, nug nugégé kusqak urig," éksi aneg. ³⁶ Fan danah ole Yesusri né siwkolessi unaka waneksi wain qew morlagri seg. ³⁷ Qere séssi aneg, "Na Yuda dilag king daka pe, na nagégé kusqak o," éksi aneg. ³⁸ Karan kuriwa ker mawanakwa ker masa oswa né os ere yak qe dian. "Ene Yuda Dilag King." ³⁹ Danah nou os a'rié ker

mawanakwa katlareg ole qe Yesus okoko qorko anan. “Na Kristus meře Tiwur toqiran dew pe, na nagégé kusqak oka am i ole sewe kusqak oř.”⁴⁰ Gam tapewnak danah os ge lia gařa morko anoran, “Na nug mousdig sillah ih usih gewa mousdip, qeri na Tiwur pi te fařurna?”⁴¹ I ge isanit sak nou qe ih noh mawekřu mousnit, gam nug ge kité nouni ospi san,” eko anan.⁴² Anko ge Yesusri anan, “Yesus na king beka ge, da dahmiř.”⁴³ Yesus kořewa oko anan, “Da meřenah anirina. Na gei da ole paradaiswař danit,” eko anan.

Yesus Mousan

⁴⁴ Kémun kem ameg 12wa keke qere usihri atu qe kunumba gattu tonko niewew atko tueh kem ameg 3wa keke qere malwan.⁴⁵ Kem ameg ořwew gattu tonko niewew, Tiwur Lougwa gun awen owa lamen naři eisak nian ge gamagwa karilko neko ařit patan.⁴⁶ Géři Yesus gagrag uřuko anan, “O Mem, da koullil na ewenwa meina,” elle ole mousan.⁴⁷ Sén Rom fan danah dilag kuri qe kunum peko ge Tiwur binag meko anan, “Meřenah, danah ene mangunah,” eko anan.⁴⁸ Am danahas kunum qe pelagri uřiyeg ge peksi olagwa qetko atew bulieksi loulgarwa ateg.⁴⁹ Gam danahas Yesus doréw qe kunum ole am as Galiliri dimlamdeksi uřiyeg qe ole lawař asessi dessi keř keř beko atan qe kunum ole peg.

Yesus Uksi Ateksi Matmatwa Meg

† **23:43** 23:43 Saw kappa awen kenanah. O meře mak danah mouseksi ge gewa Yesus ole dasi.

⁵⁰ Danah os wénih Yosep nug Yudia atu owa taun Arimatearer am nug ole Yuda dilag kuri danah qaglak qewa delle kug kepardé. Nug danah kena am danah mangu am nug Tiwur king delle danahas nusgur gumardigri sén qe ameg meré. ⁵¹ Nug ole Yuda dilag kuri danah qagleksi kug peréw qewa daré. Gam nug kuri danah la aneg am seg qeri o olele ospi dian. ⁵² Nug Pailot dowá atko Yesus gaía oko suhumdigri koímorew, Pailot mundew wan. ⁵³ Géri nug Yesus gaía ker mawanakwari oko neko lamén kena sagahwa saputko am oko atko matmat os qar oíe kutlak qewa man. Matmat qe fou am danah gaía la ospi mak ole. ⁵⁴ Deí qe Sabatri keke bawrak sén, am Sabat digumerigri sén unaka duan. ⁵⁵ As Yesus dimlamurweg Galiliri úriyeg qe Yosep dimlamurweg matmatwa ateg. Ag Yesus gaía areg matmatwa meg qe pelagri ateg. ⁵⁶ Peksi ag bulieksi loulagwa ateksi ge, goíen muídig kena ole qe Yesus gaía waíwurlagri bawreg. Malaweg ge Sabat diguman. Géri Mosesri Ró dimlamdak ag sik og.

24

Yesus Mousko Am Buliko Asan

¹ Kuhawa furwanah as os goíen muídig kena ole bawreg qe uksi matmatwa ateg. ² Ateksi qewa ge, matmat koíe megleg qar naíri qe bitlew dougwa wanak dewew peg. ³ Peksi ole ag owa nog, gam Naíri nah Yesus gaía qewa ospi peg. ⁴ Qeri ag katat aqarew aseksi deppeg ge, usihri danah aít bala ampií sonré sillah mak ole

qerlagwa aseksa des. ⁵ As qe faʼeksi nou méksi duk nuksi gatlagwa yeksi wan kittureksi deppeg ge, danah aʼrit qe anes. “Ag danah gei fou de ge keʼrdi mousak danah dilag awenwa marisi? ⁶ Nug ewa os kawa. Nug mousan gam buliko asan. Nug Galili dessi keʼ eko anaran qe dahmores. ⁷ Nug anan, ‘Danah Bega hipunin danah ewlagwa meweg ker mawanakwa katulweg mousdig, gam deʼ kiamba buliko asdig,’ eko anan.” ⁸ Qewa ge, ag Yesus anan ge bulieksi dahmoreg. ⁹⁻¹⁰ As qe Maria Makdalarer, Yoana am Maria Yems anig am as la os ole aʼrié matmatwa ateg. Ag bulieksi matmatwari louw ateksi ge, Béгур 11 qe am danahas la Yesus dimlamurdéw ole qe kunum keʼ keʼ ban qe anweg dueg. ¹¹ Gam ag as né aneg qe ulas né essi olag mére ospi man. ¹² Gam sén Pita asko guko atko duk noko amnew matmat oʼre owa now ge, lamén sapteksi meg ole qe ih qewa niewew pian. Peko ge, keʼ keʼ ban qeri dahmew te mew newew buliko louw atan.

Danah Aʼrit Emeus Atakri Ihwa Yesus Pes

¹³ Deʼ qewa ih Yesus dimlamdak danah aʼrit os Emeus kappa atlasri ates. Yerusalemri Emeus atak ge 11 kilomita sillah. ¹⁴ A até até keʼ keʼ Yerusalem ban qe kunum mariessa ates. ¹⁵ A qeri mariessa suʼriessa atepes ge, Yesus nugégé dow ole aʼrié ateg. ¹⁶ A pes, gam nug oun qe a olas ospi mouran. ¹⁷ Nug koʼrmatan, “A kitérinah né mariessa atsa?” A olasnah dow kilas nou mew aseksa des. ¹⁸ Danah os ge wénih Kliopas qe asko koʼr Moran. “Na Yerusalemri uʼrina, gam na nagé té deʼ gane atan qewa keʼ keʼ ban qe ospi

duen?” eko anan. ¹⁹ Anew ge, nug koʻmatan. “Keʻnah ban?” eko anew, a koʻewa oksa anes. “Nasaretrer Yesusri né mariʻu. Nug gagragsak naʻri ole né marian am keʻ keʻ san. Qewa ge, Tiwur amegwa am danahas amlagwa ole nug profet gagragsak ole. ²⁰ Gam pris dilag anqak danah am gumarak danah isanig ole oʻrweksi ewlagwa meweg ker mawanakwa qeweg mousan. ²¹ Ig Israel nug ig kug owari buliko wigrigri onigwa niewew dahmoretu weiram. Gam qenan ih kawa, qeweg mousan am gei ole deʻ kiam ate, gam kite ospi be. ²² Am as isangar os gei furwanah matmat nusigwa ateksi am bulieksi uʻriyeksi seweg durnig new katat iqé. ²³ Ag Yesus gaʻra qewa ospi niewew piéw, gam Tiwurdi doup piatweg Yesus buliko asé eksa anap. ²⁴ Danah isanig os matmatwa ateksa ge, as anéw qe sillah ole Yesus gaʻra qewa ospi piap,” eksa anap. ²⁵ Géri Yesus anan, “A dahmak kutuk ole. Profet dilag né yak algurer nie, gam ag nagur olag meʻre ospi me. ²⁶ Ag pite dosi ge Kristus kug naʻri ene oko mousko tatam am buliko asko ge kamsahlak gun olewa darig?” eko anan. ²⁷ Am nug digumeko Mosesri am profet la kunum dilag Né yakwa nugégé nusig yeg qe kunum a dolasri nug digu kusuko ismatan. ²⁸ Ag kaw ateg ole qe mourak waneksi ge, Yesus nug kaw qe éʻurko attigri san. ²⁹ Gam danah aʻrit qe gagrag meksa anes, “Na i ole ninig, keʻrdi ene gattu mane am kem noko malwé,” eksa anes. Géri nug a ole nilagri louw ateg. ³⁰ Ag ke lelagri aʻrié dessi ge, Yesus beret os oko Tiwurdi kena sam elle

unuqorko temko matan. ³¹ Qere sew ge, usihri a amlas fur kougwew peksa olas mouran ge nug Yesus. Gam a sén qewa nug ospi peppes ole qeroñan. ³² A atété né marieksa anes. “Ig ihwa uriyettu nug Tiwurdi Né yak digu kusuko marié ge kuñunit koré,” eksa anes. ³³ Géri a usihri aseksa ole Yerusalem bulieksa ates. Ateksa qewa ge Yesus Béгур 11 qe am leilgar la ole qagulweg piales. ³⁴ Qewa ge aneg, “Meře! Nañinah buliko asan am ole Pita gumurko wanew nug pian,” éksi aneg. ³⁵ Am danah ařit Emeusri qe a attowa keř keř ihwa san qe marieksa am beret temko matew ge peksa olas mouran qeri anes.

Yesus Peg

³⁶ Sén ag né qeri marieppeg, Yesus nugégé gumarko doko olagwa qere asko delle anan. “Tiwur o maror ag ole dalag.” ³⁷ Ag peksi ole dore piam essi olag fařko nou man. ³⁸ Gam Yesus anan, “Ag keřdi fařessi am olag ařit ole de? ³⁹ Da ewel fél ole duřfal ene pes. Da enan! Úrwileksi pes, da dore os kawa. Keřdi dore ge téhu am kéwsi ole kawa.” ⁴⁰ Nug qere anko ge eweg am féğ ole ismaran. ⁴¹ Ag olag gamag asewew dahmak kuřum og, qewa ag olag meře ospi man. Qeri Yesus kořmaran, “Ag kité lakri ewa os de te?” eko anan. ⁴² Anew ge ag kaké ařak os uksi moreg. ⁴³ Morweg ge, nug oko ag peppeg ole lan. ⁴⁴ Nug anaran, “Da ag ole dettu anarin. Mosesri Řo yakwa, profet dilag Né yakwa am Dewitri Kasi Yakwa dasil ane qe kunum meřenah mou bérig,” eko anan. ⁴⁵ Anko ge, nug Tiwurdi Né yak olag mourdigri sew dahmak asilag matlan. ⁴⁶ Nug

anaran, “Tiwurdi Né yakwa ane, ‘Kristus qe nug kug nañi oko mousko am deñ kiamba ge buliko asdig. ⁴⁷ Danahas olag buliew Tiwur doweg am hipunin asilag kusugrigri né qe nug wénihwa danahas kunum agop ag Né Kena qe kusulag. Am qe Yerusalem digumelag,’ eko ane. ⁴⁸ Ag qe ih keñ keñ ban peg qe kunum ole mariweg dues. ⁴⁹ Da Mem né fagqan qe dimlamurko Koulli Gun méwi uririg. Am ag taun ewa ih daweg atew Tiwur gagragsak mardig,” eko anan.

Yesus Saw Kappa Atan

⁵⁰ Qe dimba Yesus bégur omlarew taun pañweksi Betani mourak ateksi eweg sumko wittak maran. ⁵¹ Nug wittak marewew Tiwur sumko oko tew minarko saw kappa atan. ⁵² Géri ag Yesus binag méksi am olag gamag asak nañiwa bulieksi Yerusalem ateg. ⁵³ Am ag Tiwur Lougwa dessi Tiwur binag sumdew.

Lukri Né Kena
Wagi: Lukri Né Kena Portions
Luk long tokples Wagi long Niugini

copyright © 2016 Wycliffe Bible Translators, Inc.

Language: Wagi

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 3 Feb 2023 from source files
dated 29 Jan 2022

6967869f-9588-59ed-91d2-0158edb59705